

**EIGHTH LEGISLATIVE ASSEMBLY OF MIZORAM
(NINTH SESSION)**

LIST OF BUSINESS

FOR SIXTH SITTING ON TUESDAY, THE 1st MARCH, 2022
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. ***Questions*** entered in separate list to be asked and oral answers given.

LAYING OF PAPERS

2. **PU ZORAMTHANGA**, hon. Chief Minister to lay on the Table of the House a copy each of the following:
 - (i) Report of the Comptroller and Auditor General of India Performance Audit of Select District Hospitals in Mizoram for the year ended 31 March 2019.
 - (ii) Report of the Comptroller and Auditor General of India on Social, General, Economic and Revenue Sectors for the year ended 31 March 2019.
 - (iii) State Finances Audit Report of the Comptroller and Auditor General of India for the year ended 31 March, 2020.
 - (iv) The Second Annual Report 2020-2021 of Mizoram Lokayukta.
3. **PU LALCHAMLIANA**, Minister to lay on the Table of the House the Mizoram Private Security Agencies (Private Security to Cash Transportation Activities) Rules, 2022.
4. **PU VANLALHLANA** to lay on the Table of the House Statement of Action Taken on the Further Recommendation of Public Accounts Committee contained in the 8th Action Taken Report, 2020 relating to Labour, Employment, Skill Development & Entrepreneurship Department.

LEGISLATIVE BUSINESS

Bill for introduction, consideration and passing

5. **PU K. LALRINLIANA**, Minister to beg leave of the House to introduce “The Mizoram Fisheries (Second Amendment) Bill, 2022”.

ALSO

to introduce the Bill

to move that the Bill be taken into consideration

AND

to move that the Bill be passed.

FINANCIAL BUSINESS

6. **GENERAL DISCUSSION ON THE BUDGET FOR THE YEAR 2022-2023**
General discussion on the budget for the year 2022-2023 (to be concluded).

H. LALRINAWMA
Commissioner & Secretary

SPEAKER : *Thil dang ber aiin i thinlung veng tha rawh, Nunna lo chhuahna a ni si a.*

- Thufingte 4:23

Vawiinah hian Member zahawm tak Pu C. Lalsawivunga taksa harsatna avangin a lokal theilo chhunzawm zel a ni.

Zawhna leh Chhanna-ah kan kal ang a, tunah Member zahawm tak Pu Lawmawma Tochwawng, *Starred Question* No.61 zawt turin ka sawm e.

PU LAWMAWMA TOCHHAWNG: Pu Speaker, ka lawm e. Minister zahawm tak Health & Family Welfare Department changtu chhan atan ka zawhna chu –

Civil Hospital Lunglei building kianga building lianpui pui, a thianga ding sak mekte saw enga tana hman tur nge?

SPEAKER : Chhang turin Health Minister zahawm tak Dr. Lalthangliana ka sawm e.

DR. R. LALTHANGLIANA, MINISTER: Pu Speaker, Member zahawm tak Pu Lawmawma Tochwawng zawhna chhanna chu –

Civil Hospital Lunglei building kianga building lianpui pui, a thianga ding sak mekte saw, Trauma Centre leh RT-PCR Lab building atan leh thildang dahkhawmna atana sak a ni.

SPEAKER : *Zawhbelhna* zawt turin a zawhna neitu, Member zahawm tak Pu Lawmawma Tochwawng ka sawm e.

PU LAWMAWMA TOCHHAWNG : Pu Speaker, ka lawm e.

Zawhbelhna: Union Health Minister nimin maia lokal khan Health lamah kan ram tana hmasawmna kan neih phahna tur a rawn keng em, tih leh, Trauma Centre hi ramchhung hmundangah sak a ni ve em? Mortuary (mithi dahna in) Lunglei Hospital-ah sawn dah tumna a awm em? Lo awm ni ta se, eng chen nge kalpui anih tawh? Lunglei Hospital lift saw vawi duailo kan sawi tawh a, hman theih tura siamthat thuai tumna a awm em, tih a ni e.

SPEAKER : *Zawhbelhna* zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, ka lawm e.

Zawhbelhna: Civil Hospital, Aizawlah hian Covid kaihhnawihah Driver 6 (paruk) thla khatah ₹9,000/- hlawha chhawr anni a, March 2021 a chawlh tir anni a, an chawlh hma thla February thla kha hlawh pek anni lova. Hei hi engtiziange, tih kha ka zawt duh a.

Tichuan, April-ah ruai lehin, hlawh pawh “thla khath ₹15,000/- kan pe tawh ang che u” tiin an thlem a, an zawm leh ta a. December atanga tun inkar hi hlawh pek an la ni lo leh a. Tin, ₹15,000/- an sawihmuh a hma khan ₹9,000/- an hlawh a, tunah ₹7,000/- an pe ta a, chu pawh chu an la pe kim thei bawk si lova.

Zanah an riah chilh a, nupui fanau bulah pawh mu thei lovin an awm a. Hei hi an hmuh tur ang an hmuh theih nan leh an hlawhte pawh an tiam ang ngeia pek anih theih nan hma min laksak thei ang em, tih a ni e.

SPEAKER : *Zawhbelhna* zawt turin Member zahawm tak Dr. K. Pachhunga ka sawm e.

DR. K. PACHHUNGA : Pu Speaker, ka lawm e.

Zawhbelhna: Lunglei Civil Hospital-a oxygen plant dah hi a capacity engzatnge? Tin, engtia tangkaia hman tur nge anih tihte min hrilh thei em? tih leh, Southern part chhimlam bik tan oxygen refill centre emaw, sak emaw hmalakna a awm em? Ka lawm e.

SPEAKER : A theih ang anga chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, ka lawm e. Ka chhanna hi tlemin a karkik deuh hlek a, Member zahawm tak Pu Duhoma zawhna pawh kha a awm a.

Civil Hospital, Aizawl-a a bik taka thawkte ngat hi chu a hah pawh an hah khawp mai a, Ambulance driver-te a tlangpuiin an ni a. Civil Hospital atanga kan dedicated hospital ZMC-a zankhaw tairek tlaivar dawna thawkte an nih avang hian an pawimawh khawp mai a. An hlawh lak dan kimchang kha ka hre thui lutuk lova, engpawh nisela kan lo enfel turah ngai ila.

Engpawh nisela, hlawh tih ai mah hian covid avanga chhawr hi chu Pu Speaker, ‘lawmman’ ti te hian a hming kan han dah ve deuh a, rawih dan chihnih deuh te hian. ‘RKS’ kan ti a, kan Hospital sum eng emaw tlingkhawm atanga rawih an awm a, a then

chu directorate lampang atanga lawmman pek an awm a, khalai kha kan lo enfel turah ngai ila a tha awm e.

Zawhna neitu zawhna kan chhan hmain Dr. K. Pachhunga, Member zahawm tak zawhna kha chhan a har lutuk lo deuhin ka ring a.

Oxygen plant hi Pu Speaker, a lawmawm angreng khawp mai a. Mizoram district zawng zawngah hian kan bun fel vek tawh a, Zoram Medical College-ah kan bun a, pakhat mai kan bun lova hetah phei hi chuan a tam tham ang reng a. Tin, Civil Hospital, Aizawl-ah kan la zo chiah lova, a hmunhma a buaithlak deuh avangin. Kulikawn-ah pawh sawn, kan information atan 250 litres awm thei kan dah tawh a, Champhai-ah 500, Hnahthial leh Khawzawl-ah 250 ve ve, Kolasib-ah 250, Lawngtlai-ah 250 kan dah bawk a. Lunglei hi an vannei viau mai a, a hmunhma an neih kha a ngai a, a lian tham dah tur chuan, hetah hian I pm, 1000 tunah hian kan dah thei ta a. Tin, Mamit-ah hian 500 dah a ni, Siaha-ah 500, Saitual-ah 250, Serchhip-ah 250, tunah hi chuan kan nei kima. Zemabawka Cancer Hospital-ah sawn kan dah bawk a, chutiang chuan hmun hrang hrangah kan dah a. Lunglei hi kan hnianghnar turah ka ngai a, vanneihthlak takin USA atangin an ti a, he mite hi DoNER an ni a, CSR kan tih ang deuh a ni ang nuai 100 chuang zet sengin a thlawnin a khawl leh thil dang minrawn pe a, chu chu Synod Hospital-ah thawhtanni khan kan han commission sak a. Tin, Serkawn Baptist Kohhran hospital ah sawn I pm, 800 ve ve dah a ni a, commission fel a ni tih kha House information ka han pe duh a.

Dr. K. Pachhunga zawhna kha, filling station tur atana hmalakna hi kan kalpui chho turah ka ngai a, a bik takin southern district kan tih hian Lunglei, Siaha, Lawngtlai leh Hnahthial te hi a huam deuh hlek a hemi tur hian a tul hrim hrimin kan hria a. helaiyah hi chuan hmalakna kan kalpui mek tih hi ka chhanna ni sela.

Zawhna neituin Mortuary Building Lunglei Civil Hospital-a tih tura a tih kha ka la hrereng a, kan sorkar hmasak Pu Tlanga, Health Minister anih lai niin ka hria, khatah khan pawisa pawh a awm a, mahse tih mumal mangloh khan a awm a, tunah hian tih ngei ngei a ngai dawn a, sum tam tak senna lutuk turah kan ngai lova. Mortuary thar hi chu Lunglei-ah hian kan dah ngei ngei a tul dawn a, tun financial year tharah hian kan beisei tih kha ka chhanna ni sela.

Tin, lift hi a buaithlak khawp mai a, kan buaipui rei khawp a. Kum 20 zeta upa tawh a ni a, a rei tawh khawp mai a. Vawihnih kan repair tawh a, han repair hnu hian a khaichhoh zawh bak kha kan chuang zauh zauh anih ka ring a, chu chuan eng emaw defect a siam a, kan repair thin a. Tunah hian kan han en leh a, a tuiek ang reng deuh te pawh a awm a. Engpawh nise, repair dan kawng a awm chuan kan en ang a,

amaherawhchu, a thar han lei dawn hian rin aiin a to viau mai a, nuai 25 leh 35 inkar bawr vel a ni a. Hei hi chu thil pawimawh tak mai, In chhawng eng emaw zat Lunglei Civil Hospital-a kan neih a tana pawimawh em em a nih a vangin helaiah hian hmalak mek a ni a, kan kalpui chho ang a, sum kan hmuh theih beisei dawn ta ila a tha awm e. A pawimawh khawp mai. Kha kha ka chhanna ni sela.

Tin, he building hi ‘Trauma Centre’ a ni mah mah zawk awm e. Pu Speaker, ‘Trauma Centre’ kan tih hi tunah hian Mizoram-a district eng emaw zatah hian kan bei tawh a, hei Pu Duhoma bialah phei chuan kan peih diam tawh a. Amaherawhchu, peih tawh a ni na a, tunah Covid ho dah nan kan hmang lo thei lova; hei hi kan peih tawh a ni.

Tin, Aizawl Trauma Centre hi kan sak theih lohna chhan a awm a, sawlaiah sawn pipeline lian pui pui te, tin power station te a ding a, khang kha kan han singsa tak tak a, Local Council sawlaia mite pawh an involve bawk a, hna kan han tan thei ta a. Hei hi chu a chhuanawm tham tur law lawin, saw mi ‘Blood Bank’ kan tih mai nena a building parallel a siam kan tum a, crore 10 chuang zet, hmun dang dang a mite pawh belha tih kan tum a ni tih kha ka sawi duh a.

Tin, chu bakah Lunglei-ah hian kan hna hi a chak hlei thei lova, Covid avangin Mistiri leh Labour te ram pawn atangin an rawn lut tha thei lova. Nizana kan han assess tir chuan, an zawh tawh, physical achievement hi 90% a ni a. ‘Trauma Centre’ tih awmzia chu, emergency accident-a hliam tuarte rang taka kan enkawlina tur kha Pu Speaker, a ni a. Mahse, a building saw a len a vangin ICU pawh kan dah thei ang a, chhawng eng emaw zat a awm a, department thenkhatte pawh kan dah thei ang a. Lunglei Civil Hospital ngheng mai a ni a, tihte ngaihtuahna kan nei a ni tih kha kan sawi duh a. Chutiang chuan, Trauma Centre kan zawh tawhna hi, Lunglei hi kan zo thuai thei turah ka ngai a, May thlaah hi chuan commission thei turah kan inngai a ni.

Hei, Kolasib hi physical achievement-ah 100% ang thuakin an rawn ziak a, Champhai hi 75% zo tawh angin an rawn ziak bawk a. Tin, Lawngtlai hi kan zo fel thawkhat e an rawn ti a, Siaha pawh chutiingin. Chungte chu Trauma Centre kan neihna hmunte a ni. Hei hi multipurpose deuha hman tur a ni a, Civil Hospital ami phei chu parking nen kan ti chho ang a, a tangkai viau turah ka ngai a ni.

Nimin maia khan Union Minister of State, Health & Family Welfare lokal avangin chawhma lam khan Pu Speaker, House-ah pawh ka rawn tel theih lohna chhan kha a ni a. Hei, kan Vice-Chairman, Pu Thiamsanga nen, a lokal kha a hranpa liau liauin kan official-te nen meeting neih kha tha kan ti a, hmeichhia a ni a, a la naupang a, amaherawhchu, a fel viau awm mang e kan ti a. Amaherawhchu, ka lo hriat dan chuan

Prime Minister-in a rawn tirh ni khan a insawi ve deuh a. Chuvang chuan Minister dang lokal ang lo deuhin kan duh zawng hi chu I han sawi thahnem deuh ang tih ngaihtuahna kan nei deuh a.

Pakhatnaah chuan, an tihtheih leh theihloh chu kan hre lova, kan mamawh em em pakhat chu, Mizoram-ah hian India ram pumpuia Mental Hospital 40 dah tura an tih hi chan ve kan duh hle mai tih kan thlen a, kei pawhin ziakin ka thlen a. Chumi piahlahmah chuan kan hon. Chief Minister ...(**Pu Zodintluanga Ralte** : Pu Speaker, khang kha chu Demand-ah sawi mai sela, zawhna kha a chhang zo tawh a, adangah a kal zel theih mai lawm ni le?) A lo kal khan engnge in thlen tih anih avang khan chhan a ngai bawh si a ni. Zawhna anih avang khan ka chhang mai a ni. A zawhna neituin a zawh miao kha chuan eng eng emaw chu kan thlen teuh mai. Tin, health infrastructure, hospital sak that ngai, a bikin kan district thar pathumah te leh kan Quarter te, khatiang bal chhe tawhte leh thil tam tak te kan thlen a. Tin, “AIIMS like Hospital” tih te pawh kan lo thingri (**Speaker:** A lawmawm e. Thil thlen zawng zawng kha chu sawi sen a ni lova.) Pu Speaker, kan thlen ve hrim hrim a ni, a hlawhtlinna chu thu hran ni se. Ka lawm e.

SPEAKER : *Starred Question* No. 62, zawt turin Member zahawm tak Dr. Vanlalhlana ka sawm e.

DR. VANLALHLANA : Pu Speaker, ka lawm e. Kan Minister zahawm tak Urban Development & Poverty Alleviation Department changtu chhan a tan –

- a) Aizawl-ah Bazarpu (New Market) sak that hna hi engtikah nge tan anih dawn?
- b) PAHOSS hi kalpui zel tum a ni em?

SPEAKER : Chhang turin Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Pu Vanlalhlana zawhna chhanna chu –

- a) Aizawl Bazarpu sak thatna tur, ‘Modernization of Bara Bazar’ DPR hi sorkar-in a approve tawh a, tun thla chhunga tender tura hmalak mek a ni.
- b) PAHOSS hi kalpui mek a ni a, mi 11 in sa zo tawhin, tangkai taka hman mek a ni. Tunah hian mi eng emaw zatin Parking House sak hna hi an kalpui mek bawh a ni.

SPEAKER : *Zawhbelhna* : Dr. Vanlalhlana.

DR. VANLALHLANA : Pu Speaker, ka lawm e.

Zawhbelhna: Smart City Project hnuai hian BEL nen crore 100 chuang contract sign niin ka hria a, kha kha thawh zawh tawh ani em?

Tin, a pahnihna hi tlema sawi hlek ngai a awm a. Smart City Mission statement leh quidelines-ah khan a pawimawh an tih zual, Smart City in a ken tel tur ‘*core infrastructure element*’ an tihah khan thil 10 a rawn lang a, tui te, power te, a vaiin sawi vek lo mai ila. Zirna te, Hriselna te chi hrang hrang a awm a ni. Khatah khan Sports a lang lova, amaherawhchu, tender chhuah tawh 14 zingah hian playground 4, Futsal ground 1, multipurpose ground 1 leh Outdoor recreation centre 1 a rawn lang ta a. Kan thehluh hi a copy te pawh kan en ve a, a lang bawk si lova. Engvangin nge hetiang lamah hian a kal tak? Kan mamawh em em Zirna In te, Hriselna Inah te hian a kal thei lawm ni tih kha ka zawhna a ni a. Engtingge hetiang a kal tak mai, thildangah khan kan hman dawn em tih a ni.

Tin, New Market chungchangah khan, chhungkaw 1,093-in eizawn nana an hman a ni a, a hmunah pawh ka va kal a, office pawh ka va tlawh a. January thla chhungin tender kan tichhuak ang tih a ni a, office a tangin. Amaherawhchu tunah pawh kan la hmu lova, kan ngaih pawimawh lamah chuan hma kan la chak em em mai a. Kan sorkar hian chhungkaw sang chuangina eizawn nana an hman, a then pheii chuan two-wheeler taxi te an lo khalh hman tawh a ni. Hei hi ngaipawimawh turin ka han ngen a.

A tawp berah chuan, PAHOSS Scheme hi ‘Parking’ tih a ni. *Parking Support Scheme* a ni a, amaherawhchu a thenah chuan park theih miah loh, garage-a hman ta te an awm niin a hria a. Tin, inspection report pawh a hmain Session hmasaah pawh ka rawn dil tawh thin a, a hmunah kei pawh ka kal a. Garage atana hman ta zawk, parking nana hmanglo hi an awm em tih kha kan zawh belh e. Ka lawm e.

SPEAKER : A theih ang ang chhang turin a changtu, Deputy Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm takin a zawhbelhna, kan programme kal zelah khan Zirna In te, Hriselna In te hi *smart city*-ah chuan uar tur a ni tih a awm teh reng a. Amaherawhchu, hetah committee hian a ngaihtuaha, “heti zawng hian i her rem ang hmiang” a tih angin kan her rem thei a. Chutiang chuan hmunpui lam pawhin min pawmsak a, tuna kan programme ang hian kan kal a ni. Zirna, hriselna lampangte kan ngai pawimawhlo a ni lo va. Kan ngai pawimawh chungin, tun hunah hian kan thalaite tana pawimawh em em infiamna lam te, tin, mipui vantlangin kan chhawr tur pawimawh hall leh thildangte, khatiangin tun hunah hian kan han ruahman chho a ni a. Programme tam tak kan nei a, kan sawi seng

hrih lova, nakinah a tul chuan kan la sawi zel ang a. Tunah hian *smart city* atanga kan hmalakna hi chutiang chuan a kal tha khawp a ni.

Tin, parking atana hmang lo an awm kan hre lova keini chuan. Tunah hian parking house sa zo tawh mi 11 an awm a, chu chu hman mek a ni a. Chuvangin, hemi hi member zahawm takin a hmang lote a hria anih chuan, a theih dan kawngin inhriattir ila kan lo chhuichhuak thei vekin kan ring a ni. Chuvang chuan, helaiah hi chuan theihtawp chhuahin kan lo enzui ang tih ka han sawi duh a ni.

Tin, ICC hna, a filler an sawi kha ka han sawi mai thei ta lova. Kha kha kan tender tawh bakah tunah hian tender leh tura tih a ni. Tichuan, kha kha la buaipui mek a ni. Kha kha kan tender tawh bakah a figure kha chu ka sawi sual palh takin ka sawi lo ang a, mahse a dik thoin ka hria a, khalai kha. Kha bak kha chu hmabak a ni, la tender leh tura bawhzui mek a ni tih kha ka chhanna a ni e.

SPEAKER : *Starred Question* No. 63, zawt turin Member zahawm tak Pu Lalrindika Ralte ka sawm e.

PU LALRINDIKA RALTE: Pu Speaker, ka lawm e. Finance Minister zahawm tak chhan atan ka zawhna chu –

- a) Mizoram Sorkar Flagship Programme hi eng ber nge?
- b) A neih chuan, engzat nge sum a sen tawh?
- c) Mizoram sorkar chhinchhiah danin Myanmar raltlan engzat nge lo lut tawh?

Ka lawm e.

SPEAKER : A chhang turin Chief Minister zahawm tak, Finance changtu ni baw, Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, zawhnate a chawhpawlh ang reng riau a. Finance, SEDP atangin Myanmar raltlanah, a department an sem dan pawh hi a buaithlak khawp a. Member-te hian a department khat chan tur kha zawt hlawm deuh hlek sela sem rual pawh a awl deuh ang a. Engpawh ni se theih ang angin kan han chhang ang a.

Member zahawm tak Pu Lalrindika Ralte zawhna chhanna chu –

- a) Mizoram Sorkar Flagship Programme chu, Socio-Economic Development Policy (SEDP) a ni e.
- b) Kum 2019 atanga SEDP hnuai pawisa Line Department-te hnena sem dan chu hetiang hi a ni -

i) 2019 - 2020	₹56,260.79 lakh
ii) 2020 - 2021	₹11,383.91 lakh
iii) 2021 - 2022	₹8,893.45 lakh
TOTAL	₹76,538.15 lakh

- c) Hei hi lo lut reng, chhuak reng an nih avangin tih fuh pawh a har a. Ni 12.2.2022-a dinhmun, Mizoram Sorkar-in a chhinchhiah dan in Mizoram-ah raltlan 24289 (singhnih sangli zahnih sawmriat pakua) an awm a ni.

SPEAKER : *Zawhbelhna* : Dr. BD Chakma, a phar hmasa zawk ka sawm e.

PU B.D. CHAKMA : Pu Speaker, ka lawm e.

Zawhbelhna : ADC pathumte funding pattern-ah hian Mizoram Consolidated Fund of the State atangin engzat nge pek an nih? Standing rules hi a awm em?

Tin, chuti anih chuan, Autonomous District Council-a funding rules hi *salary* leh *non-salary head*-ah specific takin hetiang rules hi a awm em? Salary atana chuti zat, non-salary-ah chuti zat hman ve tur tih ang chi standing rules hi a awm em? A awm lo anih chuan, khatiang Dan kha siam theih dan a awm em?

Ka zawhna chhan chu, Pu Speaker, budget zawng zawng kha salary atan ringawta hman a nih thin vang a ni e. Ka lawm e.

SPEAKER : *Zawhbelhna* : Pu KT Rokhaw ka sawm e.

PU K.T. ROKHAW : Pu Speaker, ka lawm e. *Zawhbelhna* – Burma atanga refugee Siaha District a awm mek te hi mi 9,111 tunah hian an ni a, hei hi kar hmasa a mi daih tawh kha a ni a. Tunah hian an lo luh belh zel a, singkhat an tlin tawh ka ring a. Nikum December thla khan refugee mi 3,000 vel kan nei a, chu mite ei tur funding atan sorkar-in nuai 15 Siaha DC kaltlangin min pe a. Vawiin thleng hian sum pek belh kan ni tawh lo va. Chuvang chuan, Siaha DC hi a mangang tak zet a ni tih kan CM hian min hriatpui ka duh a. Tin, refugee hovin eitur an nei tawh lo va an mangang hle a ni.

Tin, Pu speaker, ka bialah hian khaw 40 chuang kan awm a, a vai hian Burma border a ni deuh vek mai a. Refugee tunah ka bialah ringawt pawh hian mi 7,000 vel an awm a ni. Tichuan, an insakna tur silpaulin pawh hi MLA fund atangin bundle tam tak ka pe tawh a, buhfai an eitur pawh hi tam tak ka pe tawh bawk a ni. Chuvang chuan, Siaha DC atanga refugee te atana demand an lo siam hmanah khan an lo thawn tawh a,

vawiin thleng hian chhan a la ni lova. Chuvang chuan, khawngaihni an demand ang kha pawisa a tul angin min pek sak thei ang em tih ka zawt a ni e. ka lawm e.

SPEAKER : Aw le, hemi zawhna Myanmar refugee chungchang hi, Finance ni lovin Home ni awm tak a ni a. Kan thawhpui ten, “kan paih mai dawm em ni” an ti a, “A, ngawi rawh u, member te hian thahnem an ngai em a ni,” ka ti a ka pawm a ni. Chuvangin, hemi zawhna hi Home-in in Finance-ah a rawn ti a. CM a ni bawk a, a theih ang ang chhang turin tunah kan sawm e.

PU ZORAMTHANGA, CHIEF MINISTER: Pu Speaker, Member zahawm tak Pu BD Chakma zawhna, “kan funding pek danah hian standing rules kan nei em, chutilo chu kan sum neih hi hlawhah kan inhmang zo lutuk em mai a,” a ti a.

A rules hranpa hi kan nei lova. Ni e, saw lam saw, Governor pawhin a ti a, Mizoram sorkar hmaa lo titute pawhin theih tawpin an ti bawk a, keini pawhin kan ti bawk a. Sorkar hnathawk in lak tam luttuk hlawha kal vek ringawt mai, a then phei chuan an sawi danin, “97 – 98 % deuthaw hlawhah a kal a ni,” an ti a, chuvangin “recruitment lo ti tawh suh u,” tiin sorkar dinglai apiangin Aizawl lam atang hian kan theihtawpin kan han nawr a, amaherawhchu lak pun belh hi a ni char char mai a, chutah chuan keini pawhin tan kan la nasa a. A hranpain *standing rules* kan nei loh avangin, kan State-in Finance Commission kan neih recommendation ang hian kal tur a ni a, an ni hian eng angin nge recommendation an siam chhoh zel ang tih kan han en ang a, chumi ang chuan hlawh atana hman tur chi leh a danga hman tur system a recommendation an rawn siam chuan kha kha kan zui tur leh kan hman tur a ni e.

Engpawh nisela, member zahawm takin thahnemngaihna a rawn neih kha a lawmawm kan ti a, chutilo chu a mipuite tana development buaithlak khawpa hlawh ringawt maia a kal fai lutuk hi chu administrative thil a kan han beih pawha sawt thei vak chuang loa hi kan State Finance Commission-in *sanctioning instruction* leh system a rawn siam chhuah pawhin theihtawpin thurawn leh fin chhuahna pawh kan inpek tlan pawh kha a tha khawp ang. Chu chu ka chhanna ni sela.

Tin, chu lovah chuan member zahawm tak Pu Rokhaw rawn zawhna kha, ni e, refugee hi an pung zel mai si a, a bik takin tun hnaiah Chin Hills atanga refugee rawn kal hi an tam chak zual a. Member-te information atan, kan lo hriat dan chuan Myanmar military sorkar hian engatinge hmun dang aia Chin Hills-ah hian inkah buaina leh ni dang zawng zawng aia tun hnaia a tam tak bik, hetah hian tunge kan rawn ang a, engtin nge hei hi an tihtawp theih ang tih, in aiawh Myanmar ami sawi dan takah, an ethnic group chi hrang hrang keini sawi danin, ‘underground group’ chi hrang hrang te kha *Lypidawh*-ah a ko khawm a, chuta an kohkhawmte zingah Chin Hills lam atanga kan

aiawhte pawh an kal a, an mangan pui ve viau a. Chin Hills atanga in kahna tam avanga hetiang buaina lo lian hi, chumi avang chuan Member zahawm tak Pu Rokhaw sawi ang khan, hetah refugee an lo thleng thla ruih ruih mai a, hemi thuah chuan open takin India sorkar-ah “pui rawh u,” tiin keini pawhin kan zuk nawr a. Amaherawhchu an ni tan *signatory* nihlohna lai subject te anih vangin direct-a an puih a rem lova. Keini erawh chu, alo mikhualtu, a taka tuartu kan nih avangin kan theih tawpin sorkar, NGO, Kohhran leh mipui zawng zawng nen, zirlai nen an lo phok tan a, a fak pawh min fak a, Mizoram chungah lawmthu Myanmar refugee leh an thiante ho atang hian kan dawng mawlh mawlh a ni ber a.

Amaherawhchu, ala tawh lo hle a, India sorkar-in keini min tanpui a, keiniin refugee kan tanpui ve thung a, khati khan direct-in India sorkar-in a tih theihloh avangin khati khan an han ti a. Tunah hian keini pawhin tun hnaia kan puihna te kha la dawng kimlo deuhte an awm a, khang kha a chhan chu kan han pek turte kha khawiah chiah nge an awm, camp hrang hrang a kalte, Aizawl lama lo zinte, khawi emawa zinte an awm avangin pek kimloh leh pek kan duh te pawh an la awm a. Tin, tunah hian DC leh a committee kan siam te, khang hnenah khan pawisa kan pe zel a, mangang lo leh harsa lova an awmna turin theih tawpin hma kan la a. Tin, harsatna bik a awm chuan vai tan tlang ila, a bialtu MLA-te leh midang pawhin direct-in keimah pawh min rawn hrilh thin ula, telephone pawhin han ti mai ula, a nih loh leh a remchang ang angin kan lo ngaihtuah zel ang a. Eitur a ni emaw, thil dangah a ni emaw theih tawpin tan kan lo la ang a. India sorkar-ah pawh, “khai, Mizoram sorkar min pui teh u, khai le, kan puih let theih nan tiin tunah hian a batch hnihna pawh kan dil mek a, tichuan chung te pawh chu kan pek theih dan tur kawng te pawh a inhawng turah kan ngai a, tichuan, phok tan ila, a mimal tak pawhin min rawn hrilh zel ula, hma kan lo la zel ang e, tih hi ka chhanna a ni e, Pu Speaker.

SPEAKER : *Starred Question* No. 64, zawt turin Dr. ZR Thiamsanga, member zahawm tak ka sawm e. Awle, dingin rawn ti mai rawh khawngaihtakin. amah kha authorize mai rawh.

DR. ZR. THIAM SANGA : Pu Speaker, Member zahawmtak Pu Zothantluanga'n hei hi rawn zawt se.

SPEAKER : Awle, an ni hi zawhna neitu ve ve an ni a, member zahawm tak Pu Zothantluanga ka sawm e.

PU ZOTHANTLUANGA : Pu Speaker, ka lawm e.

Ka zawhna *Starred Question* No. 64, hon. Minister for Health & Family Welfare chhana tana ka zawhna chu –

- a) ZMC a VRDL ah *Genomic Sequencing* tih tan a ni taw hem? Tih tan ala nih loh chuan, engnge a chhan?
- b) Mizoram Covid vaccine 1st dose leh 2nd dose la tawh zawng zawng engzat nge? A percentage nen min hrilh theih em?
- c) Vaccine pek kawngah harsatna tawh a awm em? A awm chuan, engnge a chhan?

SPEAKER : Chhang turin a changtu Minister zahawmtak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, Member zahawm tak tak te pahnih Dr. ZR Thiamsanga leh Pu Zothantluanga te zawhna chhana chu –

- a) ZMC-a Genomic Sequencing Laboratory hi ZMC/VRDL-ah bun fel tawh a ni. He khawl hi a thlawnin PATH (USA) ina DoNER hote min rawn pek a ni.

Genome Sequencing hi tih tan ala ni lova, a chhan chu *test run/trial run* tum 3 neih tawh a ni a, ‘REAGEN kit’ kan ti mai a, ava barh luh tur test kit a kha ala dik tawkloh avangin ala hlawhtling lo deuh a. Tunah hian REAGEN kit thar leh technical specialist te lo thleng mai tura beisei a ni. Helaiah hian sawi belh hlek tur pawh nakinah chuan a awm ka ring.

- b) Thla hmasa ni 16 February thlenga kan data a ni tih hi ka sawi hmasa duh a, chuta kan chhana chu hei hi a ni -

1st dose - 8,04,336 (96.41 %),

2nd dose – 6,39,364 (79.49 %)

Tichuan, 1st dose la tawh atanga chhutin 76.49% target atanga chhuta hei hi tih ni. ‘Head-count’ kan ti mai a, hei hi kum 18 leh a chunglam electoral roll 2020 base-a tih a ni.

- c) Vaccine pek kawngah harsatna hmun thenkhatah a awm a, chungte chu:
 - 1) Hmun kilkhawr motor luh theihlohna hmunah vaccine chak takin a pek theih loh.
 - 2) Network a thatloh avangin hmun thenkhatah harsatna a awm. Hei hi a chhan chu, computer te, mobile phone hmang ten hna kan thawk nasat tawh vang a ni.
 - 3) Sakhuana avang leh social media-a thudik tawk lo thehdarh avangin vaccine la duhlo an awm thin bawk a ni.

SPEAKER : *Zawhbelhna* : Pu Zodintluanga Ralte ka sawm e.

PU ZODINTLUANGA RALTE: Pu Speaker, USA hi kan Health Department nen hian an inthlung fuh lo a ni ang, RTPCR lamah te kan buai deuh nuai a.

Zawhbelhna: 1) Healthcare tunah hian kan kalpui mek a, May thla thleng hawn a ni a. Helaiah hian Pu Speaker, kan healthcare bul tan hi December atanga April thla angah hian kalpui dan a awm thei em? A chhan chu tunah pawh kan han kalpui a, May thla a han thlen chuan a tak taka hman theih hun chu June, July ah a ni a. Khatah khan healthcare khan nakum April thla thleng bak a cover leh tawh si lova. (**Speaker:** ‘April – April’ i ti zawk a ni lo maw, ‘December’ ni lovin?) ‘April – April’ a nih avangin April thla thleng bak kha a cover leh tawh si lova, mirethei leh harsa zawk ten an sum kha kum chanve deuhthaw chung an loss tlat mai a ni.

Chuvang chuan healthcare an tih leh dawn hian a process hi December vel atanga tana, April-ah chuan engkim final tur hian kan Minister hian hma min lak sak thei ang em? A chhan chu, tuna a ti sa te pawh vaibelchhe tam tak an ba a, an pe hleithei lo a ni a, thla ruk chuang la thei lova an awm ringawt kha miretheite rawkna a ni tih kha ka rawn sawi duh a ni.

2) Kum 2020-a Finance-in a audit thut tuma Finance-in Financial Rules leh Accounting Procedure fel lo a rawn hmuhchhuah kha, Finance duhdan ang khan a hnulamah khan an kal zel em tih ka rawn zawt e.

SPEAKER : *Zawhbelhna* : Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e.

Zawhbelhna: 1) Lawngpuighat hi ka bial, a nihna takah chuan Pu BD Chakma bial a ni a, Tuichawng kama awm a ni a. Helaiah hian sorkar hmasa khan NRHM hnuai atangin Damdawiin sak hna a thawk a. Sawlai saw kan mamawhna a sang khawp mai a, Bungtlang te, Chawngte te pan theilo damlo tam tak an awm a. Kha kha sak zawh a ni tawh em? Sak zawk ni se, engtikah nge a hawn theih ang? Kan nghakhlel hle a ni, bial mipui ten.

2) Tun thleng hian healthcare hi a hma pawhin an sawi a, ka bialte phei chu an khawngaihthlak khawp mai a, pawisa an han pe a, an neih bak te pawh kan han tanpui ve lawp lawp a. An bill a han tang zui lehngal a, an khawngaihthlak khawp mai a. Beiseiawm takin helaiah ACDP atanga Mizoram Healthcare pawisa te pawh nuai hnih chhungkaw tinin bill theih a nih tur thu te kan ngaithla a. Amaherawhchu, helai House-a kan sawi leh a tak ram inmil lo thin hi engtikah nge a tawp ang? Tunah engzat nge ba awma, ba hi engtikah nge clear a nih theih ang? Hei, ziaka zawhna chhanna ah phei

chuan, kum hmasa a mi pawh khan *pending* a la awm a ni awm e. Khangte kha a dik reng em?

SPEAKER : A zawhna neitute kha in pharin ka hria a, in phar em? Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. Kan Health Minister zahawm tak chhan atan –

Zawhbelhna: Lunglei a RTPCR khawl installation tih a nih hnu in ka bial Zotlang Tourist Lodge-ah sawn dah a ni a. Engzat nge test nitin kalpui thin a nih? Tin, saw hmunah sawn Member zahawm tak Pu Zodintluanga Ralte ‘n a khawl ava dah bak hi dahbelh a awm em tih ka zawt e.

SPEAKER : A kar kik hlawm viau nain a theih ang ang chhang turin Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, tlemin a in karkik deuh hlek a kan member zahawm tak tak ten an zawhbelhna kha. USA atanga kan thil lak kha thil kan hresual deuh a nih ka ring a, 2020 daih tawh khan ka hriatsual loh chuan 1st July-ah ZMC-ah tha takin tun thlengin a la function tih kha ka sawi duh a.

Pu Mama, MLA zahawm tak zawhna ‘healthcare’ tih lai kha a pawimawh khawp mai a ni. Kan Governing Council hi kan hon. Chief Minister Chairman-na hnuaiia thu rel thin kan ni a, kan ngaihtuah ngun ve khawp mai a. Eng pawh ni sela, helaiah hian harsatna pawh kan tawk nasa angreng viau mai a. Tin, bill chungchanga Member zahawm tak Pu Ngunlianbunga zawhna pawh kha, kang khan a kawc chho vek bawc a.

Engpawh ni sela, DRDL lab leh Genome Sequencing lam zawhna a nih avangin, a figure lam chi kha han chhan mai a harsa a, ziakin ka pe thei mai tur che u in ka ring a. Kan bill lak theihloh te kha eng emaw chen harsatna tunah hian kan tawc a. Tunah hian Finance leh Planning te pawhin theihtawp an chhuah mek a. Amaherawhchu, rin ai hian a tam tham a, crore 40, crore 50 lawih te ngai a nih avangin vawilehkhatah thil han tlak duak duak a harsa a nih ka ring deuh a. Chu chu khalai bikah khan ka chhanna ni mai ta sela.

Tin, Pu Mama zawhna, Financial Rules leh Procedure-a kan kalphung audit a nih chungchang pawh kha zawhna chhan tawhna kha a awm mai thei a, nakinah kan la hmu maiin ka ring a, kha kha chu heta tanga chhan kha a harsa a. Engpawh ni sela, regular

takin a khat tawka department dangte pawhin hei hi kan tih zeuh zeuh chuan kawng lehlahmah chuan kan inthlahdah loh nan hian a that ve riauna a awm a ni.

Lawngpui Ghat chungchang kha a pawimawh khawp mai a. Tunah hian PHC kan function theih lohna chhan ber chu doctor indaih lohna nasa tak kan tawk a ni. Lak theihna tur atan 16 bawr vel phalna kan neih mek laiin, han tih thut dawn khan a harsa khawp mai a, MPSC kaltlang a lak te a lo ngai a, a process hi procedure te kan zawm ve a ngai a. Chu chuan Lawngpui Ghat function-na tur te, Tuipuibari kan sak zawh tawhna kan function-na tur te kha a huam a ni. Tunah pawh hian PHC thenkhatah doctor, a bik takin MBBS ngat dah theih lohna hi kan nei nual a. Hei hi kan House Member zahawm tak tak ten min lo hriatsak ka duh a.

Healthcare Bill pek theih hun tur kha chu sawi a harsa deuh hlekin ka ring a. Budget Session kan nei meka kan budget kalchho tur te atangin ngaihtuahna la seng turah ngai ta ila.

Helai Tourist Lodge-ah hian Pu Zodintluanga, Member zahawm takin RTPCR khawl a rawn donate kan dah bakah, Lunglei lama mi ho kha hetah hian kan sawn chho hrim hrim a, tunah hian RTPCR khawl hi pakhat mai ni lovin pali kan nei a ni.

Amaherawhchu, nitina test neih zat chiah kha ka sawi mai thei lova. A chang hi chuan a tlem thei khawp mai a, 20 te, 30 te a ni a. A chang chuan tam chang kha a awm ve tho a. Covid chu kan hriat angin tam chang a awm a, tlem chang a awm a. Chu chu ka chhanna ni ta mai sela a tha awm e.

PU ZODINTLUANGA RALTE: Pu Speaker, *Point of Order* - Nichina ka zawhna Healthcare process hi nakum atang chuan April thlaa zo turin hma min lak sak thei ang em tih kha, he House hi min assure thei ang em? A nih loh chuan May, June vela an tih fel chuan thla 4, thla 5 kha pawisa chawi si bill theihloh kha awm tlat mai a, kha lai kha min han House min *assure* hram sela.

DR. R. LALTHANGLIANA, MINISTER: Healthcare kan kalpuina kawngah hian NGO lian tak tak representative-te kan nei a. Tin, department hrang hrang member an ni teuh mai a, hon. Chief Minister chairman-na hnuai a nih avangin meeting te chu kan la nei ngei turah ka ngai a. Tuna kan member zahawm takten an han sawi kha kan lo hre dawn nia, governing council-a ngaihtuah chi a ni tlat mai a, agenda hi. Kha kha ka chhanna, a lungawithlak tho turah ngai teh ang. A ngaihtuahtu committee lian kha a awm a ni tih kha kan lo hre dawn nia.

VRDL lam sei hi ‘Viral Research & Diagnostic Laboratory’ tihna a ni mai a, ICMR atanga a thlawna kan hmuh kha a ni a, ZMC-ah kan dah a. Hei hi a danglamna, RTPCR khawl nen a inan lohna chu, ‘viral culture facility’ kan ti a sap tawngin a nei a, sequencing kha a tih theih ve bawk a. ‘Antibody’ kan tih te, ‘antigen’ kan han tih ang chi a test te kha a danglamna a ni. Hei hi zawhnaa awm si a, amaherawh chu chipchiara kan hriat kha a tha a.

Tin, ‘genomic sequencing’ tih lai hi Pu Speaker, tlema sawifiah deuh ngai a awm a.

Hei hi a vanneih thlak a. PAT company, organization lian deuh mai hian a thlawnin min rawn pe nawlh mai a. Hetah hian a pawimawh lai chu, tunah entirnan, Covid chi dang dang tunah ‘Omicron’ an tih te pawh a lo kal ta a, khami kan han tih theihna tur atan khan genome sequencing hi kan han neih ve a tulna lai te pawh a ni a, kha kha kan hriat a pawimawh viauin ka hria a. Chuvang chuan, tunah kan la ti thei chiah lo chungin, National Virology Centre lian deuh mai Pune-ah, India rama kan neih chhunah khuan training turin mi 2 pawh kan zuk tir thla tawh a, an lo kir tawh a nimin lamah khan. Chumi bakah chuan, helaiah hian phalna kan neih a ngai a, tunah Department of Biotechnology, Govt. of India-ah tunah phalna kan dil a, kan hmuh thuai kan beisei a. Engpawh nisela, tukin zinga ka zawh kual chuan, thla khat chung te hi chuan kan function thei turah kan beisei tih kha ka sawi belh lawk a nih chu. Ka lawm e.

SPEAKER : *Starred Question* No. 65, zawt turin member zahawm tak Pu Lalduhoma ka sawm e.

PU LALDUHOMA : Pu Speaker, ka zawhna chu-

- a) Kum 2020-2021 chhung atana Finance Commission atanga Rural Local Bodies tana:-
 - i) Tied-fund dawn ni leh release ni?
 - ii) Untied-fund dawn ni leh release ni?
- b) Kum 2021-2022 chhung atana Finance Commission atanga Rural Local Bodies tana:-
 - i) Tied Fund dawn ni leh release ni?
 - ii) Untied Fund dawn ni leh release ni?
- c) Heng Grant-in-Aids te hi State Sorkar-in a dawn atanga ni 10 chhungin RLB-te hnenah pek tur tih leh, ni sawm chhunga release loh chuan a pung nen pek tur tih hi zawm a ni em?

SPEAKER : Chhang turin Finance changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Duhoma zawhna chhanna (a & b) chu -

- i) 1. Tied Fund 1st installment dawn ni - 17.06.2020;
Release ni - 27.11.2020.
2. Tied Fund 2nd installment dawn ni - 31.03.2021;
Release ni - 26.04.2021.
3. Tied Fund 1st installment dawn ni - 27.08.2021;
Release ni - Release a la ni lo.
- ii) 1. Untied Fund 1st installment dawn ni - 15.07.2020;
Release ni - 19.11.2020.
2. Untied Fund 2nd installment dawn ni - 31.03.2021;
Release ni - 24.06.2021;
3. Untied Fund 1st installment dawn ni - 10.05.2021;
Release ni - 13.07.2021;
4. Untied Fund 2nd installment - dawn a la ni lo.
Release ni - Nil
- c) Grant-in-Aid te hi ni 10 chhunga pek chhuah hman loh a nih hian a pung nen pek chhuah thin a ni a. A rate chhutna pangngai ang khan, ni 10 chhunga kan pek chhuah hman loh chuan a pung nen khan pek chhuah a ni a, a pung erawh chu hmun danga kal lovin, a dawngtu turte hnenah khan a kal tho a, an hlawk deuh hlek thin a. Kha kha kan lo hriat atan ka han sawi duh bawk a. Chuvangin, Rural Local Bodies-ten an pawisa dawn kha engmah hmun dangah kan pek chhuah hman loh pawhin a pung a kha kal chuang lovin anmahni tan a hlawk a. Heng kan sum dinhmun hi Delhi lam atangin *share of taxes* leh thil dangte an rawn release hun hi a tlai deuh thin avangin, a cash hi kan duh angin kan pe chhuak nghal zung zung thei lova, chuvang chu a ni e.

SPEAKER : *Zawhna & Chhanna* hun a tawp a, chhang zo law law se kan ti em? Awle, chhang zo rawh le.

DR. R. LALTHANGLIANA, MINISTER: Pu Speaker, ka chhang zo ve chiah e.

SPEAKER : Awle, tunah chuan *Laying of Paper* -ah kan kal ang a, kan Chief Minister zahawm tak Pu Zoramthanga'n heng te hi House dawhkanah rawn lay se -

- i) Report of the Comptroller Audit of Select District Hospitals in Mizoram for the year ended 31 March, 2019;

- ii) Report of the Comptroller and Auditor General of India on Social, General, Economic and Revenue Sectors for the year ended 31 March, 2019;
- iii) State Finances Audit Report of the Comptroller and Auditor General of India for the year ended 31 March, 2020;
- iv) The Second Annual Report 2020-2021 of Mizoram Lokayukta.

PU ZORAMTHANGA, CHIEF MINISTER: Pu Speaker, i rem tihna leh House remtihna in hnegte hi House dawhkanah hian ka rawn pharh e -

- i) Report of the Comptroller Audit of Select District Hospitals in Mizoram for the year ended 31 March, 2019;
- ii) Report of the Comptroller and Auditor General of India on Social, General, Economic and Revenue Sectors for the year ended 31st March, 2019;
- iii) State Finances Audit Report of the Comptroller and Auditor General of India for the year ended 31 March, 2020;
- iv) The Second Annual Report 2020-2021 of Mizoram Lokayukta.

SPEAKER : A copy kha han sem ula. Kan chang kim em? Awle.

A dawt lehah kan kal ang a, Pu Lalchamliaana, Minister zahawm takin The Mizoram Private Security Agencies (Private Security to Cash Transportation Activities) Rules, 2022 hi House dawhkanah rawn *lay* turin ka sawm e.

PU LALCHAMLIANA, MINISTER: Pu Speaker, i phalna leh he House zahawm tak remtihna, The Mizoram Private Security Agencies (Private Security to Cash Transportation Activities) Rules, 2022 hi he House zahawm takah hian ka rawn pulut e.

SPEAKER : A copy kha han sem leh ula. Kan chang kim em? Kan chang kim chuan, a dawt leh ah kan kal ang a.

Pu Vanlalhlana, Chairman, Public Accounts Committee in Statement of Action Taken on the Further Recommendation of Public Accounts Committee contained in the 8th Action Taken Report, 2020 relating to Labour, Employment, Skill Development & Entrepreneurship Department hi House dawhkanah rawn *lay* se, ka sawm e.

PU VANLALHLANA : Pu Speaker, i phalna leh he House zahawm tak remtihna, Statement of Action Taken on the Further Recommendation of Public Accounts Committee contained in the 8th Action Taken Report, 2020 relating to Labour, Employment, Skill Development & Entrepreneurship Department hi he House zahawm takah hian ka rawn *lay* e.

SPEAKER : A copy kha han sem leh rawh u le. Kan chang kim maw? Awle.

Legislative Business-ah kan kal ang a. Vawiin hian Government Bill (Sorkar Bill) sawiho tur kan nei a. Kn hriatlan angin Bill hi a copy kan rawn sem tawh che u a. The Mizoram Fisheries (Second Amendment Bill), 2022 hi a Bill neitu, Minister zahawm tak Pu K. Lalrinliana'n House-ah introduce phalna rawn dil se, ka sawm e.

PU K. LALRINLIANA, MINISTER: Pu Speaker, The Mizoram Fisheries (Second Amendment Bill), 2022 hi introduce ka rawn dil e.

SPEAKER : A Bill neitu Minister zahawm takin introduce a rawn dil a, kan rem ti em, kan phal em? Aw le, kan phal chuan, tunah introduce se la, sawiho turin move nghal bawk se.

PU K. LALRINLIANA, MINISTER: Pu Speaker, ka lawm e. The Mizoram Fisheries (Second Amendment Bill), 2022 amendment kan rawn dilna tlangpui kan sawi ang a. (SPEAKER: Introduce rawn dil la.) Ka rawn introduce e. (**Speaker:** Rawn move nghal rawh le.)

The Mizoram Fisheries Act, 2002, kan hman hma hian Lushai Hills Autonomous District Fisheries Act, 1935 hi a lo awm tawh a. Chu chu, Mizoram-a Fisheries Act, 2002 hi ni 20.10.2005 khan passed niin published a ni a. Tichuan, he Dan-ah hian a vaiin Section 16 leh Schedule a awm a, Schedule-ah hian list 6 a awm bawk a ni. Tin, The Mizoram Fisheries Act, 2002 hi tih changtlung belh a ngaih avangin lo siamthat tawh a ni nghe nghe a, the Mizoram Fisheries Amendment Act, 2016 hi ni 17.1.2017 khan passed niin published a ni tawh a. Hetah hian Section 7 siamthat a lo ni tawh a. Tin, kan Dan hmanlai tuna The Mizoram Fisheries Act, 2002 siamthat hi tul niin hriat leh a ni a. Tuna kan proposed amendment hian scope leh subject zau zawk huamin, awmze nei zawk leh a hlawk thei zawng a kalpuiin sangha leh tuia cheng nungchate man dan tha lo leh diklo lai siamthaa venhim leh humhalh hawi zawnga her rema fisheries sector hmasawn theihna lampang hawi a rawtna hi siam a ni.

Pu Speaker, he proposed amendment bill hi, "The Mizoram Fisheries Second Amendment Act, 2022" tih a ni a. Tunah hian hetah hian avaiin section 7 leh schedule list sl. no.3-na hi siamthat tura kan rawn dil a ni a. Section 1, "Mizoram Fisheries Act, 2002" tih kha, "The Mizoram Fisheries Second Amendment Act, 2022" tih a lo ni tawh ang a. Tin, Section 2 (c)-ah khan 'fish' sawifiahna, "Fish includes fish fin, shellfish and turtle" tih zawhah khan "and any other aquatic organisms of economic and ecological importance" tih belh kan rawn rawt a. Tin, (d)-na ah khan "Fisheries Officer means

Director of Fisheries and includes any officer” ‘officer’ tih leh ‘or’ inkarah khan “serving under the department of Fisheries” tih belh ila tih kan rawn rawt tel bawk a.

Tin, (g)-na ah khan, “fix in the soil” tiha ‘soil’ tih aiah khan a chian zawk nan ‘water/river-bed’ tih dah zawk ila tiin thlak kan rawn rawt bawk a. Tin, Section 4 (1)-ah khan a sentence tawpah, “Power as the Fisheries warden in its district to be headed by the Chief Fisheries Warden at the state level” tih kha kan rawn rawt dan a ni a.

Tuna lehkhabu kan rawn semah khan, ‘Fisheries Chief leh Fisheries Warden’ tih turah khan ‘Fisheries’ tih kha kan lo chhut hmaih palh a ni a, Pu Speaker, in hriatthiamna kan rawn ngen a nih chu. Tin, Section 4 (4)-naah khan “Not withstanding provided in sub-section (1) No police officer” tih a ‘police’ leh ‘not below the rank of Sub-Inspector of Police or the’ tiha ‘Sub-Inspector of Police or the’ tih lai kha paihin ‘No officer below the rank of’ tia thlak ni se tih kha kan rawn rawt bawk a.

Tin, Section 6 (1), (c)-a ‘Electrical’ leh ‘Mechanical’ tih inkarah khan ‘or’ tih dah ni se tih kan rawt bawk a. Tin, Section 6 (1) (e) sub (7)-ah khan ‘catching’ tih zawhah khan ‘catching, vending’ tih belh ila. Tin, a sentence tawpah sentence hran, ‘the government may notification specify a permissible size or weight for a species and or group of species’ tih dahbelh ila tih kan rawn rawt bawk a ni.

Section 6 (2)-ah khan convict-te hremna chungchangah ‘one month’ tih kha ‘two months’ tiin thlak ta ila. Tin, a extend theih chin ‘three months’ tih kha ‘four months’ ah tisang deuh ila kan ti a. Tin, *fine* tirna tur atan khan ‘₹5,000’ tih aiah ‘₹8,000’ tiin thlak ila tih kha kan rawn rawtna a ni bawk a ni.

Section 6 (4)-naah khan a hremna ‘15 days’ tih inziakah khan a aiah ‘1 month’ tiin thlak ila kan ti a, extend theih chin ‘30 days’ tih kha ‘2 months’ tiin thlak bawk ila kan ti a. Tin, pawisa chawi tur ‘₹2,500’ tih aiah khan ‘₹4,000’ tiin thlak ta bawk ila. Chubakah, ‘board’ tih zawhah khan ‘any under-sized species of fish shall be able to be confiscated by the authority’ tih belh kan rawn rawt bawk a ni.

Section 8 (1)-ah khan ‘any police officer not below the rank of Sub-Inspector of Police’ tih lai kha ‘Sub-Inspector of Police’ tiha thlak kan lo dil tawh ang bawk khan, ‘Head Constable or any Forest Officer not below the rank of Forester’ tiin thlak kan rawn dil bawk a ni.

Tin, Pu Speaker, Section 9 sentence tawpa ‘Sub-Inspector of Police’ tih kha thlak kan rawn dil tawh ang bawk khan, ‘Head Constable or Forest Officer not below the rank

of Forester’ tia thlak ni se tih kan rawn rawt bawk a. Section 10 (1) tawpa ‘not less than ₹1,000’ tih kha ‘not less than ₹2000’ tiin thlak kan rawn rawt tel bawk a ni.

Tin, sl.no.3-a ‘fishing or attempting to fish with any method other than the prescribed method’ tiha thlak hlawk kan rawn rawt bawk a, hetiang hian thlak ila kan ti a, ‘catching, vending or sell of fishes below notified permissible size’ tiin.

Pu Speaker, he proposed amendment hian additional expenditure a keng tel lova, draft bill hi Law & Judicial Department-in ni 16.12.2021 khan legal vetting a pe tawh a. Tin, Council of Minister-in ni 1.2.2022 thukhawm khan min lo pawmpui tawh bawk a. Chuvangin, hei kan ramah tur hmanga sangha hraite, bomb hmang a sangha hraite, a note leh a puite nen lama kan man thin leh kan tihrem thin avang hian kan ram luidungah te hian sangha inthlahpunna hi a tlem ta em em a, a rem hma ngei hian, tuna awlsam zawk a heng dan lova nungchate tihchereu a nih thin tihrem a nih theih nan, ‘The Mizoram Fisheries Second Amendment Bill, 2022’ hi kan House zahawm takah hian min pass pui turin ka rawn chhawpchuak e. Ka lawm e.

SPEAKER : Aw le, a changtu Minister, a Bill neitu Minister zahawm takin a Bill neih chhante a rawn sawi a, hrilhfiyah tur awmte a rawn hrilhfiyah ta a. Kan sawiho ang a, mi pakhatat minute engzat nge kan inpek leh ang le? Awle, minute 5 kan ti ang a, sawi tur nei zual deuhthe in awm chuan kan inbelh dawn nia aw. Tunge han sawi ang le? Aw le, Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e. A lawmawm ka ti a, Mizoram Fisheries Second Amendment Bill, 2022 a rawn lut a, Minister zahawm tak Fisheries changtuin a putluh chhante a rawn sawi a, a lawmawm khawp mai. Sangha man chungchangah hian kan inzirtir a ngai khawp mai a.

Session hmasa lamah khan ka hriat sual loh chuan hemi ‘Aite’ hi chu chakai man chungchangah hian, ‘a size’ tih te hian specification siam theih ni se, tih kha kha ka lo sawi ve tawh a. tunah pawh permissible size a rawn lang a, tin, pawisa an chawi tur zat te, a tan theih hun te pawh an tithui a.

Tin, Dan lova sangha man ho, a man thei tua kha an tizau a, SI (Sub-Inspector) atangin Head Constable te an tizau a, a man theitu tur kha an tam ta niin a hriat a, a lawmawm khawp mai. Amaherawhchu, Section 10 Schedule tawp lama Schedule ‘fishing or attempting to fish with any method other than the prescribed method’ tih kha la awm se ka duh khawp mai a, ‘hemi size aia te hi man tur a ni lo’ tih chauh kha a ni tawh a, a prescribed method, sangha bomb te a ni ang chu, khatiang te kha a rules lam, schedule-ah kha chuan la awm ta tho se, compounding kha chu a ni naa. Hei hi prescribe

method, ‘hetiang lo deuh hian man thei a ni lo’ tih kha la awm thei se chu ka duh a. Tunah hi chuan kha kha paiha ‘hemi aia *te* hi chu man thei a ni tawh lo e’ tih te a nih avang khan, la awm tel se tih kha thahnem ngaihna rilruah khan a la awm a.

Tin, hmanni khan Pu Speaker, i ding lama mi te kha an fir viau mai a, inzirna pawh ka ngah khawp mai, ka inzir tam khawp mai a. Hei, ‘72nd Republic of the year’ an lo la ti hram mai a, law *vetting* tawh si kha, Law Minister zahawm tak khan ‘73rd’ a rawn ti a, chu chu thlak ngai niin ka hria a. Tin a thuah hian, nichina pawh khan ‘fishery’ ti kha chu a changtu Minister-in a rawn sawi tawh a. Amendment Section 6 ah khan, “The word ‘or’ shall be inserted between the words” a ti a, no. 1-ah khan. Kan Minister zahawm tak pakhat khan ‘a coma nen chen hian thlak danglam theih a ni silova,’ a rawn ti a, min han chhinchhiah sak sela ka duh khawp mai.

Hei, ‘electrical and mechanical’ tihah khan a tawntirhah khan *inverted coma* pawh kha a lo awm lova, amaherawhchu khatiangte nen khan kan pass tel zel turah ngai ila.

Tin, Amendment section 6, no. 2-ah khan “in sub-Clause 7 (e) of clause Sub-Section (1), the word and symbol ‘vending’ shall be inserted after the word ‘catching’ tih a ni a, han insert ta ila, ‘*coma*’ kha a awm si lova, ‘catching vending’ tih kha a ni nghal dawn a, ‘vending’ hmaah khan ‘*coma*’ kha dah ni ta zauh se la, tih kha rilruah a lang a. Hei, a thenah ‘*double inverted coma*’ a awm a, a thenah ‘*single*’-in a awm a, sawi tur chu a tam a, ‘chuti chuan tih tur’ tih pawh chu a awm chuang lova. Amaherawhchu, hmannaah kan Minister, Law changtu ni lem lo a ni a, Minister dang pakhatin a ‘*coma*’ te thleng khan min rawn ngaipawmawh pui em em a, alo chhinchhiah duh takin thenkhat ka han tarlang a ni a. A ‘Act’ hi tha ka ti a, a bill hi kan tangkaipui tur, kan changkanna tur thil a ni a, tin, nungcha humhahna tur thilah pawh hma kan sawnna tur thil a ni.

Tunhnaiah kawng laih a ni a, lui a hnawh a, thil tam tak, *aquatic life* kha a tichhia niin a hriat a, heng lamah pawh hian hmalak deuh ni ta sela tih kha ka rawt duh a ni e. Ka lawm e.

SPEAKER : Tunge sawi leh ang? Wind up turin ka sawm mai dawn em ni? Number ka chhiar mai dawn em ni ang?

Awle, kha in hmu tlang a, in lo dawng tawh a. Sawi tur in awmlo a nih chuan Minister kan sawm mai ang a. Tuna Member zahawm tak rawn sawi te pawh kha wind up-in, a duh leh rawn sawifiah dan te a awm chuan sawifiah bawk se, tin, pass rawn dil nghal se. Tunah Minister zahawm tak Pu K. Lalrinliana ka sawm e.

PU K. LALRINLIANA, MINITER: Pu Speaker, ka lawm e. Mizoram Fisheries 2nd Amendment Bill ka han putluh hi Speaker zahawm takin sawihona hun a hawng a. Dr. Vanlalhlana'n a ngaih pawimawh, 'hengte hi chu la paih loh ni se' tih, a schedule ami 'prescribed method tih te pawh hi la awm se' a tih te pawh kha a dik tho mai a. 'notified permissible size' a tih khan a tawh turah kan han ngai hrih deuh chu a ni a, helai hi kan han kalpui khan.

Tin, Section 6-a "catching 'coma' vending" tiha kha nichin ka sawi lai khan a lo ngaithla fuh lo a ni mai thei a, ka sawi telin ka hria a. "catching 'coma' vending" tih lai a kha belh ni se tih kha a rawn ngai pawimawh a, a tha khawp mai a. A dang a sawi 'coma' tih te leh thildang han hmaih palh siam that ngai ang chi kha chu nichina kan sawi tawh ang khan, 'fisheries warden' tih turah 'fisheries' lo tih palh a a awm tih kha ka sawi hmasak ang khan, 'chief warden' ti ringawt lovin 'chief fisheries warden' tih kha kan lo chhut hmaih palh a ni a.

A tlangpui thuin, kan sawi tawh ang khan he Dan hi thahnem min ngaihpuina a rawn sawi lang a, lawmawm ka ti a. Tin, kan luidung nungcha humhalh hi a ngai em em mai a, Sangha, kaikuang, chakai, chengkawl, tuikep leh tui nungcha reng reng, a note nen lam tiral lo zawnga awmze neia kan kalpui a hun em em tawh mai a. Kum 20 kal ta keini atang ringawt pawh han chhutin 20 kal ta te kha chuan insuk paha lente dengin nuho pawhin an hawn thei a ni. Chutiang chu kan lo tawn tawh a ni a, tunah pawh hian kan humhalh that chuan ei tur kan awlsam phah ang a, phai atanga sangha lakluh hi a la tam em em mai a, chuvang chuan hengte pawh hi a lo tlem theihna atan kan luidunga sanghate kan humhalh chuan ei turah kan hnianghnar phah ang a, ei tur tam tak kan neihna a ni dawn a.

Vawiinniah Pu Speaker, he kan proposed amendment bill hi khawngaih takin he House zahawm tak hian min pass sak theih se tih ka rawn ngen a ni e. Ka lawm e.

SPEAKER : Awle, Minister zahawm tak Pu K. Lalrinliana'n, "The Mizoram Fisheries 2nd Amendment Bill, 2022" chu House pass pui turin a rawn dil ta a. Kan buk ang a, remti apiangin, 'remti' ti rawh ule. Remti lo kan awm em? Remti lo kan awm chuan, 'remti lo' ti rawh ule.

Awle, "The Mizoram Fisheries (Second Amendment) Bill, 2022" chu House-in lungrual takin a pass ta a ni. (**Pu K. Lalrinliana, Minister:** Pu Speaker, ka lawm e.) Awle, *Financial Business*-ah kan kal ang a, Chief Minister zahawm tak, Finance changtu ni bawh Pu Zoramthanga'n Ni 24 February, 2022 (Ningani)-a budget a pharh tak, "The Annual Budget for the year, 2022 - 2023" kha sawihona *General discussion* kan nei ang a. Memberte khan a hma ang bawkin minute 10 kha ni leh turah ka han ngai

a, tha kan ti em? Tunge han sawi hmasa ang le? Member zahawm tak Pu L. Thangmawia ilo sawm ang.

PU L. THANGMAWIA : Vawiin hi zofate history-a reh tawh lo tur, zalenna pumhlum nei tura *Zalenna* an lo puan ni, March Ni 1 alo ni reng mai a, Pu Speaker, i remtihhain hemi pual hian hun tawi te budget chungchang ka sawi hmain kam hnih khat neih ka duh a.

Kan tum tak thleng lo mah ila kohhrante, mipui leh zirleipawl ten, “ram chhuakin sai, sakhi pawh rawn hawn ula” an tih tak avangin ti hian vawiinah *Remna leh Muanna* tluantling neiin kan awm chho a. Engpawh nise Pu Speaker, khami zalenna soal laia zalenna soal tura inpete chhuah dan hian ka rilru a hneh em em mai a. Vawiin nia politics-a kan luhna chhan tam takte ka han thlir a, eng emaw beisei vang emaw, MLA nih duh vang te pawh a ni maithei, kan dem lo e. Khatih lai kha chuan he hnam tana thawk tura inpete khan, “engtik niah nge ral hmaah kan thih ang aw” ti chungin an inpe a ni. Chuvangin, vawiin niah hian Pu Speaker, he hnam tana martar zawng zawngte he House zahawm tak kaltlang hian *Zahna Chibai* ka buk a. Tin, Pathian venna changa luchhum, banchhum huama chhuak ve tho, amaherawh chu vawiin nia min la dampuite session lo thlir in awm pawhin *Zahna Chibai* thangthar ten kan buk che u a ni.

Tin, vawiinah hian ka lawm em emna leh vannei ka intihna pakhat chu Pu Speaker, he zalenna soal laia tel ngei maite zinga mi Chief Minister, Pu Zoramthanga kan han nei a, tin, Dy. Chief Minister, Pu Tawnluia a ni bawk a, tin, Lieutenant Pu Lalchamlia, Home Minister a tel bawk a, tin Pu Lalrintluanga Sailo, *Remna Run* chhuak a tel bawk a, tin kan Opposition Group Leader Pu Lalduhoma, ka hriat soal loh chuan Surgeon Clerk-in eng emaw chen a chhuak vein ka hria a, anni zinga vawiina ka han ding ve thei pawh hi a hlu ka ti. Nakin zel ah hun a lo kal zel ang a, thangthar zawk ten he zalenna soal laia tel lovin he House an rawn luah hun te pawh a awm dawn a ni. Chuvangin, vawiin nia ka tel hi lawmawm ka ti khawp mai. Pu Speaker, chu chu ka han sawi hmasak duh ni ta sela.

Tichuan, budget lamah Pu Speaker, ka han kal ang a. Tun tum kan budget hi nikum ang deuh khan ka huphurh khawp mai a, a chhan chu, covid thawh thumnain min han nuai chho a, kan budget lo beisei dan tur leh eng angin nge a rawn chhuah ang, a hniam zawng hian kan kal vak mai ang em tih te rilruah a awm a. Amaherawh chu khawvel ram hrang hrang, India mai nilo khawvel ram tam tak pawh budget-a an buai laia hetiang budget kan han nei thei hi mi tam tak duhthusam chu a ni lo maithei a, amaherawh chu kei chuan, tute pawh sorkar sela, hei aia budget tha pharh hi chu a har khawp ang tih hi chu ka hmuh dan dik tak a ni. A lawmawm zual laite leh ka lo thlir vena ka han sawi thuak thuak ang a.

Hei, Local Body Grant-a *untied* hi ka rilruah hi chuan a awm a, 40% lai mai an duh anga an hmang thei tura hi a lawmawm a. Tin, 29% Local Body Grant-a a han pung te hi a lawmawm khawp mai a. Tin, ‘SDRMF’ kan tih, State Disaster Management Fund a tana cheng vaibelchhe 2 lain a thang chho a, vaibelchhe 49 a rawn ni hi a lawmawm em em bawk a. Tin, he budget-a ka mit la em em pakhat chu ‘Health Grant’ hi a ni a, hetah hian central sorkar, sorkar laipuiin vaibelchhe 31.19 min dah sak a, he grant kaltlang hian Mizoram pumpuia Damdawiin chhe zawkte, tin, a thawktu doctor leh nurse-te quarter cheithat leh sakthar ngai tam tak a tih theihin ka ring a. Tin, Prime Minister Development Initiative For North East hnuaiiah Construction of Aizawl bypass on western side, cheng vaibelchhe 500 a rawn tel leh, Bamboo Link Roads, pilot project atana vaibelchhe 100 a rawn awm te hi a lawmawm em emin ka hria a.

Tichuan, Pu Speaker sawi tur a tam avangin ka han kal zawr zawr ang a. Hetah, Assistant to State for Capital Expenditure hnuaiia hnathawh tur tam tak rawn lang te hi, ka chhiar chhuak vek tawh lo ang a, hun a tlem avangin, Aizawl DC office vanduai thlak takin a kang a, April Ni 9, 1946-a DC hnena Political Party din tura Pu R. Vanlawma leh mi thahnemngai an kal laite mitthlain a hmu a, a uiawm em em a, mahse hemi sak that lehna tur cheng vaibelchhe 20 kan budget-a a rawn lang nghal hi a lawmawm ka ti a. Kawng lehlamah chuan, a hlui kha hnam thil nen inkawp, kan ui em em ni mahse, kan duhloh chhiatna a rawn thleng a, amaherawh chu hetah hlamchhiah awm miah lovin a sak thatna tur dah nghal a ni te hi a lawmawm em emin ka hria a.

Tin, Pu Speaker, sectoral allocation hi a fuh khawpin ka hria a, tun tum budgetah hian. Kan Finance Minister khan chiang takin a rawn sawi tawh bawk a, eng engte nge anih chu ka sawi lo ang a, amaherawh chu ‘general service sector’ tih zawngin kan sawi ang a. Heta 35.58% kan budget atanga a ni te, tin social service sector 31.88% a ni te, economic service sector 24.28% a ni te, a insem dan hi tuna Mizoram mamawh mil hian a fuh khawpin ka hria a.

Tin, Pu Speaker, ‘Khawzawl Bial’ a nih lai te khan i ding tawhin ka hria a, kan budget bu hi ka han keu thin a, ‘DC Khawzawl, DC Saitual, DC Hnahthial’ tih hi a awm tlat mai a ni, nikum atang khan, kumin hian an rawn chhut hmaih mai ang em aw ka ti a. Heng district-te sorkar-in kum 2008-a a lo puan tawh a ni a, mahse, 2009, 2010 chho ka han en let a ka theih chin chin, an lo chhut hmaih fo mai a. Khatih lai kha kan Power Minister zahawm tak nen *Treasury Bench* lama in thut lai a ni a, i chiang viauin ka ring a. Khatih lai khan sorkar sumin *a sen* a kawh lai te a awm avang khan, ‘paper leh ink man te an neilo deuh em maw ni le’ ka ti a, an lo chhut hmaih hi paw ka ti a.

Tunah erawh chuan, nikumah kan hmu tawh a, kuminah chhut hmaih lohin an awm leh a. Kan House leader zahawm tak hian a veiin ka hria a, ‘Tuichang’ han tih

hian, ‘khawi lai nge’ han tih te, Mizoram khaw tam tak a awm a. ‘Tawi’ han tiha, ‘khawi khawi nge Tawi kha’ han tih te, ‘East Tupui’ a awm a, Hnahthial lam chu ‘South Tuipui’ a lo ni a, hei hi party hrang hrang inrawn khawmna te pawh an buatsaih tawhin ka hria a. Nakin lawkah chuan ‘Khawzawl,’ ‘Saitual’ leh ‘Hnahthial’ tih te pawh constiteuncy hming ngeia a kal theih hi kan hotute hmalakna kal zelah ka beisei pui che u a, a phu pawh in phu ve a ni.

Pu Speaker, Autonomous district pathumte sum hman tura dah cheng vaibelchhe 492.03 hi 9.08%-a a rawn sang hi ka lawmpui khawp mai a. A bik takin Sinlung Hills Council hi nikum khan an budget kha ka lo en a, nuai 486.21 a ni a. Kuminah hian nuai 601.34 a ni a, 23.67%-in a thang dawrh mai a. Budget than dan hi ka en ka en thin a, department dang pawh hi 20%-a thang hi chu hotute duhsakna liau liau niin ka hria a, ka lawmpui khawp mai a. Tangkai taka an area tana an hman theih nan duhsakna ka hlan a.

Tin, High-Power Committee Lunglei tana cheng nuai 623.48 dah a ni te, ka bula thu MLA zahawm tak Lunglei North bialtu, MYC Chairman pawh hi ka lawmpui a. Nikum budget kha ka hriat sual loh chuan nuai 191.45 a ni a, MYC chairman-in chak takin hma a han la chho a, thenkhatin an mualphopui kha Mizo thalaite chawikanna tur a han ti chho a. Hei hi kan hotute leh finance lam pawhin an hria a nih ka ring a, nuai 466.3 a niin ka hria a, a bu chhunga a inziah dan chuan. Chuvang chuan, hei hi chuan awmzia a neiin ka ring a.

Mizo thalaite pawh he House zahawm tak kaltlanga ka han chah duh chu, heti khawp hian Mizoram sorkar a inhawng a, Central Service in nih theihna tur hian a inseng so nasa a ni. Ka tehkhin ber chu Pu Speaker, kan fate tan an zirna turin kan insengso a, kan fate berin an zir leh si loh chuan cheng tam tak seng khan hlawhtlinna a awm lo thei a ni. Chuvang chuan, sorkar chuan a tih tur a ti a, Mizo thalaite u, khawngaihtakin kan tih tur i ti ve ang u. Result tha zawk MYC vang ringawt nilo hian nangmahni thahnemngaihna vang zawkin kan beisei dawn a ni. Sorkar chuan a puihna tur che u kan budget-ah a lang reng a ni tih kha ka han sawi duh a.

A tawp lamah chuan, Pu Speaker, sawi tur a tam khawp mai a. Sawi loh theihloh (min lo hrethiam la), Mipui ten kan nghahhleh ber ‘SEDP’ kan han tih hian, *chi hnih* a awm a ni tih hi kan hre vak lo a ni. ‘Trade thlanna’ han tih hi kan rilruah a lian a, ka bialah te pawh a ni a. Ka member-pui zahawm tak takte pawh in bialah a nih ve ka ring. SEDP hi MNF sorkar tan tirh atangin a kal a ni a, kawngpui siam nan te, thali tharchhuah rang taka a process-na hmun a thlen theih nan te, education-ah tam tak, health-ah tam tak a kal a ni. Amaherawhchu, mipuite chan ber chu he budget-ah hian kan hmu ta a. Kan hmu tlai pawh kan lo ti mai thei a, hei hi “hripui len vang a ni” tih ka sawi duh a

ni. Hripui leng lo se he thil hi kan hmu daih tawh ang tih ka ring tlat a, kan hotute ngaihpaawimawh dan ka en hian. Chuvang chuan hetah hian 700 crore atang 350 crore, 350 crore hi ka sawi thiam dan chuan nuai 35,000 a niin ka hria a, nuai 35,000 kha mipuite fairel bel thleng tur a ni. Mizo thalaite ka chah ang bawkin, Mizo mipui ten kan dawhthleng lo siam thiam ila, eizawna ngelngnet nei turin lo dawnsawn tum ila tih hi ka sawi duh a.

Pu Speaker, ka han titawp dawn tawh ang e. Hetiang budget hripui len thawh thum thum awmlaia a tla hniam zawng ni lova, a thang zawng, a then phei chu 20% chuanga thang kan han nei te hi a lawmawm ka ti a. Lawmthute pawh ka han sawi ni se, kan Finance Minister leh department te hnenah. Kha kha ka sawi theih tawk a ni e. Ka lawm e.

SPEAKER : Member zahawm tak Pu KT Rokhaw ka han sawm leh e.

PU K.T. ROKHAW : Pu Speaker, ka lawm e.

Tun kan budget hi theihtawpin ka han zir ve a, mi thiam ka ni lova, mahse ka hmuh dan tlang taka sawina hun ka neih dawn avangin ka lawm hle a ni.

2022-2023 budget pumpui hi cheng vaibelchhe 14,008.15 atang hian revenue expenditure hi sum ruahmanna-ah chuan vaibelchhe 10,006.51 a ni a, revenue expenditure hi sorkar hnathawk pension leh loan puk rullna leh sorkar inrelbawlina a ni tlangpui a. Hetah hian budget pumpui atanga chhutin 71.43% a ni a, a sang hle a ni. Capital expenditure hi vaibelchhe 4,001.64 a ni a, capital expenditure hi chu hmasawna ruhrel, asset leh development work thawhna tur a ni a. Budget pumpui atanga chhutin 28.57% chauh a ni. Revenue expenditure a san lutukna budget hi 'budget tha' niin ka hre lova. Sorkar hnathawk budget-ah ka ngai. Tunah pawh hian sorkar hnathawk hlawn leh pension-ah ringawt pawh hian budget pumpui atangin 71.43% a ni; development hnathawhna tur chu 28.57% chauh a ni.

Pu Speaker, kumin kan budget hi a tlangpui a han en hian mipui tawrhna tur inphum ru tam tak a awmin a lang a. A chhan chu, a thara chhiah lakna tur sawi lang si lo hian chhiah hrang hrang tax revenue leh non-tax revenue lamah nasa tak sum hmuh belh tumna a awm niin a lang a. Mipuiin kan tuar leh hle dawn a ni tih hi a chiang khawpin ka hria.

Tin, Pu Speaker, gross fiscal deficit hi Finance Commission bituk zat GSDP atanga chhutin 3% hi a him tawkah ka ngai a ni. Mahse, kumin budget-ah chuan fiscal

deficit hi 5.20% a ni a, a sang hle a ni. Mizoram sorkar hi sum enkawlina lamah hemi atang hian a fimkhur tawk loh zia a lang chiang hlein ka hria. Kum 2016-a pawisa tih thih vak avanga state 17 lain revenue deficit grant kan hmuh pawh a tla hniam chho zel a. Kumin hian vaibelchhia 1615 vel chauh kan hmu dawn a, revenue Expenditure tur hi sang si a, engtin nge sorkar hian he harsatna hi hmachhawn zel a tum tih te hriat a chakawm khawp a. Finance Commission-in min pek hi kumtin a tlem chho zel dawnin a lang a, a zuih ral mai dawn a. A awmzia chu Finance Minister budget speech-ah pawh khan a lang a, 2025-2026-ah phei chuan revenue deficit grant hi vaibelchhe 500 bak kan hmu tawh dawn lo a.

Chuvang chuan, he harsatna hmachhawn tur hian sorkar hian eng remruatna nge a neih tih te ka han zawt duh bawk a. Tin, sorkar laipui atanga sum kan hmuhna a lian ber chu tax revolution atang hian a ni a, cheng vaibelchhe 4,083 beisei a ni, a tam lo hlein ka hria a. Fourteenth Finance Commission atanga kan hmuh hnuhnung ber pawh a phak lo hlein ka hria a. State sorkar hian sum renchemna lamah hma a lak a ngai a, thawhchhuahna a dap ve pawh a ngaiin ka hria.

Tin, kan Finance Minister hian central sorkar atanga sum kan hmuh tur kan hmuh kim lo zat a sawi kha cheng vaibelchhe 2,632 zet a ni a, Fourteenth Finance Commission leh Fifteenth Finance Commission sum kan hmuh turte kan hmuh kim lohna chhan hi Fifteenth Finance Commission member lokalte kha ka lo hriat danah chuan sorkar hian a lo dawngsawng tha lo deuh nia sawi a ni a, chuvangin sum min pek dan hian a tuar ta viau zawk a ni lo maw tih ngaihdan ka nei a. Pu Speaker, Finance Commissioner atanga sum kan hmuh bakah centrally sponsored scheme hnuaiah sum vaibelchhe 2,646 zet hi a ni a, hei hi chu hmanna tur ruat lawk sa vek a ni a. Tin, Pu Speaker, kan state chhunga chhiah tax revenue atanga sum kan hmuh tur vaibelchhe 801 zet beisei a ni a. Tin, Non-tax revenue atanga cheng vaibelchhe 836 zet hmuh beisei a ni a, sang hle a ni. General Service atang te, social service atang te pawhin sum hmuh beiseina a sang hle a, economic services atang phei chuan beiseina a sang hle a ni. Sorkar hian chhiah lak belhna zia langlo mahse mipui chu min hrut na leh viau dawn tih a lang chiang hlein ka hria.

Tin Pu Speaker, mak ka tih deuh mai chu, kan budget-a lo lang kum 2022- 2023 chhungah revenue surplus cheng vaibelchhe 1,419 zet neih tum a ni tih lo lang hi engtin nge revenue surplus hi kan neih theih dawn (*Warning Bell...*) Pu Speaker, nichin khan kan thianpa khan minute 13 a sawi a, kha kha min pek belh dawn nia, ka sawi chak lo em hi.) Pu Speaker, “revenue surplus vaibelchhe 1419 zet neih tum a ni” tih a sawi hi mak ka ti khawp mai a. A chhan chu, Fifteenth Finance Commission atanga revenue deficit grant min pek a tlem chho zel chungah revenue surplus vaibelchhe 1,419 zet neih

theih dan tur hi ka chhut thiam lova, khawngaihin nakinah kan Finance Minister hian min hrilhfiah se la ka lawm khawp ang.

Tin, Pu Speaker, capital receipt atangin cheng vaibelchhe 2,581 zet hmuh tura beisei a ni a, a sang hle a ni a, chuti chungin hmanralna lamah chuan vaibelchhe sangli chuang lai dah a ni thung a ni. Chuvang chuan, kan budget hi a tha kan ti thei lova, hetiang anih chuan a hmanralna kan hmuh tur aain a hmanralna a tam zawk a nih chuan *budget tha* a ni thei lo reng reng a ni. Tin, Reserve Bank of India atanga *ways and means advance* pawisa puk tur cheng vaibelchhe 1,000 a ni a, *ways and means* hmanga RBI a sum puk hi ka hriat danah chuan sum dinhmun a tha tawk lo viau tihna a ni a, loh theihloha vanga puk an ni. Sum dinhmun a that laiin *ways and means* hman a ngaih ka ring lo a ni. Chuvangin, kan sorkar hi financial management-ah tunah hian harsatna namenlo a tawk a ni tih hemi atang hian a lang chiang hlein ka hria.

Pu Speaker, sorkar hian mipui thawh chhuah atangin SEDP hluiah ‘party puihna tur’ ka ti mai ang, vaibelchhe 350 lai a dah a, kan Chief Minister hian an party mite chauh thlang turin a sawi a ni tih media lamah kan hmu a ni, thudik a nih leh nihloh chu thuhan nise la. Sem an tum a, pawisa hi zoram mipui thawh chhuah a ni tih hria se, an sem dawn a nih pawhin thlei bik nei lova sem tur a ni dawn lawm ni tih kan sawi duh a. (**Speaker:** I zo thei dawn tawh em, a hma aain i pel thui tawh a nia) Congress ina NLUP kan sem kha Cabinet Committee on Economic Affairs Prime Minister Chairmana in CSS hmanga cheng vaibelchhe 2,873 min pek hmanga sem a ni a, mipui zawng zawng a huam vek a, party dang pawh kan pe vek a ni. Chutiang thoin SEDP hi a ni turah ka ngai a ni.

Pu Speaker, a tawpnaah chuan, kan Finance Minister thusawiah hian mak ka tih chu, PAHOSS, Healthcare leh Mau (Rua) chungchang hi sawi a ni lova, hei hi enge a chhan khawngaih taka min hrilhfiah ka duh bawka. Tin, Pu Speaker, a tawp nan, sorkar laipui atanga sum hmuh tur Covid avanga hmuh a nih loh thu a sawi kha dik a, mahse covid avanga kan sum hmuh tur, beisei lawk loha kan hmuhte pawh hi sawi lan a ni lova, hengte pawh hi min hrilhfiah se la ka lawm khawp ang. Ka lawm e.

SPEAKER : Tunge sawi veleh ang le? Member zahawm tak Pu Lalchhuanthanga.

PU LALCHHUANTHANGA: Pu Speaker, ka lawm e.

Budget hi ka sawi hmain nikum budget kan zawh dawn tawh lamah khan kan House Leader zahawm tak khan central lama pawisa a hmuh tur tam tham deuh mai, “a sawi pawh ka zak deuh e” a tih kha engzat nge a sawi theih tawh em tih ka zawt a, tin,

budget-ah hian chu chu a tel em tih te pawh kha kan zawt duh a, he House-a a sawi ngei a nih avangin kan hre chak deuh a nih chu.

Budget kan han pharh leh a, thil thar hmuh tur a awm lo khawp mai a. Budget hi phai ramah chuan an han pharh hian mipui hian an ngaihven em em a, auto-rickshaw khalhtute pawhin an ngaihven a, a chhan chu budget-ah hian thil thar, mipui leh ram tana thil tha an thlen thin avangin an ngaihven thin a ni. Keini budget ve hi chu tumah hian kan ngaihven vak lo mai a, hei pawh hi ‘budget tha tak a ni’ tih kha an sawi theihloh nghal ringawt mai a. Nikum kan budget ah khan salary-ah te, medical treatment-ah te, minor works, major works tihah te khan a hma kum kha a phak lo vek a, churang chuan kuminah pawh hlawh pek chung changah pawh kan buai a ni a. Kumina kan budget tharah pawh chutiang tho chu a ni mai a, medical treatment-ah te, salary-ah te, minor works, major works, wages han tih te leh O.E. ah te nikum kan han pha lo leh nghal a, hei hi engge ni a chhan ni ang aw ka ti a. Tun hnaiah pawh SEDP Board thar te kha an hawng leh niin ka hria a, khatiang ang khan post te hi siam belh a ni thin a. A bakah sorkar hnathawkte hian kum tin increment an nei a, churang chuan kan budget-ah hian ‘salary’ hi a pung tur a ni dawn lawm ni, engati nge a tlem lehzel tih hi zawhna pakhat ni bawk ta se la.

Hmanniah kan Chief Minister Delhi-a kar khat chuang a zuk thang te khan pawisa crore 600 a rawn hawn a, crore 500 chu, ‘construction of Aizawl by-pass road on western side’ tih a ni. ‘Western side’ tih nina na na engati nge hmar lamah hna thawh kan tum tlat mai aw ka ti a, hmar lam leh khawchhak lam hawi zawngin. Heihi ka hrethiam lo viau a ni. Cheng vaibelchhe 500 lai hmanna tur a ni dawn lehngal a, chhim lam kawtchhuah saw a pawimawh tawh tehlu nen. Hemi chungchang hi kan hre chak a.

(Dy. Speaker-in Chair a la a ..)

DEPUTY SPEAKER : Awle, i sawi zawm thei e.

PU LALCHHUANTHANGA: Pu Deputy Speaker, ka lawm e.

Tin, kan budget-ah hian mak ka tih deuh chu, healthcare chungchang a lang lo hi a ni a. Hmanni khan kan House Leader hian, “chhung tin tan SEDP-ah cheng nuai hnih kan dah vek” a ti a. Chutianga House-a a sawichhuah ni si, engati nge budget-ah hian a lan loh? Tunah hian, kan hriat danin, healthcare-ah hian cheng vaibelchhe sawm 40 vel leiba a awm niin an sawi a. Chutiang ni si engati nge budget-ah hian ba rulhna tur ang chi a lan loh aw ka ti a. Heihi, Pu Deputy Speaker mipuiin an ngaihven khawp a nia. Tunah hian healthcare-ah bill tang a tam lutuk.

A dawtah chuan, point 27-na hi ka han sawi leh duh lawk a. ‘Scheme for Financial Assistance to State for Capital Expenditure’ tih a ni a, khatah khan cheng vaibelchhe 100 lai hmuh beisei a ni a, a hnuaiyah hian a hmanna tur hrang hrang point pariat ziah a ni a. Point rawn dahchhuahah hian Aizawlah vek capital expenditure hman turin dah a ni a. Lunglei-ah cheng vaibelchhe 4 vel chauh dah a ni. District dangachte hian enga tinge asset ang chite hi kan dah ve loh? Hmanni lawkah district thar pathum function tir a ni a, heng te pawh hi duhsak tur an ni dawn lawm ni? Khang kan pawisa hman tur an han tarchhuahte kha cheng vaibelchhe 100 a ni si a, ka chhut a, a hmanna tur pawisa an rawn ziah chhuah hi vaibelchhe 81.3 chiah a ni a. Engati nge kan tih kim loh, Budget-ah chuan kan hmuh tur leh a hmanna tur hi a inzat tur a ni si a? Vaibelchhe 18.64 hi eng atana hman tur nge? Kan mi duhsak zawng, ‘Kamrula Chhange’ tihte hna pekna tur a ni em tih ka hre chak a ni.

Tin, kan budget-ah hian ka vei em em mai pakhat, power project siamna tur a lang miah lova. A hma atangin kan sawi kan sawi a, potential kan neih that thute, amaherawhchu eng project mah, project lian hi engati nge kan neih theih loh? Mipui hnena power tariff sang taka khawn rikngawt hi a mi kan tih tur? Potential kan nei tha kan tih pawhin engmah siamchhuahna tur hmanrua duanchhuah a ni lova, a paw khawp mai. Pu Deputy Speaker, ZPM kan sorkar ve hunah chuanin, kan sorkar kumah power project lian pathum, pali tan hma kan la nghal dawn.

Tunah chuan SEDP, kan sorkar flagship programme chungchang ka han sawi ve ang a. Hei hi thil zahawm tak pawh a ni a, amaherawhchu mipui kan inbum nasa lutuk hi a paw khawp mai a. Kum 2019-2020 SEDP-ah cheng vaibelchhe 700/- kan dah a, kum 2020-2021-ah vaibelchhe 530/-, nikum khan vaibelchhe 400/- te kan dah a, a vaia kan lo dahkhawl sa kha cheng vaibelchhe 1,613/- a ni. Tunah hian, “SEDP kan sem dawn” an ti a, tuna kan budget pharh mek hi a ni turah ka ngai a. Tin, SEDP-ah vaibelchhe 700/- dah a ni a, hetah pawh hian a chanve chauh hi mipui thleng tur a ni. Vaibelchhe 350/- hi family development-a thleng tur a ni a, hetah pawh hian vaibelchhe 50/- chu contract hna insiamna tur an tel leh hram a ni. Hengte hi chu sem ve tawh mai ila? Anih leh a hmaa cheng vaibelchhe 1613 kha enga tana hman nge? Kha kha mipui ten an beisei a sin. Diktak chuan cheng 50,000/- sem kan tum a, IV-Grade te pawhin cheng 50,000/- chu thla tin an hlawh a, inkhaichhuah nan an hmang thei chuang lo. Nuai 3 te a nih chuan miin an hmang tangkai thei, an inkhaichhuah nan pawh a hman theih a ni. Chuvangin, *Nuai thum* hi i sem hram teh ang u, cheng sing nga chauh chu engtihna mah a ni lo; IV-Grade pawhin thla tin an la a, thil tih mai mai a ni. Chuvang chuan kan SEDP hi (**Deputy Speaker:** Minute 1 i la nei e.) He lalthutthlenga min thut tirtu mipuite kan bum nasa lutuk. Chuvang chuan, SEDP cheng sing nga hi kum 5 chhunga han sem atan chuan a tlem lutuk a ni. Chu pawh chhungkaw sing ruk vel lek an han target lehngal a. Mizoramah hian chhungkaw engzat nge awm? Kan flagship programme ber

hi hetiang mai mai hian zahawm loh takin i siam lo hram hram ang u. He lalthuthleng a min thut tirna hmanrua atana kan hman a ni a, kum nga chhunga cheng nuai thum sem intiama cheng sing nga inpek hi a dik lo a ni. Pu Deputy Speaker, ka zo chiah e. Ka lawm e.

DEPUTY SPEAKER : Tunge kan sawm leh ang? Member zahawmtak Dr. F. Lalnunmawia i lo sawm ang u.

DR. F. LALNUNMAWIA: Pu Dy. Speaker, ka lawm e.

Vawiinah kan Budget general discussion hun tha tak mai kan nei thei hi lawmawm hlein ka hria a. A hmasaa kan sawilan duh chu, Pu Dy. Speaker, kan Chief Minister zahawmtak Finance changtuin a tarlan ang khan, kum 2020 January - March atang kumin thlenga central sorkar atanga kan sum hmuh beisei kan hmuh tak loh hi cheng vaibelchhe 2,632.58 zet a ni tih kan hmu a. Ka rilrua lo awm chu, heti chung pawha Covid hrileng karah mipui mamawh ei leh bar chi hrang hrang, a bikin buhfai hnianghnar taka kan dawng reng thei te, tin, sorkarin hmun tam takah kawngpui leh kawng pawimawh heti taka a han chei hnum thei te hi a lawmawm takzetin ka hria a ni. Hengah hian vawiina kan House Leader, Finance changtu remhriatna a lo langin ka hria a, lawmthu sawi tur tam tak awmin ka hria a ni.

Tin, Pu Dy. Speaker, kum thar 2022 - 2023 atana kan budget-ah hian thil lawmawm tak chu, kan budget hi a lo pung chho ve zel a, kan capital expenditure leh kan revenue expenditure pawh hi a pung chho ve ve a. Hei, kan budget bu ka han en hian, kan budget pumpui vaibelchhia 1408.15 atangin revenue expenditure hi 71.43% niin, capital expenditure hi 28.57% a ni thung a. Helai kan capital expenditure tam tham tak mai kan thawk thei tur hi a lawmawm hlein ka hria a ni.

Tin, Pu Dy. Speaker, thenkhatin kan budget-ah hian kan dah danah sorkar hnathawk hlawh pawh daih mang lo tur ang deuha an sawi hi a diklo deuhin ka hria a. Finance Department ten data an neiha a lan danah hian, sorkar hnathawk leh pension-te hlawh belh khawm hi vaibelchhia 6,177.73 niin, kan budget pumpui atanga chhutin 43.67% a ni a. Pu Dy. Speaker, ka hmaa sawitu khan hemi revenue expenditure hi sorkar hnathawk hlawh atana kal ang vek khan a sawiin ka hria a, helai tak hi kan sawi fuh lo deuh thin em aw ka ti a. Revenue expenditure kan sawi hian sorkar hnathawkte hlawh hi a lar deuh bik thin a, amaherawhchu, he Finance Department data atanga a lan danah hian 43.67% deuh chiah kha a ni a, a bak hi revenue expenditure atang hian mipui nawlpui ten kan mamawh tui supply te, electric power kan leina te, tin, buhfai leina te, sorkar loan pung rulhna te, sorkar inrelbawlina leh medical treatment te leh khatiang thil hrang hrang atan khan hman a ni bawka a ni. Chuvang chuan, kumina Revenue

expenditure hi 8% in a pung nghe nghe a, hei hi a tul hlein ka hria a. Chuvang chuan sorkar hnathawkte hlawh bikah pawh hian harsatna lutuk awm lovin kan kal thei mai ang tih ka ring a ni.

Tin, Pu Dy. Speaker, ka han tarlan leh duh chu, he kan budget bu-a kan hmuh ang hian Mizoram sorkar leiba hi kan sorkar hmasa, Congress sorkar term tawp lam 2017 – 2018-ah khan kan GSDP atanga tehin 41.85% a ni a. He kan leiba hi a tlem hret hret a, tun kan sorkarah hian, 2019-2020 ah pheih chuan 32.72% ah a tlathla a, tin, tun kan sorkar kumthar lo awm turah hian 31.8% ni tura chhut a ni. Tichuan, 2017 - 2018 kum nena khaikhinin kumin sorkar kumthar tur atana kan leiba hi GSDP atanga tehin 10% lain a hniam thla a ni tih kan hmu a, hniam tura chhut a ni a, hei hi thil lawmawm tak niin ka hria. Kan leiba kan GSDP atanga teha 10% hniam thla tur hi thil lawmawm tak niin ka hria a ni.

Tin, Pu Dy. Speaker, mi thenkhatin, “kan budget-ah hian kan Chief Minister zahawm tak leh kan Finance Minister zahawmtak kutah sum tam tak dah a ni” tiin an sawisel a ni tih pawh kan hria a. Mahse, ngun taka kan ngaihtuah chuan, mipuite leh sorkar department ten an mamawh dan azira a tul ang zela hman tura dah a ni tih hi sawi a niin ka hria a, chu chu a tha hlein ka hria a. Hei, kan ramah hri leng te, raltlan vanga buaina te, ramri buai avanga harsatna te leh harsatna hrang hrang kan tawk a. Chung karah chuan tih hmasak tur hriat lawk vek te a lo har a, chuvang chuan, kum te kan han kal chho ang a, kan hun tawn, kan mamawh dan azirin heng kan Finance Department-a kan sum te pawh sorkarin a tul dan azirin a hmang turah ka ngai a. Chuvang chuan, harsatna hriatlawk loh leh mamawh dan hriat vek lawk loh karah hetiang a sum kan dah hi a finthlak viauin ka hria a ni, Pu Dy. Speaker. Chuvang chuan, kan Chief Minister, kan Finance Minister ruahmanna hi tha ka ti a.

Tin, ka hmaa sawitu khan hmasawna hna thil thar awmlo ang khan a sawi deuh a. Amaherawhchu, he “Financial Assistance to State for Capital Expenditure”-ah hian thil thar tam tak tih tur kan hmu a, hei hi a lawmawm hlein ka hria a. ZMC tihchangtlunna tur te, tin, Hualngohmun hnuai a bawlhhlawh paihna hmun tur siam tur te leh thildang tam tak, hei, Aizawl DC office kang sakthat nghal a ni tur te hi a lawmawm hlein ka hria a. Heng atana sorkarin chak taka hma a la chho hi a lawmawm hlein ka hria a ni.

Tin, Pu Dy. Speaker, kan budget-ah hian mipui nawlpui tan thil lawmawm tak awmin ka hria a, SEDP atan cheng vaibelchhe 7,700 lai mai dah a ni a, hemi atang hian vaibelchhe 350 hi chhungtin te tin zawna, family development scheme atan dah a ni. Chu chu kan hriat angin Mizoram-a kut hnathawka eizawngtu chhungkuate chhawmdawl na tura tih a ni a.

Pu Dy. Speaker, mi thenkhatin SEDP hi an hrethiam lo deuh thin niin ka hria a. Kan SEDP bu kan en chuan, infrastructure siam nan te, Healthcare atan te leh Economic Development atan te a ruahman a ni a. Kan kum hman liam tawhah te kan Chief Minister zahawmtak khaihhruainain infrastructure kawngpui leh thil mamawh hrang hrangte siam a ni tawh a. Tin, Healthcare atan pawh eng emaw zah dah a ni tawh a. Tin, kuminah hian kut hnathawk chhungkuate dawmkan dan hawi zawnga kal tum a ni ta hi a lawmawm hlein ka hria a ni. Chu chuan Agriculture leh a kaihhnawiha eizawngte, tin, industry leh kut hnathawka eizawng te nasa takin a puiha, an bul tanna tur a siamsak tur hi a lawmawm hlein ka hria a ni. Chuvang chuan, Pu Dy. Speaker, kan sorkar hi a thutiamah a ding a, a *flagship programme* SEDP hi a tihlawhtling chho zel a, a tihlawhtling chho mek zel hi thil lawmawm tak niin ka hria a ni.

Tin, Pu Dy. Speaker, surplus revenue nei tura kan Finance Minister-in ruahmanna a siam hi lawmawm hlein ka hria a, kum kan han hmang chho ang a, Mizoram sorkar-in kan sum hmuh turte hmu turin kan department leh sorkar ten theihtawp an han chhuah ang a, kan hmasawna hnathawh hi nasa takin a kal ang a, kawng hrang hrangah hma kan sawn ngei ang tih ka ring a, ka beisei a ni (DY. SPEAKER: Minute khat ila nei e.)

Pu Dy. Speaker, ka lawm e. Hetianga budget tha mipuite lam hawi zawnga siam a ni ta hi ka lawm a, nasa takin Mizoram hian sorkar kumthar lokal turah hian kawng hrang hrangin hma kan sawn ang a, kan district hawn tharte pawhin hma an sawn ang a, District Administration a tan te pawh sum dah turte kan hmu bawk a. Tin, Urban Local Bodies-te, District Council enkawlna tur tha tawk dah a ni hi ka lawm a, Mizoram hmun tinah hmasawna hi rualkhai takin a kal ang tih ka beisei a, lawmawm hlein ka hria a ni. Chu chu ka sawi theih tawk ni rawh se. Ka lawm e.

DEPUTY. SPEAKER : Tunge kan han sawm leh ang? Member zahawm tak Pu Lawmawma Tochwawng ilo sawm ang u.

PU LAWMAWMA TOCHHAWNG: Pu Dy. Speaker, ka lawm e.

Covid avang leh Finance Commission Award chungchanga beisei ang a thil a kal loh avanga kan sum hmuh tur zat hmuh kim takloh cheng vaibelchhe 2,632.58 awm chung pawha budget th tak duang chhuaka, SEDP-a family development *beneficiary oriented* atana vaibelchhe 350 dah a ni thei hi thil lawmawm tak a ni a. Tun Financial kal mek 2021-2022 chhungah hian sorkar hian sum harsa chung chung karah *state matching share* kha pek theihloh kan nei miahlo niin ka hria a, hemi ringawt pawh hianin thil lawmawm a hring a. SEDP sum nena tang kawpa matching share pe zat zat thei kan Chief Minister, kan Finance Minister ni bawkin hetiang financial management

a thiam hi fak a phu hlein ka hria. Tun budget tharah pawh hian state matching share atan vaibelchhe 200 dah a ni a, hei hian a entir chu, CSS atangin sum tam tham tak kan haichhuak leh thei dawn, kan state budget pangngai piahlam atang pawh hian beisei tur ala awm dawn tih a tilang chiang a, a thlamuan thlak hlein ka hria.

Pu Dy.Speaker, thil lawmawm tak pakhat han sawilan ngai ka tih chu, tunah hian sorkar chuan “Mizoram Resource Mobilization Committee” a din thar a, he committee hian kan sum lak belh theihna tur hrang hrang a dap khawm ang a, chutah kan sum hman chhuah tihhniam theih dan kawng a ngaihtuah bawk dawn a ni a. He committee hian tunah pawh meeting vawi eng emaw zat an nei tawh a, line department-te pawh sawipuina an nei tawh a, sum hmandan tur mumal, felfai, tangkai an nei mek zel niin kan hria a, financial year thar atang chuan anni hmalakna hnuai atang hian ram pumpui hi dinhmun tha zawkah kan chuang kai theiin a rinawm.

Pu Dy. Speaker, kan Chief Minister hmalakna liau liau avangin North-East State dang ten an thik theih khawpin budget tharah hian Prime Minister Development Initiative for North-East, ‘PM-DeviNE’ kan tih mai hnuaihan khan Mizoram chuan project lian tham kan kalpui thei tur hi thil ropui tak a ni a. Pu Dy.Speaker, sorkar laipui chuan he PM-DeviNE Scheme hnuaihan hian NEC kaltlangin hmalakna tur “construction of Aizawl by-pass on western side” atan cheng vaibelchhe 500 leh Bamboo Link Roads pilot project atana cheng vaibelchhe 100 thawh tur te minrawn ruahman sak te hi a lawmawm takzet zet a. He thil hi chu sawinep chi a ni lo, DoNER official-te pawhin Mizoram CM hi hemi chungchangah hi chuan an fak hle a ni tih he House hian hria se ka duh khawp mai. Pu Dy. Speaker, he thil hi “phuahchawp leh risk” tia lo nuihzattu an lo awm leh anih pawhin, “*fakna hi kan tan thlemna, sawichhiatna erawh kan thian*” tihte pawh kha kan sa ve tawh mai a ni ang chu.

Tun financial year kal mek 2021-2022 hian SEDP-ah vaibelchhe 400 dah niin covid pandemic awm chung chungin SEDP-ah nasa taka hnathawh a ni tawh a, a ni mek bawk a. Kumthar budget-ah hian vaibelchhe 700 dah leh a ni a, hei hi *earmark* a niin thil ropui tak ram mipui tana chhenfakawm tak tur a ni. SEDP detail zawka kalpui dan tur hi SEDP Governing Board leh Executive ten an duang a, mipui, a dawngsawngtu tur ten rim taka hna kan thawh a, diktaka kan hman phawt chuan, Mizoram hian hmasawna nasa zawk kan neih ngei a rinawm a, ram mipuiten a tahtawla ei leh bar an hmuhna leh zawna tur an dawng mek leh an dawng zel hi a tha a ni. Thenkhatten thalo an tih pawhin, “hei hi ram mipuite tan a tha a ni” tih hi ka sawilang duh a ni.

Kan thalaite zinga lekhathiam leh beiseiawmte All India Service leh Central Service lama a tam thei ang ber tling chho tura buatsaih hi kan tih makmawh a ni tih hria a, kan CM-in chumi atan ruahmanna a siam a cheng vaibelchhe 2.60 *earmark*-in,

Mizoram Youth Commission hnuai dah a ni te hi thil ropui a ni a, kan thalaite tan chona nasa tak niin, mi tamtak a cho chhuah ngei pawh a beiseiawm takzet zet a ni.

Kan sawinawn fo thin, Lunglei bik tana he budget-a thil lo lang, Lunglei Municipal dinna tura a tak ram kan chan theihna tur a bultanna atan cheng nuai 80 ruahman a ni hi Lunglei mipuite kan lawm a, a bul tanna mai a ni a, a tul anga fund allocation tihbelh zel tur a han ni pawh hi thil lawmawm tak a ni.

Tin, Sinlung Hills Development-ina vaibelchhe 6.01 an han dawng tur te, Sialkal Range Development Council-in vaibelchhe 2.14 dawng thei tura ruahmanna awmte hi tangkai tak leh fel taka hmangin, ram hmasawanna hmuntinah hmuh theih anih ka beisei takzet zet a, thil lawmawm a tlingin ka hria. Nikum 2021-2022 budget tuna kan kalpui mek sawisel barh barhtute leh tuna kan chai mek 2022-2023 budget-ah pawh lawmna reng neilotute nena rual tlang tak, tangkai taka hman tur MLA fund kan han nei tlang leh tur te hi lawm nachang hre tlang ila ka ti khawp mai. Kan budget chai lai mek hi Pu Dy. Speaker, a pawisa tam leh tam lovah kawngro su viau mahsela, chumi tluka pawimawh, a tlukupui deuh thawa ka ngaih chu, dik tak leh fel taka hman anih phawt chuan chhenfakawm tak niin, ram mipui leh ram hian a tangkaipuiin hma a sawnpui ngei ang tih a rinawm a.

Tin, ka han sawilan tel leh duh pakhat chu, a hun dik taka hman theih turin a bik takin kut hnathawktute, hunbi neia hnathawktu, hunbi nei thlai leh buh chingtute, huan/ram neituten a hun dik taka an hman theih tur atana chhawpchuah theih ni se ka duh khawp mai a. A hun a inhmuh lova, a inkalhelha a huna pekchuah anih loh chuan, a pawisa hlutna pawh hi a tlahniam thei a. Chuvang chuan, a hun taka an hman theihna turin kan loneitute, huan/thlai neitute tana pekchuah theihna tura ruahmanna siam ni se ka ti khawp mai.

Pu Dy. Speaker, kan budget hi *tha famkim* a ni bik kher lo ang a, kan hun tawn leh hun harsa tak karah hian tumahin an tih theih bik ka ring lova, khawimaw laiah te hi chuan, “hun hmasa lama dah ang zat te kha dah leh ni thei se aw” tih te pawh kan nei ve tho a. Chuti chung chung chuan budget tha tak, ram leh mipui tana pawm tlak a ni a, “i pawm dial ang u” tiin he budget chungchangah hian rawtna te pawh ka han siam nghal a ni e. Ka lawm e.

DEPUTY SPEAKER : Minute 4 kan la nei a, tunge minute 4-a sawizo thei tur kan han sawm ang le? Anih leh kan huphurh deuh si chuan i chhun chawl lawk mai ang u aw. Dar 2:00 PM-ah kan rorel kan chhunzawm leh dawn nia.

2:00 PM

DEPUTY SPEAKER : I thu ang u le. Aw le, tunge kan sawm leh ang? Vawiin hi kan discussion (sawihona) ni tawpna a ni a. Nakinah a tawp lamah kan inhnawh leh vak si ang a. Aw le, Member zahawm tak Dr. Z.R. Thiamsanga i lo sawm ang.

DR. ZR. THIAMSANGA : Pu Deputy Speaker, ka lawm e.

Hei, kan ramin dinhmun harsatak mai Covid 19 kan han hmachhawn a ni a, kan ram mai ni lo, India ram leh khawvelin harsatna namenlo kan tawk a, chuti chung chuan kan hriat ang khan, cheng vaibelchhe 2,632.58 lai mai, kha kum 3 chhunga kan sum hmuh tura kan beisei kan han hmu lova. Chuti chunga kan Chief Minister, kan Finance changtu Minister ni bawkin, dinhmun harsatak kara hetiang budget tha tak mai a rawn chhawpchhuak thei hi a lawmawm hlein ka hria a. Amah mai ni lovin, department-a a thawhpuite zawng zawng chungah pawh lawmthu ka sawi nghal ni sela.

Tun ang huna Finance Minister han nih te, budget pharhtu han nih te pawh hi thil huphurhawm tak niin a lang a. Veilama mite pawh hian tun dinhmun ang hi han chang ni ta se chu, budget session-a han pharh leh han sawi vel hi chu hrehawm an tih viau ka ring a. Chutiang chung chung chuan thil thar tam tak chhawpchhuah te a awm a, hmasawna lampang chi te.

Tin, lawmawm em em mai chu, kan hria a, 'SEDP' kan han ti a, SEDP hi a diktak chuan tunah hian crore 700 kan han tih atanga crore 350 hi chhungkua tuam nan, chhungkaw pakhatin a bul tan nan cheng sing nga atanga cheng sing ruk kan han tih hi, tun ang Covid 19 dinhmunah hi chuan lawmawm tak a ni. Sum hi a harsa a a dik tak chuan, Thingtlang lampang ni mai lovin, khawpui chhungah pawh hian eichawp zawng hi tam tak an awm a ni. Chuvangin, hetiang SEDP-a chhungkua, retheite khaichhuahna tur atana ruahmanna a rawn siam hi kei chuan a tha hi ka ti tak zet a. Hei hi chhungkaw tam tak leh miretheite tan chenfakawm tak a ni dawn a ni.

Hei mai bakah hian hei crore 100 kha 'SEDP bawhzuina' kan han ti a, chumi awmzia chu kan hria a, eng emaw thil pawh a awm leh thei a ni. Tin, crore 200 kha central a tanga sum lo kal do letna tur '*matching share*' kan tih ang chi kha a ni a. He mi awmzia chu, central a tangin sum tak tak kan haichhuak thei dawn a ni tih a lang ruak mai a. He crore 200 hian sum tam tak a do let dawn a, a lawmawm ka ti a, hei hi tam takin kan han sawichhe naa, he SEDP hi chu mi zawng zawng tan tangkai tak a ni dawn a ni tih hi chiang tak a ni.

Tichuan, kum 2022 - 2023 hemi employment salary data phak 510 lai mai soft-copy kha a vawikhatna atan pharh a ni a, hengte pawh hi thil lawmawm ve hrim hrim a ni a, thil ho te pawh a ni thei a. Amaherawhchu, a vawikhatnan a soft-copy an pharh te hi a lawmawmin ka hria a.

Hei kum 2022 - 2023 chhunga Fifteenth Finance Commission ruahman anga sum hmuh kan beisei zat kha Fourteenth Finance Commission in a lo ruahman zat ai khan 22.7% khan in an sang zawk dawn te hi a lawmawm khawp mai a. Revenue Deficit Grants-ah crore 1,615 zet te, Urban Local Body Grants crore 35 te, tin Rural Local Body Grants crore 71 te, Healthcare Grants ah 31.19 crore te, hengte hi kan sawi fo tawh SEDP-a kan Flagship Programme a ni. Tin, Primary Healthcare tihchangtlun nan hian a pawimawh em em dawn mai a hei hi, kan Sub-Centre te, Primary Health Centre te, kan CSSC te, infrastructure building te, quarter te pawh a ni ang chu, khatiang tihmasawna atan khan a pawimawhin a lawmawm khawpin ka hria a.

He sorkar, he budget hian kan hriselna tur 'Primary Healthcare' hi a ngaipawimawh hle a ni. Kan Healthcare System mai bakah, a infrastructure zawng pawhin hmasawna tam tak tana ruahmanna a rawn siam hi a lawmawm khawp a ni.

Tin, State Disaster Management fund, kum 2022 - 2023 atanga grants vaibelchhe 47 atanga 48 a a rawn pung ta te hi a lawmawm khawp mai a. Tin, nichinah khan kan ngaithla nual tawh mai a, central atangin sum haichhuak lo ang thaw thawa kan han inchhuah te kha, kan zirchiang lo emaw ni aw ka ti a. A chhan chu, tuna kan Chief Minister zahawm takina Prime Minister Development Intensive for Northeast Scheme hnuaiah NEC kaltlanga hmalakna tura "Construction of Aizawl By-pass Road from Western Side" a tiha vaibelchhe 50 te hi a ropui a ni, hengte hi kan beisei phak lo a ni. (Ka sawi sual a ni, Pu Deputy Speaker, vaibelchhe 500 zawk.)

Tawngsual te hi chu a awm ve thin a. A lawmawm e, in hre lo emaw ka ti a, in lo chiang khawp mai a. Hetiangte hi kan beisei phak loh thil a ni, dik tak chuan. "Khawirama tangin nge" tih ang deuh hlek khan, hei hi a ropui khawpin ka hria.

Chu mai ni lovin bamboo project te kha a then chuan in han englo deuh thin tak naa, tunah hian hei Bamboo Link Road, "Pilot Project for Construction of Bamboo Link Road at different location in various project in the State of Mizoram" a tana vaibelchhe 100 ruahmanna a taka kan han nei te hi a lawmawm khawp mai a. Pu Deputy Speaker, sawitur hi a tam si a, a pawimawh ka tihte pawh kan sawi zo hman dawn lo a nih hi maw le.

Chumi bakah chuan, External Aided Fund hnuaiiah crore 261 kha grant hmanga hmuh beisei a ni te, NABARD hnuaiiah vaibelchhe 170, Rural Infrastructure tihchangtlun a nih zel theihnan a hmuh beisei te, kan thalaite All India Service leh Central Service lama a tam thei ang ber an luh ve theihnan 2.6 crore Mizoram Youth Commission hnuaiiah dah an ni te hi a ropui khawp mai a, thalai tan pawh a *challenging* hlein ka hria. Thalaite pawhin he sorkar-ah hian beiseina an nei a ni tih kha a chiang a. Tin, Pu Dy. Speaker, MLA fund hetiang ang sum harsa tak hnuaiiah pawh crore 60 ruahman a han ni te hi, i vei lampanga mite pawh hi an lawm viau chuan ka ring a ni, tha an ti a ni heng te hi, a dik tak chuan.

Pu Dy. Speaker, han en vang vang ila sawi tur a tam a, hun a awm tawh si lo va. Lunglei Municipal Council dinna atan cheng nuai 80 a bul tan nana an han dah thei te hi tunhma sorkar te khan heng ang ruahmanna te hi an lo siam tawh em le ka ti a. He sorkar hi chuan hmasawna hi chu a ngaihtuah a ni. Tin, Sinlung Hills Development Council atan te, Sialkal Range Development Council atan tea sum thahnem tawh tak an ruahman te hi a lawmawm a, He sorkar, he budget hi Mizoram miretheite, mi zawng zawng thleng phak hmasawna kawngah te pawh a ni ang. Chuvang chuan, tuna kan Finance Minister, kan Chief Minister ni bawkin budget a rawn putluh hi ka thlawp a, pawmpui ngei turin keipawhin ka rawn sawi a ni e. Ka lawm e.

DEPUTY SPEAKER : Dr. Vanlalhlana, Member zahawm tak ilo sawm ang u.

DR. VANLALTHLANA : Pu Deputy Speaker, ka lawm e.

Tun tum Session chu duh angin a inbuatsaih hleih theih lova. Session hma karah covid-in min han nuai hrep a, duh angin a inchhiar hleih theih lova. Amaherawhchu, theih ang angin kan budget chungchang ka han sawi ve ang a.

Nimin lamah khan Supplementary Demands chungchang sawi kan han dil a, amaherawhchu, a remchang lo a ni a, a remchanloh chhan te pawh kha chi hrang hrang a awm mai thei. 2019 - 2020 Mizoram sorkar sum CAG in a endikna te kha kan han zir ve a. Chutah chuan department tam tak khan supplementary demands an rawn tihbelh a. Amaherawhchu, an sum hman tak taka kha, 'heti zat hi kan hmang dawn' tia kan pass-pui kha Supplementary Demands nena han tih pawh khan Budget Estimate kha a lo la pha lova, chu chu tarlan a ni a. Pawisa kan pe a, 'heti zat, cheng za hi kan mamawh e,' an han tiha, a hmanna tur lamah khan hmang ta lovin, 'helamah hian kan hmang leh duh si, tihian i puk ang' tih te, 'helama hi, kan hmu leh si e,' tih te a ni a. Hmang tura kan han phalna lamah khan hmang leh ta lo chuan, cheng za pawh hmang tling leh chuang lovin tikhan kum an han ralpui a ni a. Kuminah hian engzat nge awm ang, engzat

nge ni ang tih chu Actual Accounts leh Audit nena tih loh chuan hriat a har khawp mai a.

Supplementary Demands a san hian, Pu Dy. Speaker, i ding lama mite hian “central lam atangin sum a rawn kal vak a, chuvang chuan a sang a ni e” tih kha an sawi thin dan a ni a, a dikna chen a awm. Amaherawhchu, kumin chu cheng vaibelchhe 6,000 chuang dil belh a ni a, khatah khan *Ways & Means Advance*-a cheng vaibelchhe 3,700 kan dila kha engvang nge? Sum kan hman thiam vang a ni em? A ni lo reng reng. Kan indaihlohna thil avanga kan dil belh, a chanve aia tam RBI-ah ‘min lo pe leh mai teh u’ kan ti a, kan han rul leh a, ‘ti leh mai ang’ kan han ti a, kan pawh tang tang vang a ni.

Tin, a rawn kal thin a awm a, tupawh sorkar se la *Ni 100 Inhlawhna* te pawh an dawng tho ang, central scheme leh CSS-ah hian a rawn pe reng tho. Amaherawhchu, a bak dil chhuah te a lo awm a, a lawmawm khawp mai, chumia kan CM hmalakna pawh a fakawm ka ti a ni. Hetia *Ways & Means Advance* kan pawh kan pawh hian thildanga sum kan sen vang a ni a. Helamah kan indaihlo em mai kan ti a, sorkar hnathawk hlawh pe hlei thei lo khan restricted tender kan inpe teuh teuh a, tu tute nge la, tu tute nge duhsak an nih tih chu kan hre reng. Chung avanga *Ways & Means Advance*-a hetia buai ta kan ni tih hi mipuiin an hriat a tul hle a ni. Chu chu kan Supplementary Demands san chhan pawh a ni. A bak chu ka kal thui tawh lovang.

Pu Dy. Speaker, hei ka rawn inbuatsaih ve deuh teuh mai a. Receipt Budget hi tlem han luh ka duh a. Thil lawmawm lam te pawh a awm a. Kan chhiah dawn tur, chhiah beisei, State-in kan beisei te pawh an sang a, 11% velin. Chutah chuan, a ti sang tu chu eng nge? Kan tui bill te, khatiang te kha a lo ni chho a. Amaherawhchu, lawmawm deuh mai chu kumin kan la hman mek, kan budget hman mekah hian power atanga kan hmuh tur beisei aia tlem kha kum tharah hian tuna kan budget chai mekah hian a rawn awm a. Chuti a nih chuan, “kan power bill te hi tihhniam tum a ni ta zawk a ni ang a,” tih a ni a. Union Budget a chhuah hian Pathian zarah hetiang lam tui te kan lo ni ve a, AIR-ah te, Doordarshan-ah te a sawitu zingah kan lo awm ve thin a. subsidy a hniam chuan, “petrol man tih san tum a ni e” tih te ngaihtuah theihin a awm thin a. Power-a sum hmuh kan beisei zat a hi a tlak hniam tak si avang hian, “power lampanga kan sum hmuh tum hi a tlem chuan, bill te pawh kan ti tlem dawn a ni ang a,” tih te rilruah a lo awm a.

Tin, thil pakhat, hei hi ka hresual nge ka hre lova. Phek 42-na receipt budget-ah khan hei hi ngun takin kan Chief Minister zahawm tak khan min lo chhinchhiah sak se la. Actual 2020-21 ah khan vaibelchhia 45 tarlan a ni a, thla hmasa khan Ministry of Finance-ah RTI ka theh lut a, nizanah e-mail ka han check-a min rawn thawnah chuan, vaibelchhia 45 bakah 93 tarlan a ni a, chu chu “Rural Local Body” a tih kha a ni. Tin,

Economic Survey-ah pawh hian Planning hovin report an siamah hian a lang bawk a, kan budget-ah hian a lang ta miah lo mai a, hei hi eng nge a chhan ni ang? Sorkar-in kan dawng hman lova, a kum leh 2021-22 ah hian kan dawng a nih chuan khatah khan rawn reflect awm tak a ni a. Finance Commission Division, Deptt. of Expenditure, Ministry of Finance-in RTI chhanna min pek thlap a ni bawk si a. Hei hi chu enfiah deuh a ngai em awka ti a, kan Chief Minister zahawm tak khan min lo chhinchhiah sak se la. Belh a ngai pawh a ni mai thei, annin official in min rawn pek e-mail chauha dawng ka ni a. Amaherawhchu, a document te chipchiar zawkin a rawn la thleng dawn a. Khulam pang report leh helam pang report kha a lo inmil lo palh te pawh a awm thei a. Kha kha kan point-out ve duh a ni.

Tin, Annual Financial Statement-ah hian, Receipt Budget a ni a, Annual Financial Statement-ah zawk hian power chungchang kha a inziak chiang a. A phek 4-naah khan, kuminah hian revised estimate-ah pawh nuai 62,500 a ni a, kum tharah nuai 58,700-ah a tla thla a. Kha kha engtin nge ni ang, engtia tih nge kan tum tih kha rilrua rawn lang a ni a. A bak hi chu ka kal thui lutuk tawh lo ang a.

Pu Dy. Speaker, Budget Speech-ah khan han luh kawih leh lawk ka duh a. Hei, i dinglam a mite hian vaibelchhia 2,632.58 hi nikum a dawn loh angin an sawi leh thin a, a buaithlak hi ka ti a. Kan inchhiar peih a kan inzir peih a ngai. Legislator kan ni a, kan tan a ngaihna pawh niin ka hria. “2019 - 20 chhoah khan vaibelchhe 867 kan dawng lo” an ti a, tin, 2020-21-ah vaibelchhe 1,093 tih a ni. Nikum a ni lo, nikuma kan dawn loh nia lang chu vaibelchhia 125.46 a ni a, hei pawh hi “dawng thei turin kan inbeisei” a la ti a ni. Tin, hei central lampah pawh 2021-22-ah “Devolution of Taxes” an tihah khan vaibelchhe nuai 7,44,785 kha State ten an insem tur a ni a. Mizoram-in kan dawn tur 0.50% a kha nikumah khan cheng vaibelchhe 2 bawr vel chauhin kan dawng pha lo a ni. Hei hi kan BE leh R receipt-ah khan lo en ula, nikum a kan sumdawn chungchang kha lo en teh u. Budget estimate aiin revised estimate ah khan kan dawng tam a ni. “Nikum a kan sum dawn a tlem, chuti, kha ti” kan ti, ‘sanghnih’ kan ti a, nikum a ni lo. Nikumah chuan kan dawn tur awm ang kha kan dawng thlap thlap a ni. Hei, a document-ah te, RTI-in central-ah pawh ka zuk zawt a, engtikah nge an dawna, engtikah nge an rawn pek tih te ka zawt vek a. Nikum a kan sum dawn ti tamtu pakhat chu, kan *ways and means advance* kha, a bak chu kan dawn tur anga kan beisei kha kan dawng vek a ni. Chhuanlamah kan hmang a, “sum harsa, chuti khati” kan ti a, a kum hmasa te, a hmasa leh, hripui awm ami thleng vaibelchhe 800 leh tih te kha kan han sawi chho zel a, khatiang a nih chuan sawi tur pawh a tam viau ang. Nikum a dawn loh ang kha chuan ti tawh lo hram ila, i inzir deuh ila tih kha kan sawi duh a ni. **(Dy. Speaker:** Minute khat kan la nei e.)

Tin, “I sawi technical thei lutuk” an ti a, technical lo deuh hleka han sawi ve te kan tum deuh a.

Hei, PM-DeviNE, nichina kan sawi ang khan vaibelchhe 600 lai mai kan han dawng kha a lawmawm a, “North East State zingah kan dawng hnem ber” tih kha a lawmawm takzet tih kha kan sawi ve duh a. Tin, a phek 10-na, “Construction of Aizawl DC Office” tih kha vaibelchhe 20 dah a ni a, kan hria ang a. Kan DC office hi *heritage building* a ni a, engtin nge an kalpui dawn chu a hriat loh a, amaherawh chu, a kang a, “a kan tukah khan an rawn phar a, an rawn teh nghal a” tih kha chu sawlai staff te pawh khan hrehawm an lo ti deuh a ni. “Helai hi rawthniama chutiang tur a ni e,” an rawn ti nghal a, an rawn teh nghal chuk chuk e tih kha report kan dawn a ni a. Helai hmun hi a nihna ngai anga tih leh te pawh hi a tha lo maw tih te kha ka rilruah a awm a. (Pu Deputy Speaker, ka zo tep e.) Hetah hian kan thil neih hluite, hlu bawk si hi kan humhalh thiam a tul hle mai tih kan sawi tel leh duh a.

Pu Deputy Speaker, RBI hian State hrang hrang budget hi an lakhawm a, zir theih turin an rawn dah thin a. 2019-20 pheh kha chu chiang takin ka lo zir a, state hrang hrang zingah development suma percentage zawngin ti ti tlahniam nasa ber te kan ni a, a dawt leh ah te pheh chuan kan han tha leh deuh thung a, a lawmawm a. Tunah hian State dangte nen khaikhinin, thil reng reng chu a that leh that loh chu thil dang te nen khaikhinna tur thil a awm vang a ni. Chuvang chuan, thil dangte nen kan la khaikhin ang a, a that leh that loh te kan la sawi ang a.

Tin, fiscal policy kan nei a, fiscal policy hi kan han duang a, document-ah a rawn awm a, budget-a kan pharh bak hi keu a ni ang em aw, tih hi ka rilru ah a awm thin a. Fiscal rules te kan han ti a, 15th Finance Commission in a tih angin, fiscal rules-a tih angin hma kan la dawn a tih a ni a, khatiang te khan kan kal em? Tin, mid-term te, medium term tih te, short term, long term te pawh ti khan budget-ah hian ruahmanna kan siam ve a, amaherawh chu a takin kan hmang em tih hi kan inzira, kan inen pawh a ngaiin ka hria a. Budget speech-ah khan nichina kan sawi ang khan, power tarlanna ni lova, a awm khawp mai. Ni e, 15th Finance Commission memorandum-ah pawh tum hnih thehluhah hydel project tihna tur pawh tarlan a ni lova, chuti chung chuan, “power kan ngai pawimawh dawn, kan intodelh dawn” tih tih hi chu a fuh ka ti lo. Tum hnih sorkar-ah, central-ah dil theihna hun kan nei a, khatah khan vawi khat mah tarlan a ni lova, chuvang chuan, hei, power pawh a rawn tarlang lova, kan rilru pawh a hriat tawh viau mai thei.

Sawi tur a tam khawp mai, Pu Deputy Speaker, amaherawhchu ka duhtawk chho mai ang a. SEDP-ah khan Economic Development Policy leh Social Development Policy a lang a, chutah chuan an document-ah “hetiang hian hma lak a ni ang” tih a ni

a, point 5-ah hmalak tum a ni a. A tir pali chu ka sawilo ang a, a tawpah infrastructure-ah khan kan vawm lut mai a. SEDP allocation kan siam tawh dan zawng zawng data pawh hi a percentage nen ka rawn sawi thin kha session hmasaah pawh, tunah chuan hun a awm tawh lo turah ngai ila, nakin ah pawh sawi ila.

Chutiang chuan a tawp lampangah infrastructure-ah kan ti thlurh a, a awmna chhan chu restricted tender inpek a remchan vang a ni. Engati nge a tir pali kha kan ngaih pawimawh hmasak loh, engati nge capacity building-ah an mahni alo dawngtu turte kan chawi kan hmasak loha, engtin nge training kan pek ang, tih te kan tih loha, kan pek tawpa, “intodelh ru” kan tih chuan intodelh a harsa ang. “Hei hi market a ni a, hemi nen hian lo inhne rem teh u, lo in be teh u,” tih tur emaw, khatianga an mahni lo tihchakna tur policy kha a awm reng si a, a tir pali kan ngaihthah a, a tawp lama tute duhsak zawng emaw khatianga atan a kan lo hmang hrep kha ka ui takzet a. Chuvang chuan, hun, kum hnih kan la nei a, hemi hun chhung hian mipuite nat ruala na thei tur hian rilru hi seng ila, kan mipuite an na a, kan mipuite an harsa a, an rual hian i pen ang u tih kha ka ngen tel duh a ni e. Ka lawm e.

DEPUTY SPEAKER : Tunge kan han sawm leh ang le? Member zahawm tak Pu Lalrindika Ralte ilo sawm ang u.

PU LALRINDIKA RALTE: Pu Deputy Speaker, ka lawm e.

Hei, kan budget lo hi kan ramin hmachhuan tur kan nei lova, a chhiat leh a that hi chu a chhawrtu mipui ten an hre turah ngai ila, budget tha a nih leh nih loh chu kan mipui ten an la hre chho turah ngai ila. Kei chuan a chhung thu lampang kha ka luhchilh vak lo ang a, ka ngaih pawimawh sawi ka duh a.

Ni e, “kan ram leh hnam tan kan pen chhuak” kan ti a, kei chuan kan inpekna hi ennawn fo hi a thain ka hria a. Tin, kan intehkhin thin hian keini aia dinhmun chhe zawkte leh hmasawn lo zawkte hi inteh nan kan hmang tur a ni lova, hmalam pan tur kan nih avangin, kan phak lohte hi um tur kan ni. “Kan thenawm state-ah corruption a tam, Mizoram chu la tha tak kan ni” tih te kan sawi thin a, amaherawhchu hma kan sawn dawn chuan, keimahni aia fel zawk, tha zawk leh dinhmun tha zawk te hi kan um tur an nih avangin, chutiang zawng chuan ngaihtuahna kan neih a tha in ka hria a. Tin, “sorkar hmasa pawhin an ti alawm” tih avanga thil tha lo tihna permit atan a chutiang hman te chu a awm thinin ka hria a, hei hi a pawl a ka ti a. Sorkar hmasain thil tha lo an lo ti thin a nih chuan, “tunah hian keini chuan kan ti ve lo ang” tih te hi kan sawi dan leh kan dinna nise a thain ka hria a.

Kan State hi kan hria a, a nihna takah chuan sum leh pai hi engti kawng maha kan neih hnuak hi mipangai tan chuan a rinawm loh hrim hrim, a theih loh hrim hrim a. A chhan engnge kan tih chuan, thawh chhuah hi kan nei tlem em a ni. Tin, tunah hian kan ram economy kan inngahna hi engnge tiin sawi dawn ta ila, a eng ber hi nge kan sawi ang tih pawh a hriat mang loh a ni, tun ah hian. Chutiang chu kan ni a, sum inrenchem hi chu kan ngai reng, kan ngai zel dawn pawh ni hian a hriat a. Tin, tun dinhmunah pheih chuan sum hi ren tur a awm em ka hre lova, ka hre ve pha lova. Mithiam ten an sawi thin chu, “sum leh pai hi a ren hun chu a tam lai hi a ni” an ti a ni. A tam laia kan ren loh chuan a tlem hnuah chuan renin awmzia a nei lova. Chuvang chuan, *management* a hi a pawimawhin ka hria a, “kan ram leh hnam tan tak tak hian sum leh pai hi i hmang thin ang u,” tih te ka sawi duh a. Tin, khawvel ram hmasawn zawk kan tih, ram changkang zawk te hian inrenchemna hi an lo kalpui nasa khawp a, chung avanga dinhmun thaa ding te hi an niin a hriat bawka a ni.

Singapore khi kan hria a, 1965-ah Independent ram an ni a, an ram hruaitute dik avangin khitiang dinhmun khi an thleng a ni. Tin, inrenchem te hi an lokal puiin an lo zir nasa a, an Prime Minister-in a sawi ka rilrua awm reng chu, kum 1973 vel khan Singapore-ah energy lama harsatna te, oil chungchangah te inrenchemna an mamawh ve a, chung zirchiang tur chuan Japan ramah kan han kal a, “Japan ram kan han thlennaah chuan AC hi 25 degree celsius aia hniamin a tih theih loh a ni” tih a sawi a. Vawiina kan awmna hmun hi eng anga vawt nge ka hre lova, 25 ai chuan a hniam ngei turah ka ngai a. Mi chuan 1975 atang tawh khan inrenchemna hi an lo buaipui tawh a, tuar hram hram tura thuziak an tar a. Chutiang chuan Japan ho chuan inrenchemna hi an lo kalpui tawh a ni.

Chuvang chuan, keini hi inrenchem mamawh tak, mamawh reng, mamawh zel tur kan ni tih hi kan hriat thar a pawimawhin ka hria a. Keini helai hmun a mi 40 awm te hi kan pawimawh em em a ni, kan ram leh hnam tan hian. Keini lo hi vauchher tur pawh tumah kan awm lo tih hi kan hriat a pawimawhin ka hria a. A nihna takah chuan tuna kan budget te, kan sum leh pai hman zawng zawngte, supplementary demand nimin a kan sawi zawng zawngte kha a hmangtu chu he sorkar hi a ni a. Chuvang chuan kan inngaihtuah nawn hi a tha khawpin ka hria a ni, kei chuan.

Tin, kan mipuite lam hi i hawi hram hram ang u. Mi nuai 11 vel lek kan awm a, inhmangaih tham lek hi kan awm a ni diktak chuan, Mizo hnam hi. Chuvang chuan, dawt te hi inhrilh kual inhrilh kual lo ila, a nihna takah chuan kan inhre vek, ‘contract’ tih te pawh hi a thawktu kan hre vek, kan tlem lutuk, kan inhrechiang lutuk. Inbum kual tum lo hian rawng inbawlsak mai ang u tih hi ka ngenna a ni.

Tin, ka rilrua ka ngaih pawimawh em em leh kan chin than, pawi ka tih chu, helai hmunah hian ram leh hnam tan kan ti a, kan pen chhuak ve a. Thahnemngaih thu ah thil tha taw lo te, kan ram leh hnam tana pawi thei thil te kan sawi chhuak ve thin a. Amaherawhchu, kan Minister-te leh kan hruiatu ten an dawnawn thin dan hi a dik lovin ka hria a. Thil dik lo hi kan do tlang dawn lawm ni? Diklo hi kan haw mang lo ni te hian a hriat thin a, dik lo zawkte hi kan tan thin ni te hian a hriat thin a. Tin, hetiang kan sawi hi mimal inbeihna ang maia dawn sawn hi a awm thinin ka hria a, a nihna takah chuan mimal takin tumah hi kan inhaw lo. Amaherawhchu, kan ram leh hnam tan thahnem kan ngai ve a, a chhe lai te kan hre ve a. Chung chu kan sawi chhuak ve a ni. *Mimal thil* a ni lo tih hi kan hriat a pawimawhin ka hria.

Chuvang chuan, a tha lo lai a awm anih pawhin kan hotute hian, “hei hi chu kan endik ang, a ti dik lo an awm anih chuan kan hrem ang” tih te hi kan tawng dan ni se tih hi ka sawi duh a ni. Vawiina kan awmdanah hi chuan sual hi kan huat loh hmel riau hian a hriat a, thil diklo nia kan hriat helam atanga kan sawi pawh namnul tak a inchhan, pawi tih hmel loh taka inchhan, “hei hi chu kan lo enzui ang, a ti diklotu chu kan lo hrem ang” ti tur kan ni. Ti tur kan nihna chhan chu, kan ram leh hnam tana pen chhuak kan ni kan ti a. Chuvang chuan, kan nih dan tur ang ngei hi nunchhuah pui ang u tih hi ka sawi duh a. Chu chuan kan budget zawng zawng hi a hril a ni.

Tin, sum leh pai hi a tam lam vak a ni lo. Ziaktu pakhat chuan, “mi i tihchhiat duh chuan a mamawh aia tam pe la, i tichhe vek mai ang” a ti a ni. Sum hrim hrim hi a ni lo tih te pawh hi kan hriat a pawimawh a. Tin, sum hrim hrim hi chu India hian a ngah lutuk, min pe zel dawn. Amaherawhchu, keini hi chu Kristian kan ni tih hi kan hriat a thain ka hria a. Sorkar zahawm i siam ang u, sorkar rintlak i siam ang u tih te hi ka sawi duh a. Sum leh pai ringawt hi a ni lova, keini chu kristian, *Pathian ringtu* kan ni. Chuvang chuan dik lo taka thil kan tiha, sum leh pai hi corruption nena dik lo taka kan tih chuan, Mizo hnam mai hi a ni lo, Pathian thleng hian kan ti bawrhbangah ka ngai kei chuan. Vawiinah pawh missionary tam tak pawh kan kal ve a Mizoram pawnah, Mizo Pathianthu sawi te hi an ring ang em tih te hi ka rilruah a awm a ni.

A tawp berah chuan Pu Deputy Speaker, mipuite pawh ka ngen duh chu, democracy-ah chuan mipuite hi kan pawimawh a, sorkar siamtu kan ni a, kan aiawh siamtu, thlangtu kan ni a. Sorkar that leh that loh te, kan hmasawna zawng zawng hi sorkar-ah a awm avangin sorkar siam hi a pawimawh a, *Sorkar-tha* siam hi kan mamawh a, chu chu kan ngaipawimawh tur a ni a. Zoram mipuite hian min rawktu tur sorkar hi kan thlang chhuak ang e, i fimkhur ang u tih hi ka sawi duh a ni. Ka lawm e.

DEPUTY SPEAKER : Tunge kan han sawm leh ang aw? Member zahawm tak Pu Vanlalhlana ilo sawm ang u.

PU VANLALHLANA : Pu Deputy Speaker, ka lawm e.

General discussion-ah hian thil chi hrang hrang, zau deuh sawi a ni thinin ka hria a. Rual u deuh te phei kha chuan, “ni hnuaiia thil awm zawng zawng hi a sawi theih vek e” an ti a, a ngaihnaawm viau thin a ni. Tun hnu hian Budget Speech-ah hian kan in-concentrate a, hemi based-in debate hi kan kalpui ta viau a, a tha zawk te pawh a ni ang a. Amaherawhchu, zau deuh hek hawkin ka thil vei thenkhat te han sawi ve ka duh a ni.

A hmasa berah chuan hmanni budget present ni khan budget speech leh budget document thenkhat sem a ni a. Amaherawhchu, a pawimawh, kan Danbu pawhin sem ngei tur a tih kha sem a ni ve lo thung a. I phalna in kan Danbu-in a sawi hi ka han chhiar ang a, ‘The annual financial statement or the statement of estimated receipt and expenditure including performance budget and detailed work programme of the Government of the State of Mizoram in respect of financial year shall be presented to the House on such day as the Governor may appoint’ a ti a.

Performance Budget leh Detailed Work Programme hi budget document a niin sem tel tur a tih zing a mi a ni. Chu chu sem tel a ni lova. Hemi Detailed Work Programme hi awm se chuan Member ten kan tangkaipui khawpin ka ring a. Tunhma deuh leh zual khan sem a ni thin a, engtik lai atangin nge hei hi sem a nih loh ka hre lova. Chuvangin kan House Leader hian khawngaihtakin min lo hriatpui ta sela, Budget a present leh hunah chuan Performance Budget leh Work Order/Work Schedule hi sem tel ngei se tih kha ka ngen duh a ni.

Tin, kan budget concern thil pakhat ka sawi leh duh chu, “vaibelchhe 2,000 aia tam covid avangin kan hmuh tur kan hmu lo” tih kha kan hre ring viau a, dik pawh a dik mai thei a. Amaherawhchu, covid avangin engzat nge kan hmuh ve thung kha mi hrih thei se ka duh khawp mai a, a tlem vak lovin ka hria a. Covid natna hripui hluar vang hian central atang khan pawisa engzat nge kan hmuh ve thung? Kan chan ringawt kha kan hre ring viau a, chu chu ka hre chak deuh hlek a ni.

Kar hmasa (zirtawpni) khan *Private Members Bill* kan sawi a, kan *hot* ang reng phian a. Khatia *Private Members Bill* *hot* ang reng taka kan sawi lai khan Governor bangla-ah thil *hot* ang reng tak a thleng ve tho a ni. Mizoram BJP chuan Mizoram sorkar hi thiaha *President Rule*-a dah kha India President hnenah an ngen a, Governor kal tlangin chu an duhna chu an thlen a ni. BJP-te khan MLA pakhat chauh an nei a, sorkar siam an tum lo tih a hriat a. Amaherawhchu, he state sorkar hi thiah ni se President

Rule-ah awm ila tih kha an duh tlat a ni. Mipui tam tak hian chu issue chu an thlawpin ka hria a. He sorkar hi hetiang leka a din renga, a awm reng ai chuan *President Rule* pawh a tha zawk lo maw tih kha mi tam tak thinlungah a awmin ka hria a. Mizoram-ah party lian ber ni lo mahse mipuite rilru hi an keng telin ka hria a ni.

Tin, Mizoram sorkar thiah ngei ngai an tihna point thenkhatte hi hetiang hian an tarlang a -

- 1) Administration fel loh avangin mipui moral a chhia. Administration a fel lo.
- 2) Dan kengkawhtute kut leh hmasawna thawktute kut phuar a ni.
- 3) Central sorkar thupek state sorkar-in a pawisa lo.
- 4) Eirukna leh dan loa sumdawna a hluar.

Khang point 4-te kha an hekna point pawimawh chu a ni ta a ni. Chung ang chu a nih avangin, kan House Leader hian heng lai thil hi fel taka mi a hrih ka beisei a ni.

Tin, thil hriatthiam loh ka nei a. BJP leh MNF-te hi *political party* ve ve an ni. Amaherawhchu, NEDA-ah an thawk ho a, party hrang ve ve an ni a mahse NEDA-ah chuan party 2-te chu an thawk tlang a ni, party dangte nen. Inthlannaah pawh an inpui tlang a, Citizenship Amendment Bill-ah pawh an in vote-pui a ni. Kan House leader hi central-ah a tlatlum em em a, a tlak tlum zia kan hria a, tunah pawh PM-DeviNE-ah crore 600 pawisa a rawn sawi chhuak a ni.

Chutih lai chuan heti laia BJP member chu opposition-ah a thu tlat lawi baw si a. Chuvangin, helaia inkaihnawih kual vel dan, tangrual baw si, tangrual baw si lo lai hi hriatthiam har ka ti a. Lehlamah central-ah kan hotute an tlaktlum viaua, pawisa an sawi chhuah tam viaua heti laia BJP MLA-te leh a party ten sorkar thiah an nawr reng baw si lai hian crore 600 lo haw tur maia kan ngaihte hi thil danglam leh thei te a ni ang em tih te, kan hlau thawng em tih te ka hre chak deuh mai mai a.

Tunlai chu ka thian kawm leh, ka awmnain a zir lo nge ni, keimahah chuan ‘Kamrul-a’ tih hi a lar em em mai a. MZP (Zirlai ho) bulah han awm ila, “Kamrul-a bo kan zawng dawn” te an ti a ho chuan, YMA chuan, “schedule tribe certificate a nei, cancel tur” te an ti baw a. Contractor bulah han kal ila, Kamrul-a hna hmuh theih ziate an sawi leh a. Chief Minister press conference-ah khan kan CM khan, “Kamrul-a chuan hna a hmu teuh a, Kamrul-a lo pawn hna an hmu teuh a. Kamrul-a hi kan duhsak bik a ni lova, kan duhsak lo bik pawh a ni lo” a ti a, beng a tiza deuh viau a ni.

Tichuan, han enchian chuan Kamrul-a hian kum khat chhungin crore 88.15 hu hna a thawk a. Kamrula nilo hna hmu teuh dang kan han hriat theih leh chu ‘Zoramchhana’ niin, chu chuan kum 2 chhungin crore 74.76 a hmu a, chu chu kan CM

unaupa fapa niin an sawi a ni. Kamrul-a hi ‘vai’ kan tih ang hi a ni a, Mizo sa a phun a, schedule tribe certificate a nei a. Schedule tribe certificate a neih chuan income tax pek a lo ngailo a. Income tax hi pe dawn ta se 30% a income atanga pek a ngai a, crore 88.15 hi a income lo ni ta se, 30% chu crore 26 hi a tling pha a ni.

Amaherawhchu, schedule tribe certificate a neih chuan chung zawng zawng chu a hum thei ta tlat a ni. Chung chu thil awm dan a ni a, hriatfiah thiam hi a har viau a ni. Kan Chief Minister press conference-a thil pakhat lo lang leh chu, “hming in hmansak a nasa lutuk e” tih kha a lo lang leh ta a. Kan Chief Minister chu dan anga rorel tur a ni a, ama rorelna hnuaiah mi tam tak hming inhawh chawpin contract hna an thawk tih amah ngeiin a sawi a. Khangte kha thil *serious* tak niin ka hria a. Contractor ni lovin contractor nih tum phet avangin hnain a tuar a, mipuiin a tawpah kan tuar a ni tih te a lang a. Chuvangin, heng hi a tirehtu tur lai ber a ni a, a hre ta sa sa bawk a. Heng laiah te hian khawng deuhin a kal thei lawm ni tihte kha ngaihtuahnaah a awm a.

Meidum leh Hortoki inkarah NABARD sum hmangin kawng laih tur a ni a. He khaw 2 hi motor kawng ruhin a kawh ve ve niin, km 19 vela hla a ni. Tunah hian kawng hlui chu chei lovin kawng thar reh pawh turin ruahmanna a awm a, Kamrul-a leh a thiantu chu work order nen an fu leh fur tawh mai a. Kawng tharah hian a kual zawk em em a, km 19 kawng hlui a nih laiin kawng tharah chuan km 27 vel a ni. Lei dawh turte a tam zawk a, pawisa sen a tam zawk a, kawng a kual zawk a, compensation pek tur nen senso hi a nasa em em dawn a ni. Chuvangin, khulaia mite chuan kawng hnai zawk, tha tho si, compensation ngailo hi laih tur niin an hre tlat a, kawng thar laih luih a nih chuan tul loa pawisa paihna leh duhsak zawngte pawisa inpeknaah kan ngai dawn tih kha an thil hmuh dan leh an thil thlir dan a ni ve thung a ni. (**Deputy Speaker:** Minute 1 i la nei e.)

SEDP ka han sawi ve lawk ang a. Socio-economic development programme hi an uluk em em mai a, MNF party hian. A committee a hranpaa din niin ka hria a, Vice President-in a ho a. An party chhung a mithiam leh experience neite thlang khawmin uluk takin SEDP hi duan chu a ni. ‘Kan flagship programme’ a ni tiin Mizoram pumah mipui min zirtir a, mipui min hneh a, chumi a lanna chu MNF sorkar lo ding ta hi a ni. Mipui hmaa min hrilh dan erawh chu, “Kan sorkar atanga session hmasa berah SEDP atan crore 1000/- aia tlem lo kan dah ang” tih a ni. A sawitu: Vice-President, a sawina hmun: YLA Hall, Lawngtlai, a sawi hun: Ni 24.04.2017, “MNF a sorkar chuan SEDP-ah crore 1500/- aia tlem lo kan dah ang;” a sawitu: Vice President, a sawina hmun: I&PR Conference Hall, a sawi hun: Ni 25.06.2017.

“Kan sorkar chuan SEDP-ah crore 1500 kan dah ang” tih Mizoram dung leh vangah an sawi a ni. He sorkar pian tirh atang hian crore 1500 hi vawikhatmah dah a la

ni lo. Chuvangin an thusawi ang hian an awm ta lo a, kan thlan chhan ang hian an awm ta lo a ni. Nakum maiah inthlanna kan thleng leh dawn a, mipui hmaah thutiam anga ding lo hi chu mipui ten engtin nge an tih dawn ni, hunin a la hril turah ngai ila.

Ni 25, November-ah khan Delhi Assam House-ah dinner siam a ni a, chutah chuan mikhual Mizoram-in kan hriat loh, Assam sorkar pawhin an hriat loh Abu Mazumdar-a a awm a ni. (**Deputy Speaker:** Budget lamah khan lut deuh ila.) *General discussion* a ni a, in ha a hawlh deuh a ni maw? Abumazumdar-a chu *smuggler* a ni a, Assam-ah *wanted* a ni a, a bo a, an zawng reng a ni. Chu chu kan hmel hriat em? kan sawm lo kan ti nain he Mizoram sorkar lo pian tirha *Swearing-in* ah te pawh khan *invitee* (sawm) zinga tel a ni. Chuvangin, “kan sawm loh, dinner-a tur khan kan sawm lo” kan ti naa, kan hmelhriat deuh a ni lo maw?

Chuvangin, khatiang ang kha kan nih chuan a mualpho thlak viau mai dawn a. Engpawh nise, kan House Leader hian khalai pawh kha min hrilh turah ka ngai deuh a ni. Ka lawm e, Pu Dy. Speaker.

DEPUTY SPEAKER : Awle, tunge kan sawm leh ang le? Pu Lalrintluanga Sailo, Member zahawm tak i lo sawm ang.

PU LALRINTLUANGA SAILO : Pu Dy. Speaker, ka lawm e.

Vawiinah Mizoram Legislative Assembly Budget 2022-2023 sawihona hun kan nei hi a lawmawm hlein ka hria. Budget pumpui ka han chhian hian, kan Chief Minister, Finance changtu ina a budget present hi a tha hlein ka hria a. Amaherawchu Pu Dy. Speaker, i veilama mite khan tha an tih loh chhan hi ka lo ngaihtuah ve nasa mai a, kan CM kan Finance changtu hian khawngaihmin min lo chhinchhiah sak sela. ‘DAH’ tih hi a awm loha vang deuh te hi a ni em aw kan ti deuh a.

Ka hmaa member zahawm takin a sawi kha a dikna chen te pawh a awm ang a, ‘Kamrula’ tih te kha eng tika tribal certificate nei nge ni tih te kha han chhut ta se la. Chutih rual chuan, anni thawh hopui an nih loh avang khan kum tam tak an buaipui a ni lawm ni, te ka ti a. Sihhmui tui lakna mahni rama lo pawt peng duh ‘*leader*’ nei te kha anni tih te kha, House-in hre tho mai ila ka han sawi duh deuh hlek a. Chutih rual chuan vawiin nia kan Leader kan Chief Minister zahawm tak term tam tak a chelhna a lo ni ta a. Khang Sundar Ali te ho te construction tam tak pe thin tute thawh hopui hlah loh avanga vawiin nia kan House Leader te hi. Mi pangai hi sap tawng chuan, ‘normal’ an ni a, mi pangai chiah lo te hi, ‘not normal’ an ni a, Vanapa Hall-a nuihza siam thintute *leadership*-na hnuaiyah kha chuan hei aia budget tha hi keini hi chuan kan beisei lo a ni tih hi chiang takin ka tarlang duh a ni.

Chuvang chuan, wawiina tarlan ‘Kamrula’ tih te pawh kha inthlan hma 2018 kum tawp lamah khan zoram chhimlah khan vaibelchhe engzat nge a thawh a, tin, khilai Sakawrdai lamah te pawh khan campaign lai khan vaibelchhe engzat nge a thawh tih a tarlang duh si lova keimahni lamah min han bel tlat thin te hi, an thawhpui leh hlauh lo vanga tih lungawi an tumna tawngkam mai a ni em tih te min ngaihtuah tir a ni

Pu Dy. Speaker, wawiiniah hian kan ram leh khawvel pum ina Covid 19 kan hmachhawn avanga ram pum sum harsatna kan tuar chung leh *Special Grant* crore 2,632.58/- ngawt mai kan sorkar, kan ramin kan sum dawn tur kan dawnglo chung pawha kan House Leader kaihhruaina hnuaiah leh hripui leng kara kan thleng thei leh, budget tha tak mai pharh a lo ni thei ta hi a lawmawm hlein ka hria a. Chutianga kan ramin pandemic kan hmachhawna a, a thawh hlawk tak tak te, thih-ngam-lu-pu a *frontline* a awm thin VLTF leh LLTF ho volunteers te, Covid duty-na avanga thih hlauhawma awm te an lo vanduai palh taka ex-gratia, compensation scheme atanga pek an nih thute leh, mimal pakhat vanduai pawh ina cheng nuai 20 ex-gratia an lo pek tawhna thute leh, pek zel tum a nih thu he budget speech-a lo lang hi, “hei aia tha hi a awm chuang emaw ni chu aw” ka ti a, chuvang chuan a lawmawm hlein ka hria a ni.

Chu bakah chuan, 15th Finance Commission rawtna anga *health grant* vaibelchhe 31.19 dah a nih thu lo lang te hi a lawmawm ka ti a. Chumi ina a tum ‘Health sub-Centre’ hi keini thingtlang lam bialtute tan phei chuan a ropui hlein ka hria a. Health sub-Centre, PHC leh CHC tih changtlunna atan te leh health infrastructure facility tih changtlun leh hmasawna zel atana hmalak tumna lo lang te hi a lawmawm hlein ka hria a.

Tin, Zoram hmun hrang hranga irrigation project kalpuina tur atana cheng vaibelchhe 10.47, kan budget session zoh mai atanga hmalakna nghalna tur lo lang te hi keini thingtlang bialtu tan chuan lawm lohna chi a ni lo tih hi ka sawi duh a, i veilam a mite “khan lawmna tur a awm lo ve” an ti deuh kha niin ka hria a, heng semzaina lo lang hi an vui leh mai lovang maw tih te min ngaihtuah tir a ni.

Tin, a dawt lehah chuan, Mizoram Health System Strengthening Project atan a cheng vaibelchhe 280/- ngawt mai kalpui a nih bakah Mizoram State tana kan la hriat ngailoh *Super Specialty Cancer Hospital Project* cheng vaibelchhe 500/- ngawt mai lo lang te hi, an mit a del deuh emaw ni chu aw kan ti a. Mizo zingah hian cancer kan tam si a, khang enkawlina tur atana heti zat zat mai lo lang te hi chu lawma, kan bawp hi kan beng thlenga khai tur kan ni lawm ni tih te ka ngaihtuah deuh a ni.

Tin, chubakah chuan, UD&PA tan bika hmalakna, *Sustainable Urban Transport Project*-in Aizawl City atana cheng vaibelchhe 1,958.70 ngawt pawm a nih thu te a lo

lang a. Heng hian kan khawpui cheimawi anih nasat tur zia hi mitthla pawhin a suanguah thiam lo a ni tih ka tarlang duh a ni.

Tin, misual kut tuarte hnenah emaw, an chhungte hnena pek tur atana *Mizoram Victims of Crime Compensation Fund* budget-a a lo lang te hi, kum hei leh chen hi kan ni ve tawh a, thil kan la hriat ngai loh a ni. A va han lawmawm em! Michhiate harsatna tam tak crime avanga tuarte chhuichhuah hleitheit siloh, khulai Sihhmui daia inkah hlum palhna lo thleng ta tun thlenga la chhuichhuah loh, khang victim-te tana budget-ah chanvo an neih tur thu a lo lang te hi a va ropui em ka ti a ni. Chuvang chuan, heng budget hi a tha ka ti hlein ka support a.

Tin, Social Services Sector atana vaibelchhe tam tak lo lang te hi kan ram hmasawna tur a ni tih hi vawiiniah hian sawi luai luai chi a ni tih hi ka tarlang duh a ni, Pu Dy. Speaker.

Tin, SEDP atan cheng vaibelchhe 700/- a lo lang te hi a lawmawm hlein ka hria a, heng hi a nihna taka sawrkar hmasa lama ‘NLUP’ ang ni lova, a nihna tak, kuthnathawktute thleng tura hmalakna a lo lang te hi a lawmawm ka ti a. Kan hmuh tawh ang, NLUP dawngten a chi supply Bhavan atanga an thlan ang ni lova, kan House Leader-in a puan tawh anga an account a lut chat chat tur ang chi, hetiang lo lang hi a lawmawm ka ti a. Chuvang chuan, hmalam ding taka ena kal ngut ngut lova, he sorkarin, Bible-a kan hmuh ang deuha, “Iamliah leh daiah” tia hmasawna lampang an hawl kimna tur atana hmalakna hi a ropui hlein ka hria a ni

Tin, kan thalai lehkha thiam beiseiawm te, ‘lehkha thiam’ a ti satliah lova, ‘beiseiawm-te’ tih tawngkam uluk tak a dah hi a ropui ka ti a. All India Service emaw, Central Service emawa kan tling theihna tur cheng vaibelchhe 2.60 dah a ni te hi thalaite tan chuan ‘chona’, a challenging hlein ka hria a, a lawmawm ka ti a, hei hian kan thalaite tan ngaihtuahna thar a siam ngei pawh ka beisei tlat a ni.

Tin, India rama rorelna sang ber mai ‘Parliament House’ kan tih, kan sawi luai luaia kan MP zahawm tak tak ten kum 2 chhung ngawt mai Area Development Fund an neih theihloh laia keini, ‘State rethei’ kan tih foa kan House Leader-in kan dinhmun hrechianga, a budget speech-ah meuh Area Development Fund atana pawisa min han dah leh te hi a alawmawm mang e aw ka ti. Keini thingtlang bialtu tan pheii chuan kan fund hian thil ropui tak a ti thei a. Chuvang chuan, i veilama mite khan lawmna chang an hrelo a nih chuan hei tal hian beng harh sela tih hi vawiin hian ka chah duh takzet a ni. (**Deputy Speaker:** Minute khat i la nei a.)

Pu Dy. Speaker, ka sawi leh duh chu, hmasawna atana mahni power pawh dah thaa election laia kan slogan dik tak mai he budget bu-a lo lang ta, kan thuneihna te han sem zai a, 'decentralization' tih scheme hmanga Lunglei khawpui, chhim lama kan capital pui tak maia Municipal Council dinna atana cheng nuai 80 dah a nih te hi a lawmawm hlein ka hria a. Nakinah Lunglei lam hi veilama mite hi an la zin duh ang a, hengah tal hian lawmthu sawi teh se a, nakinah an hnar kan hmu lian ang tih ka hlauhpuideuh a ni.

Chuvang chuan, wawiinniah hian sawi tur tam tak a awm a, Local Body Grant te, chutiang chuan kawng hrang hrangin he kan budget-ah hian lawmna tam tak, kan ram mipuite tana chhawp chhuah a lo ni tih hi a lawmawm hle a. A bik in heng Animal-feed distribution system-a hmalakna tur lo lang te, a tam mai, hmanni lawka vanduaithlak taka kang ta kan DC office thawmthatna tur atana cheng vaibelchhe 20 lo lang te hi a mawhphurtu tak tak nihna thilung pua he budget bu hi buatsaih anihzia a lang chiangin ka hria.

Chuvang chuan, he budget, kum 2022-23 atana kan House Leader zahawm takin a rawn pharh hi lungrual taka pass-pui turin he House hi ka rawn ngen a ni e. Aw le, ka lawm e.

DEPUTY SPEAKER : Aw le, hei, sawihona kan han nei chho zel a, kan budget chhungah khan luh hram hram tum ta ila, ringtute kan ni a, kan sawihonaah pawh hianin ringtute hmel anga debate kan neih te pawh kha a mawiin ka ring a, Zoram mipuiin min thlir reng a ni tih te pawh kha rilruah awm reng se a tha awm e. Tunah chuan Member zahawm tak Dr. K. Pachhunga ilo sawm ang u.

DR. K. PACHHUNGA : Pu Deputy Speaker, ka lawm e.

Hei, wawiin chu ni hnuai a awm zawng zawngte kha kan sawi mai dawnin ka hria a. Mihring hi mak deuh mai kan ni a, vawk talha a kawchhung leh a nak sah duh lem lo, a misa leh a a uih lai duh hi an awm ve tlat a nia. A chhe lai sawi ve hrim hrim mihring hi kan awm a, Pu Deputy Speaker.

Hei, thuhma han nei ta ila. Zoram dung leh vang, chhim leh hmar, chhak leh thlang, kan kal a, kan hria a, sawtah Zorinpui-ah, lawng chawlhna, khi lampang Singapore kan tih te, Mizoram hmasawna tur Kolkata te, Inland Waterway atanga engkim transportation awlsamna tur hi a insial ruak a, nasa takin kan Chief Minister hnuai he sorkar a lo din leh hian harsatna sorkar hmasaa an tih theihloh kha tiin, wawiinniah kawng an lai nasa a, kan hre vek a, mi pangngai leh mitha te chuan tha an ti a ni. Nimahsela a lalna leh thuneihna it vang hrim hrima lo sawisel pawl hi chu an hria a, an

awm ve tih chu a hriat a ni. Chutihlai chuan khitah Champhai lamah hmannah kan kal a, kawngpui dungte chu alo pherh pheng phung a, kawng a lo zau nuam a, nasa takin khilamah hmasawna a lo darh zau nasa a ni. A lo zau a, kawng kha a tha dawn em em a.

Tin, Vairengte lamah kawngpui lian a rawn chhuak leh dawn a, Tlabung kawng chhe hlun pawh vawiin niah chuan laih zau tumin ruahmanna an nei tan tawh a. Tin Aizawl, Thuampui - Tuipang te, ka bial pawh kalna hrehawm lutuk thina kha vawiin niah chuan kawngpui nuam leh zau tha takah kan kal tan ta a.

Tin, Chawngte tlangdung pawh kalkawng hrehawm lutuk kha vawiin niah chuan zuk kal teh u, kawng nuam, lian leh zau a ni. Chuvang chuan, he sorkar hian vawiin niah chuan mipuite tan inkalpawhna tha, kawng a that chuan miretheite leh harsate pawhin kan tangkaipui a, damlo leh accident thlengin kan tangkaipui takzet a, mipui tan hmasawna ropui tak he sorkar hian a ti a ni tih kha kan budget chhunga mi tho a ni.

Tin, hetah kan han en a, SEDP-ah, 700 chhungah kawngpui repair-na nuai 50 a han awm te, vaibelchhe 50 kan dah a, kan duh duh kan sawi dawn chuan sorkar liam taa kawng chhiat zia te pawh kan hre vek a, kohhran palaite meuh pawh kawng chhiat avangin an insawhlum tih te pawh kan hria a ni. Chutiingin, kawng a chhe viau e ti ti lo ila, truck thlawk thei te pawh a awma lawm le, kan sawi zel duh te chuan. Chuvang chuan, thu hlui lamah kan tui lutuk a, kan mipuite rilru kan ti hrisel lova, kan thuneihna leh lalna inchuh lutuk avang hian thil diklo leh fello hi kan sawi nasa lutuk hi mizo mipuite mentality, kan rilru tha lutuka hi kan hruai sual nasa lutuk a,

Kan hriat angin khawvelah hripui a leng a, America meuh pawh a buai a, ei leh bar a buai a, mihring an thi a, Europe pawh an ni vek a. Chutih laia kan State pachhiat zia te, hotute rilru hah zia te, a khawl kan neih loh dan te engkim kan hre vek a, mahse kan hotu ten thlantui farin theih tawpin, mutmu pawh tuah lovin ram tan, sawiselna karah, elrelna karah, mipui tan an phur a, vawiin niah Pathian-in min veng a. Tih emah chuan, ‘sorkar tha’ a tih loh theihloh a sin; kawngpui siamah nasa takin improvement a awm a, mipui ta a ni. Tin, eng (power supply) pawh kan tha, gas leh buhfai, ei leh bar, kan production sa leh thlailahte pawh nasa takin alo tha a, ‘a tha a ni’ tih entirna, chu Highway an dang a, ramri buaiah, Pathian zarah kan nghei lo a ni.

Tin, kan ramin harsatna a tawhzia pawh kan hria, ram hmangaitu, ram hruaitu kan tihte tanrual a hun zawk a ni. Vawiin niah Russia-in Ukraine a run kan hre vek a, Ukraine-in ruah thimpui a tawn laiin an tangrual a ni. Keini chu hripuiin min nuai a, ramriah Assam ram nen kan intibuai a, mikhual tam tak kan nei a, kan ram hruaitute luhai zia leh harsat zia kan hria a, central pawh a lo pachhe ve deuh a hripui avangin,

kan sum hmuh turte pawh duhangin kan hmu lova, chuti chungin, kan House Leader chu *Pa-ber* chan changin, experience leader kan nei a ni. Chuvang chuan, vawiin niah hian sorkar kal tate ngaihtuah chuan kan nuamsa a ni. Mahsela mimal tinte income chu hripui avangin, lockdown avangin a chhe deuh vek a, dawr pawh kan hawng thei lo, kan hria e. Chung harsatna chu remchangah lain, mipui rilru hi kan ti hrisel lo nasa a, hei hi chu a thalo a ni. Pathian-in tul atih hunah leh tha a tih hunah chuan, power chu mi pakhat ta a ni lo, power chu a kual a kual a ni, chu chu *mipui decision* tur a ni. Heng harsatna kan tawn zawng zawngte ngaihtuah ila, ruahtimpui leh harsatna kara kan awm pawhin, kan budget hi han en ila, *hmasawinna* a tak pawhin a awm a ni.

Ka bialah ngei pawh hmasawinna a awm a ni. PHC te kan sa dawn a, RMSA High School nei ngailo te, Plus-II nei ngailo thingtlangah an rawn nei dawn a. Godown nei ngai lovin Godown eng emaw zat kan nei a, chutih lai chuan sub-Centre te leh Health & Wellness mipui hriselna te kan ngaipawimawh a, theih tawp kan chhuah a ni. Tin, thingtlangah kan hria a, tui a harsa lutuk a, kan hotu ten theih tawp chhuahin central scheme nen, vawiin niah thingtlang rural area zawng zawng hi tui hnianghnar pek tum mek leh hmalak mek a ni. Ka bialah ngei pawh solar pump eng emaw zat kan nei dawn a, he sorkarah hian kan lawm takzet a ni. Lunglei South bialah pawh lut ila, kan budget chhunga mi, UT atanga sorkar hmasa thleng khan Chawngte tlangdungah MNF an sorkar ngai lova, vawiin niah kan sorkar kum thum harsatna karah hian school tawih nasa lutuk pawh hi kan siam nasa tawh a, kan lawm a ni. Chuvang chuan, kan budget hi tha kan ti a ni.

Hei, kan hriat angin Aizawlah traffic a jam a, kan phun luai luai a, nuihza fiamthu thawh nan te pawh kan hmang a ni. Mahsela mi rinloh takin Pathian malsawmna budget-ah lo langin cheng nuai 50,000/- by-pass road siamna tur kan nei te hi, khawpui traffic jam solve tur chuan by-pass road hi no.1 a tih tur a ni. Tin, by-pass road that turzia chu kan hria a. Aizawl zauhna te pawh a ni ang a, huan ram te pawh a ni ang a, Chutiangan Bamboo Link Roads pawh pawh fiamthu thawh nan kan sawi. Mahse, mi state-in an dil ve theih loh leh miin min nuihzatna hi Pathian-in mal a sawm a, kan hotute kaltlangin cheng nuai 1,00,000 kan lo neih dawn ta a. Bamboo link road hi mau phurhna chauh a ni lo, tuipui nul zawl te, leilet siam nan te, huan kawng zawng zawng ei leh bar intodelhna, Zofate chawikanna, kuthnathawktute chawikanna tur keng tel budget tha a ni.

Tin, Pu Deputy Speaker, Mizoram-ah cancer kan buaipui a, tih ngaihna a awm lova, kan nunna suattu hnem ber a ni. Kan neih bak bakin phaiah kan kal a, Mizoram budget leh sorkar sum ei hektu pawh a ni. Medical re-imburement-a kan harsatna solve tur chuan kan hotute hmalaknain State Super-speciality Cancer Hospital cheng nuaih 50,000/- zeta SEDP atanga din te hi ram hnuk a ni a, mipui mamawh a ni a. Mipui

mamawh ei leh bara kan intodelh theih nan SEDP te hun khirh, thim leh harsa karah *nu leh pa* nih tling takin sawichhiatna karah hma kan han la te hi a tha a. He budget hi a tha takzet a, mipui budget a ni a, mipui rethei leh hausate budget a ni a, thalaite leh zirlaite budget a ni e. Pass ngei ni se tih kha ka han sawi a ni e. Ka lawm e.

DEPUTY SPEAKER : Tunah chuan Member zahawm tak Pu Zothantluanga ilo sawm ang u.

PU ZOTHANTLUANGA : Pu Deputy Speaker, ka lawm e.

Vawiinah hian kan Chief Minister, kan Finance Minister ni bawk zahawm takina ni 24.2.2022 (Thursday)-a budget a present kha *General Discussion* hun tha tak mai kan nei a, a lawmawm ka ti a. Hripuiin khawvel min tibuai a, Mizoram chu sawiloh, India ram leh khawvel ram hausa tak takte pawhin hemi avang hian sum leh paiah te, ram economy-ah te an tuar a, mi tam tak an boral a. Ram ropui tak takte pawhin nasa takin an tuar a, an thih phah a ni. Hri avanga kan tuar mek laia he budget buatsaihtu han nih hi a hautak hlein a rinawm a, budget tha leh ropui tak beisei pawh a harsain ka hria. Amaherawhchu harsatnain khawvel a chimbuai laiin kan Chief Minister inpekna, ‘a luhlulna’ te pawh kan ti ang chu, central a nawr natna te pawh a ni ang a, he budget a lo pian hma hian Union Budget-ah chuan nuaih 50,000/- Mizoram tan, Aizawl by pass road atan serhhran a lo ni ringawt mai pawh hi he budget ropuina, fak loh theihlohna a ni a. Hei hian kan harsatna tam tak a la solve dawn a ni tih te pawh hi a hriat a.

Tin, kan economy sawihdarh dawrh khawpin mau chungchanga mau pum kawng, ‘bomboo link road’ laiha tur, a chi atana nuaih 10,000/- a rawn serh hrang ringawt te pawh hi a ropui ka ti a. Chuvang chuan, budget buatsaih huphurh awm lai taka hetiang budget tha kan Finance changtu kan Chief Minister hi fak loh theihloh niin ka hria a. Chuvang chuan, he budget hi lawmthu sawina tur pakhat niin ka hria a.

Tin, Pu Deputy Speaker, tun financial year, sorkar kum kal mekah hian *capital expenditure* atan kan budget pumpui atangin 17.33% dah a ni a. Hriin min la tibuai reng a, harsatna kawng hrangah kan la tawk reng chungin sorkar kumthara *capital expenditure* tur 28.57%, hmasawna tak tak hnathawhna tur atana kan budget pumpui atanga heti zat a dah theih te hi a ropui ka ti a. Heng hrileng te leh harsatana chi hrang hrang hian min chim lo se la, hei aia hmasawna tur hi a dah ngei ngei ang tih hi ka ring a ni.

Pu Deputy Speaker, SEDP kan sawi a. Ni e, MNF Sorkar tirh atangin a ngai pawimawh em em a, 2020-2021 sorkar kum atanga dah chho tanin tiang khan nasa takin inbuatsaih a tum a ni. Nimahsela, 2019 kum tawp lamah chuan China ram Wahun atanga

hri lo chhuak khan kan sorkar-in a beisei ang leh tum angin a kalpui thei ta lova, chutichung chuan a theih ang anga hmang tangkaiin kan sum neih ang ang te a hmang chho a ni tih kan hria a. Kan sorkar hmasaah kan hria a, kum 2008-ah sorkar a intan a, an *flagship programme* NLUP chu an sorkar hnu maia sem tura sawi kha 2008-ah sem a ni lova, 2009-ah pawh, 2010-ah pawh, 2011-ah pawh; 2012 January ni 14-ah an sem tur thu an puang chauh a. Chumi Financial Year-ah chuan pawisa te dahin financial budget zawha April thla vel atangin an sem tan chauh a ni tih kha kan la hre ve reng a ni. Khatah khan hriin harsatna a thlen ve lova, chuti lain tunah hri nasa tak kara lenga harsatna kan tawh chung pawhin, wawiina kan Chief Minister, kan Finance Minister ni bawkin hetiang tun financial year, sorkar kumthar atana crore 700 ngawt mai a lo dah thei hi chu, budget fak loh theihloh, sawimawi loh theihloh niin ka hria a. Chuvangin, he budget-ah hian lawmthu sawi loh theihloh niin ka hria.

Tin, a hmaa kan sawi tawh ang khan, India sorkar, kan sorkar pui berah pawh harsatna a thleng a, kan MP ten *Area Development Fund* pawh kum 2 an nei lo a ni. Chutiang khawp chuan central sorkar pawh a inhrek a, keini pawh hi min hrek ve dawn emaw ni chu aw, kan bial theuhte tana *Area Development Fund* hman tur hi kan nei lo mai awm mang e aw ka lo tih laiin a kim biaiin, cut lovin crore 60 min han dahsak te hi MLA zawng zawngte tan hian a ropui ka ti a. A bik takin keini ang bial, hmasawna thawh tur tam tak, kan kum khat fund pawh hi veng pakhat a kan pek pawha hmasawna la thawh zawh theihloh tur a nih laia tun anga min rawn dahsak hi a lawmawm ka ti a. Tin, civil service-ah kan mizo nula/tlangval-te hun rei tak an lang lova, mipui tam berte hian an vei em em a, kan hre theuh mai a. Chuvang chuan, kan thalaiten central civil service-ah hun tha an neih theihna tur atan MYC-ah crore 2.6 min han dahsakte hi kan thalai nula/tlangvalte tan hian a va hlu em ka ti a ni. Thalai 100-te inbuatsaihna tur leh central service-a an luh theihna tur leh an hmachhawn theihna tur atana hetiang kan hotupain thalaite ngai pawimawha a rawn dah hi a lawmawm ka ti em em a ni.

Tin, Pu Dy. Speaker, “*decentralisation of power*” tih hi kan hotuten an ngaipawimawh em em mai a. Kan khawpui pahnihna kan tih thin Lunglei-ah Municipal Council-a lo piang turte, hemi inbuatsaihna tur atan a ₹80,00,000/- dah a lo ni leh, a tul ang zel a dahbelh a nih theihna tur atan a indelkhilh nghal a budget a rawn buatsaih hi a lawmawm ka ti bawh a ni.

Chuvang chuan Pu Dy. Speaker, wawiin hi budget general discussion kan neih laia public meeting emaw tia mahni duh duh sawi a mipui kan play lutuk deuchte hi, kan thil tih tur hi kan hre lo a ni lo maw tihte ka sawi duh a ni. Sawi tur tam tak a awm naa, Pu Dy. Speaker, ka lawm e.

DEPUTY SPEAKER : Tunah chuan member zahawm tak Dr. Vanlaltanpuia i lo sawm ang u.

DR. VANLALTANPUIA : Pu Dy. Speaker, ka lawm e. Kan Chief Minister zahawm tak, Finance Department changtuin kar hmasa Ningani a he House zahawm tak a budget a rawn pharhte vawiinah sawihona kan lo nei leh thei tur hi lawmawm ka ti a. Sawi ve duh thenkhat ka nei a. Mizoram pawisa hman tur zawng zawng crore 12,290.63 pharh a ni hi lawmawm ka ti a. Hei hian Mizoram mipuite tan hmasawna tam tak a thlen dawnin ka hria a ni.

Covid-19 avangin, sawi loh theihloh a ni a, member zawng zawngin an sawi tawh a, harsatna namenlo kan tawh a, kan state hi a tuar nasa berte zinga mi kan ni ngeiin ka ring a, tun thlengin kan test rate a san avangin positivity rate pawh a sang em em a, chu chuan lockdown leh inkhuahkhirhna hrang tam tak kan kalpui a, chungte chuan kan state economy-a nghawng em em mai a, chu chu kan state economy-ah hian a hriat zual em em a ni tih kha ka han sawi hmasa duh a.

Chung kara kan Chief Minister zahawm tak, Finance Department changtuin heti zat mai budget Mizoram mipui tan a rawn dahchhuak hi a lawmawm kan ti a. Tin, Finance Department-te pawh an inbuatsaihna a fakawm hlein ka hria a. Tun tum budget-ah hian thil sawi chak tak tak ka nei a, chungte chu han tarlan ka duh a.

Kan sawi tak ang khan kan pawisa hmuh hi a tlem em em mai a, kum liam ta khan crore 2,632.58 lai mai shortage kan neiha kan hmuh tlem a lo nih tak avangin, economy kan inrelbawlina tam takin a nghawng thei a, chung chu kan la tuar chho zel a. Amaherawhchu, he budget tharah hian lawmna tur thil tam tak kan CM hian a rawn phawrh chhuak hi a lawmawm ka ti a. Kan budget hi *tied* fund leh *untied*-fund in then a ni thin a, untied bikah hian crore 6592.24 lai hna thar thawhna tur, kan state-in kan duh anga kan hman theih tur an rawn dah te hi, kan state hian hma kan sawn pui ngei dawn a ni tih hi he budget-ah hian a lang a ni.

A dawt lehah chuan Pu Dy. Speaker, he budget-ah hian thil thar tam tak awmin ka hria a. Kan state hian than tumin he budget kaltng hian hma a la a ni tih hi ka sawi duh a ni. Chung zingah chuan, nidanga kan la neih zen zen loh “Mizoram Resource Mobilization Committee” leh “Manpower Assessment Committee” din a lo ni hian kan department-te hian Mizoram thatna turin ngaihtuahna an seng a ni tih hi a lang a. Hei hi hun rei tak atanga ka lo vei ve thin a ni a, Mizoram-a resource kan neih hrang hrangte zirchiana, chung management-te chu a tul em em a ni tih hi ka lo ngaihtuah thin a ni a. Kan Chief Minister zahawm takin Mizoram Resource Mobilization Committee-a din hi a lawmawm ka ti em em a ni.

India Today Chanchinbu hian 2003 atang khan “State of the States” an ti a, India ram state-te inelna tur ho hi, an economy-ah te, an than dante chi hnih a thenin, pakhat chu - ‘Best Performance State’ tih te, pakhat chu, ‘Most Improved State’ tih tein tehna hrang hrang neiin zirchianna an nei thin a. Chung zingah chuan heng state ti tha zual ho, tunhnaiah chuan Tamil Nadu te, nikum atan Bihar hi state lian zingah chuan ti tha ber an ni a, khami hma kum 4 kha a zawnin Tamil Nadu hi an ni a. State teho zingah hian Mizoram pawh 2003 atang khan kan tel zing viau mai a, 4-na, 5-na, 2-na-te kan ni a, 2021-ah hian *Most Improved State*-ah hian 2-na kan ni a, *Best Performance State*-ah hian 4-na kan ni bawk a ni.

Chuvang chuan, Pu Dy. Speaker, kan state hi a hniam zawk zawk lo a ni tih a langin ka hria a, kan *data* hian a sawi chiang em em mai a. I veilam a miten han sawichhe chiam thin mahse kan state hi a hniam hran lo a ni tih hi a langin ka hria a. He kan budget-ah pawh hian *than tum budget* hi phawrchhah a niin ka hria a, ka lawm em em a ni tih hi ka sawi duh a. Tamil Nadu leh Bihar-ah te hian Economic Advisory Committee te an din a, chungte chu an thatpui em em mai a, an state-a ngaihtuahna hmang tak tak hote hi an dah thin a, state-in nasa takin hma an sawnpui a ni.

Chutiang deuh bawk chuan kan Chief Minister zahawm tak hian a budget-ah hianrawn tarlangin, Mizoram Resource Mobilization Committee leh Man Power Assessment Committee a han din hi kan thatpui ngei dawnin ka hria a, ka lawm em em a. A chhunga *a fact and figure*-a hmuh theih ang chi hi chu sawi vek hman a ni lova, kan state budget ruangam ka zuk en hian *hmasawn tum budget* a ni tih hi vawiinah hian ka sawi duh a ni.

Tin, *investment* leh *disinvestment*, kan state budget-a ka la hmuh ngai loh, session-a kan han thut ve hi kum 3 a lo ni ta a, la lang ngai miah lo kuminah hian hmuh neiin ka inhria a, chu chu ‘disinvestment’ tih a ni. Hei hian min tilawm em em a, kan Resource Mobilization Committee zirchiangtu hote pawh khan han en se la, kan state-ah hian *liability*, sorkar-in kan enkawl thil tam tak assets hote hi *liability* ni hi a awm tam em emin ka hria a. India ram hian tunah hian 2021 budget-ah hian *Asset Monetization*, National Monetization Policy-a kalpui a, chung zingah chuan, kan hria a, Air India pawh tun hnaiah chuan hralh a ni a. Tin, Pu Dy. Speaker, hengho hi ‘limbo’ ti mai ila, la tihchian loh, mahse a hnua la enchian leh tur ho, entirnan, Life Insurance Corporation tih te, Roads, Railway, Telecom, Power Transmission, Ware Housing, Aviation, Mining, Sports, Natural Gas Pipeline, Urban Real Estate, Sports Stadium hrang hrang-ah te, Petroleum pipelines-ah te hian central hian hralh chhuaha disinvest a, chuta tanga pawisa hi 2021-2025 inkar chhungin vaibelchhe nuai 6 hi central sawrkar hian hmuh tumin hma a la mek a ni. Keini state rethei te pawh hian *disinvestment* leh *investment* lamah hian kan sum leh pai tam tak hi tipung zawnga kan che thei lo deuh a

nih pawhin, *disinvest* tur hi tam tak kan neiin ka ring a. State-in liability tam tak kan neih hi a awm a, chungte chu ti tha tur chuan ‘disinvestment policy’ hi lak a ni tih hi kan budget speech-ah hian a rawn awm a, tawngkam pakhat te hi. Hei hian min ti lawm em em mai a, kan state-ah hian zir chian ngai thil tam tak sawrkarin burden-a kan neih hi thil tam tak awmin ka hria a. Hei hi kan budget hian a rawn address ta hi a lawmawm ka ti em em a ni.

State te zingah tunhnaiah January thla pawh khan GST pekna-ah hian Sikkim hi an tha em em mai a, Mizoram hian kan tluk miah lo mai a. Ka han enchian chuan *investment policy* an lo la nasa em mai a, chungah chuan pharmaceutical industry (damdawi siamna hmun) lian pui puite an lo ngah em em mai hi a lo ni a. Chuvang chuan, investment lamah hian Sikkim state pawhin hma a lo la a, chutiang chuan state dangte pawh hian investment policy lian tak tak an lo nei a. Chu mai bakah chuan disinvestment policy chu an la la leh zel ta bawk a. Hengte hi kan zir chian a ngaiin ka hria a, chumi zir Chiang tur bikte pawh kan budget-ah hian a rawn lang ta hian mi tilawm em em mai tih hi ka han sawi duh bawk a ni.

Tin, Pu Dy. Speaker, leiba chungchang *gross fiscal deficit* hi kum 2022-2023-ah hian 3.07% ni tur anga chhawp chhuah a ni hi ka lawm em em a, kan hriat angin kum kal mekah hian Covid harsatna avangin kan fiscal deficit hi 5.20%-ah a lo kal a, mahse, hei hi central-in *relaxation* leh *amendment*, FMRBX te a mendment a rawn phal tak avangin chumi mil chuan tlemin inngaihnhathiamna chu a awm deuh a. Amaherawhchu, fiscal responsibilities 7, budget management act-in a him chin leiba hi financial year khat chhunga tan “GSDP atanga 3% below ni rawh se” a tih hi kan hnaih hlein ka hria a, 3.07% a lo ni hi kan state leiba a rawn ziaawm hle dawnin ka hria a. hei hian min tilawm em em a ni tih hi vawiinah ka han sawi duh a.

Pu Dy. Speaker, he rorelna khawla kan thut hian kan ngaihtuahna tak tak hi kan seng tur niin ka hria a. Kan debate te pawh hi politics thila inkahna mai mai ai hian, *kan state thatna oriented debate*-te hi kan dah chhuak em tihte hi niin ka hria a. Chung support-tu atana thil pawimawh pakhat leh chiah han sawi ka duh chu (**Deputy Speaker:** I hun a tawp a) Pu Dy. Speaker, tawngkam khat leh chiah.

Kan thenawm state West Bengal pawh kan hria a, an lo thang em em mai a tunhnaiah hian. America ramah chuan an nei a, ‘silicon valley’ kan tih ang deuhin “Bengal silicon valley technology hub” te hi an lo din nasa em em mai a, *Ease of doing business*-ah hian an lo sang chak em em mai tih han hmuh hian a rualawhawm em em mai a. Tun tumah pawh hian Commerce & Industries Minister pawh hian *ease of doing business* Bill te pawh hi tun session-ah hian rawn putluh a tum niin ka hria a. Chung zawng zawnga ka han sawi duhna chhan chu, he state budget atang hian than tum hmel

hi hmuin ka inhria a ni tih hi vawiin hian ka hn sawi duh a. PM-DeviNE scheme-a kan hnathawhna tur hrang hrangte, Health facilities hrang hranga *strengthening project* lo kal tur te hi a lawmawm em em a.

A tawp ber tak takah chuan, Mizoram thalai zawng zawngte aiawhin kan Chief Minister zahawm tak Finance changtu hnenah he budget atana MYC-a All India Service leh Central Service-ah te kan tlin theihna tura pawisa tam tak min han dah sak hi lawmawm kan ti a. Theihtawpin thalaite hi hmasawnpui turin kan inbuatsaih a, he budget-a min rawn reflect sak leh min tarlan sak hi kan lawm em em a, mizo thalai zawng zawng aiawhin lawmthu ka han sawi tel bawk a ni e. ka lawm e.

DEPUTY SPEAKER : Awle, tunah chuan member zahawm tak Er. H. Lalzirliana i lo sawm ang u.

ER. H. LALZIRLIANA : Pu Dy Speaker, ka lawm e. Tlem han sawi ve ka duh a, chi hnihin ka sawi ang a. Pakhat chu figure analysis leh general deuhin sawi ka tum ang a. Duh angin ka sawi rang thei lo mai thei a, min lo hrethiam dawn nia. Sawi tawh tam takina an sawi, kan budget hi khakhintu, khaikhinna kan neih loh chuan a that leh thatloh emaw, engnge min thlenpui a tum tih kha kan hre thei dawn lova. Nikumah khan budget kan sawiho tawh a, budget tha tak kha present a ni a, tunah hian a aia tha leh zual present niin ka hria a. Chu chu a hmasaa mi nen tlem han khaikhin thain ka hria a.

A pumpui thuah 2021-2022 leh 2022-2023-ah hian budget a punna hi 25.65 % a ni a. Chutah chuan sawi tawh tam tak ten kan sawi thin, “revenue expenditure a sang a, capital expenditure a hniam leh si” tih te, tun budget-ah chuan capital expenditure hi nikum khaikhin chuan rawn sang tak a ni a, nikum khan revenue expenditure 2021-2022-ah khan budget pumpui atangin 82.67% a ni a, capital budget chu 17.20% a ni. Kuminah hian 2022-2023 revenue expenditure hi 71.43%, budget pumpui 14,08,008.15 crore atangin a ni a, tichuan, kuminah hian capital expenditure hi 28.57%, nikum khan 17.20% a ni. Chuti a nih chuan, capital budget-ah hian a zuang dawrh a, a let deuh thawin a rawn sang a ni tih kha ka han sawi lawk duh a.

Receipt-ah hian kan dawn tura kan beisei ho *recovery of loans & advances*-ah hian 33.61 crore kan beisei a, state-own tax revenue-ah 801.30 crore, state own non-tax revenue-ah 836.43 crore, a vaiin 1,671.3 crore a ni a, nikum-ah khan 1,593.38 crore a ni. 71.96-in kan dawn tur hi beiseina a sang a ni tih lai kha figure analysis-ah chuan ka sawi theih tawk ni sela.

Mi eng emaw zahin kan sawi tawh a, tuna khawvelin kan buaipui em em Russia-in Ukraine a run a, nizanah pawh news hun rei tak ka en a, BBC te, Republic TV te

debate-ah chuan Russia-in Ukraine a run chungchang hi a ni ber a. Khawvelin an dem a chutih lai mek chuan Ukraine tanrual zia leh, an ram hruiute inpekna thuk zia leh ropui zia a langin ka hria a. Hnam ropui ding chhuak tur chu harsatna hmuna an dinah te, an hmehma ten an rawn beihna hmunah an tangrual thin. Keini North-East ho zingah pawh hian ka sawi ve fo thin a, Naga ho hi hnam eng emaw zah awmkhawm an ni a, tawng hrang theuh nei anni leh nghal a, an mahni tawng chuan an inpawh lo em em a, nagamese language an neiha khu an hman tangkai a ni mai a. Amaherawhchu, Naga-te Assam nena an intihbuai chungchangah te leh thil hrang hrang *central issue* an neihah te pawh a *Naga* angin an tangrual em em zel a ni. *Angami* tih emaw, *Sema* tih emaw kha a awm tawh lova.

Chutiang chu vawiin kan budget sawi chungchangah te leh Zoram-in hma a sawnna tura helai hmuna thutkhawmah hian *Mizo* taka he hnam hi, “engtin nge kan chawi kan ang, engtin nge kan chawi san ang, hmalam panin engtin nge kan kalpui ang” tih hi zoram mipui ten tlinglo chung pawha kan kova an nghah si avangin, chu chu kan ngaihtuah tur niin ka hria a. Duh ang chuan thil a kal thlap thlap dawn lo tih hi a chiang em em a, mahni dinhmunah pawh ka inteh ve fo thin a, mi zawng zawng hi chu kan ti lawm dawn lo tih a chiang reng mai a, mahni chhungkua pawh kan ti lawm seng lova. Amaherawhchu, mahniin *pass mark* kan inpek erawh hi chu, ‘kan score tur a ni’ tih hi ka ngaihdan a ni a, mi zawng zawng kan ti lawm seng dawn lo; vawiin niah Pathian zarah Mizoram rorelna sang berah ka lo thu ve te hi Pathian malsawmna a ni a, Pathian zara hna tha tak kalsana helai hmuna ka lo kal ve chhan hi engnge maw mai mai, inpuh mawhna mai mai leh inkawk mai maia hun hmanral hi ka hlauh ber a ni.

Chuvangin, engtin nge he ram hian hma kan sawn ang a, he kan budget kan sawi ang khan figure analysis tlem kan tih, kha khata tang khan hmasawmna kawng hi chu a kua a ni tih hi a langin ka hria a. Fifteenth Finance Commission Grant atanga *local body grant* kan han hmuh te, state disaster risk mangement fund te, health grant-te, *PM-DeviNE* kan tih te heng head hrang hranga sum allocation-a awm hi a ropui ka ti khawp mai a, *state disaster risk management fund* hi state dang hian an nei ve em aw ka ti a. Tuna, kan buaipui em em tlan vek Covid issue-ah he head hnuaiyah hian sum eng emaw zah allocate a ni a, nikumah crore 47, kumin ah crore 49 a lo ni a, Covid avanga nunna chante ₹50,000/- zel pekna dan *ex-gratia compensation* kan nei te, chungah chuan mi 420 hnenah he compensation hi pek tawh a ni tih te, VLTF leh LLTF member volunteer-te, Covid hun chhunga harsatna tawkte heta tang hian pek a ni a, nuai 20 zet an duty laia vanduaina tawk te tana compensation pek theih a nih hi a ropui ka ti khawp mai a, health grant-ah eng emaw zah, PHC te, Sub-Centre tem CHC te han thuan thatna tur kan nei te hi a ropui ka ti khawp mai.

Tin, *PM-DeviNE* kan sawi te, Mizoram tana pawimawh ram hnuk thil kan nei te hi special package, kum danga la awm ngai lo a nih avang hian a hlu leh zualin ka hria a ni. Sectoral allocation-ah, general service sector-ah te, social service sector-ah te, economic service sector-ah te engemaw zah fund allocate a nih hi a ropui a, SEDP ah te, Lunglei Municipal Corporation-ah te, Autonomous District Council-ah te, MLA Fund-ah te, Shinlung Hills-ah te, MYC atan te a allocation siam an nih hi a ropui a. He budget hi a hawl zau a, a hawl kim a, kan zavai atan a ni tih hi a chiang hlein ka hria a ni.

Sawi hmaih miah loh tur kan budget speech, page 10-na kha a pawimawh khawp mai a, hun harsa leh buaina kan tawk a, *challenging* em em a ni a, chulai karah chuan, “Scheme for financial assistance to state for capital expenditure” tihah khan kan hmu ang a, eng emaw zah ZMC infrastructure inthum thatna tur te, tin, 132 kV strengthen-na tur te, solid ways management-a capital items tak tak khatiang zat mai han phochhuah tur a awm kha a ropui a ni. Budget bu ah pawh chiang takin a lang a. A zavaia han lakkhawm hian Pu Speaker, he kan budget hi kan sawi thin a, keini ang state ropui lem lo tan chuan budget ropui tak pharh kha thil tih hleih theih loh a ni a, amaherawhchu, he budget hi a hmaa mite nena kan khaikhin pawhin hma a sawn a, he budget hi mitin huap anih avangin a ropui leh zual a ni tih kha ka sawi duh a ni. Ka lawm e.

SPEAKER : Aw le, dar 4 a hnai a, kan danah khan dar 4 kha a ni a. Nimin khan an sawi tha hman lova, a then khan. Group Leader-te kan ko tawh mai dawn em ni? Pu C. Ngunlianchnunga, Member zahawm tak i lo sawm ang.

PU C. NGUNLIANCHUNGA: Pu Speaker, ka lawm e.

Budget General Discussion han sawi ve loha liam mai tur kha chu a uihawm deuh a. Nimin khan ruling lam khan in sawi tha duh lova, keini lamah mi 3-in a zawnin kan sawi a, vawiinah in lo sawi leh vak mai a, kan in dal lek lek a ni.

Pu Speaker, thenkhatin kan sawi zau a, thenkhatin NH 54 kawng laih mek hi JICA pawisaa central-in state fund atanga laih ang tein kan sawi a, Champhai Zokhawthar - Seling road te, Tlabung road te pawh a ni a. Helaiah hi chuan thudik sawi ila, helai hi chu politics khelhna tur a ni lova, kan phak ang tawk leh kan hmuh ve dan kha sawi ila tha khawpin ka hria a. Congress sorkar lai khan central atangin sum tam tak a lo kal a, Congress nilo BJP pawh sorkar se central-in kan ramah project lian a rawn kalpui a ni mai a, khalaiah khan inchhuanna tur a awm lova. Ex-gratia chung chang te pawh kha Supreme Court-in, “Covid-19 vanga thite ₹50,000/- pek tur” a tih kha a ni a, tuna kan sorkar-in a pek emaw, a duhsak bik avang emaw lam kha a ni lo tih erawh

hi chu kan hriatsa ni mahse, khang ang ngaihdan kha a pawimawh khawpin ka hria. Sorkar-in helai a engkim kan Chief Minister zahawm tak zawh vek kha chu a ni lo deuh lo maw kan ti ve a nih chu.

Pu Speaker, kan budget bu-ah lut nghal mai ila. Kumin budget hi, nikum lamah pawh a ni tho mai a budget-ah hian revenue expenditure leh capital expenditure-a then a ni a, chutah chuan budget speech-a kan hmuh angin, kan revenue expenditure atang chuan sorkar hnathawkte, pension-te, buhfai man te leh electric man te, tui in tur te, hetia han en mai hi chuan a mawi khawp mai a, 71.43% a ni a, nikumah khan kan hriat angin 82.67% kha a ni a. Nimahsela nimin lama kan sawi, kan hotute he House-ah, “Supplementary Demand sawiho ni se” tia an inhnialna kha. In lo zir theuhin ka ring a, nikumah pawh budget-a hlawh daih lova siam department 15 lai a awm a ni. Chu chu Supplementary Demand-ah khan an pawisa indaih lohna te pek an ni tih chiang takin a lang a, kuminah hian a langa mawiah chuan 71.43% a ni a. Chutihlai chuan he Budget *Demand for Grants* han ena han zir chuan, department 28 ngawt mai nikuma an BE phak lo an awm a ni. Pathian zara kan dam chuan, nakum Budget Session Supplementary Demand-ah khan a rawn lang leh dawn a ni. Engzat nge a lanna tur chu tunah chuan ka sawi mai thei lova. Chutiang chuan, helaia a langa mawia Revenue Expenditure-a dah tam anih chuan Capital Expenditure kha a tlem dawn avangin *hmasawwna* hnathawhna tur aiin keimahni inenkawlina lamah a kal tam zawk dawn a ni tih tilangtu a ni. Chu chu nakum Budget Session-ah kan hmu leh dawn a ni.

Sawiho hlauh lam leh hlauhloh lam pawh nilo, a kalphung a nih dan te sawi leh a ni a. Tichuan helaia kan han sawi lar em em mai Prime Minister Development Initiative for North-East-ah crore 500 leh crore 100 kan hmu hi a lawmawm ka ti a. Chutih rual chuan vawiina kan sorkar hrawn mekin mipui hnena inthlan hmaa an zawrh, kan House Leader zahawm tak pawhin a sawi chu, “Aizawl khawpui hi traffic jam lohnaah kan siam ang” a ti a, an sorkar tirh pheih kha chuan kawng chhawng siamna tur hmun te pawh an en niin ka hria a. Amaherawhchu, vawiina kan budget-ah hian khatiang lam kha lang lovin, “Aizawl by-pass road western side-ah siam tur a ni a, chumi atan chuan PM-DeviNE hnuaiah crore 500 lai an hmu dawn” tih a ni a, a lawmawm hle a. Chutih rual chuan, Aizawl mipuite hnena traffic jam tihrehna, India rama awmchhun tur atana hmalaknaah te khan bultanna *pilot project* (kan sorkarin a uar bawk a,) te pawh han tel ve se a tha hle tur a ni a, mipuiin an thlir nasa si a.

MNF sorkar apiangin *Bamboo link road* hian sawi a hlawh khawp mai thin a, Bamboo link road kan laih dan tur hi kan enzui ang a, keini pawhin kan lo monitor ve ang a. Nakinah thlalak kan inpek leh hun turte pawh a la awm turah ngai ila. Chutilai chuan, “kan mamawh em” tih lam zawka hi ngaihtuah ngun a thain ka hria a. Tin, he sorkar hian a sorkar tan tirh lam khan, mau hi kan intodelhna tur leh, Synod Conference

Hall-ah phei kha chuan IAS officer-te pawh mau chin hlawk zia hriaa an hna bansan mai tur ang deuh thaw te khan kan sawi a. (SPEAKER: Minute khat i la nei e.) Pu Speaker, khawngaih takin, ka sawi dawn chauha bell i hmet a, dar i endik lo a ni ang a, minute 9 a la tlin ka ring lo.

Kan Finance Minister zahawm tak Budget Speech, No. 45-ah khan, “kan Autonomous District Council pathumte sum hman tur cheng vaibelchhe 492.03 kan bituk a, chu chu kum kal mek 2021-2022 BE aiin 9.08% laiin a sang zawk a ni” tih kan hmu a. He thu hi Pu Speaker, he House-ah hian nikumah pawh ka sawi tawh a, a hmasaah pawh ka sawi a, Pathian leh kan hotute duhsakna a rorel pawla kan awm ve lai, *Seventh Pay* hman a nih dawn khan, A tirah Autonomous Council-te huam tir an ni ve lova. Amaherawhchu, ‘hei chu a remchang lovang’ tiin, anni chauh ni lovin he state sorkar hnuaia thawk chiah lote pawh huam tir a nih theih nan tlem a tih tlai a ni a. 2017-2018 Congress sorkar khan Autonomous Council-te Seventh Pay a pe ve a ni. Tichuan MNF sorkar, tun sorkar hi a lo ding a, Seventh Pay ni lovin Sixth Pay bawka dahhniam avangin sum indaih lohna a nasa em em a. Kan House Leader ngei pawhin, ‘hlawh chu kan pe ngei tur a ni’ a ti a. 2020-2021-a an actual budget siamah khan cheng nuai 45,106.49 a ni a. Tichuan, nikum Budget Speech-ah pawh khan lang a.

Kan Finance Minister zahawm tak khan “District Council-te pawisa hi la tihpun theih a ni lova, amaherawhchu kan la en dawn nia” a ti a. Chutiang chuan nikumah khan Lai Autonomous District Council bik BE-ah cheng nuai 1800/- pek belh a ni a, Mara Autonomous District Council-ah nuai 1,471.54/-, Chakma Autonomous District Council-ah nuai 1,300/- pek belh an lo ni ta a ni. Tichuan, tunah hian kan sorkar kum kal lai a lo tawp dawn ta a, Autonomous Council ten an sum hman dan chu nikuma financial year April - March anga kal kha an la nih avangin tunah hian budget-ah nuai 496/- kan pek belh kha uanpui tur niin a lang lo a ni. (SPEAKER: A tawk thei em?) Pu Speaker, khawngaih takin hemi chapter chauh hi ka han zo ang e.

Hlawh indaihloa pek an niin tunkum kum tawp March hlawh phei chu tuna kan pawisa pek belh hian a la daih lo zawk a ni. Nikum BE-ah khan Lai Autonomous District Council-ah hian nuai 11,195.01/- pek belh nen khan a lo ni ta a. Tichuan, kumina an pekah hian cheng nuai 11,900.46/- a ni a. Lai Autonomous District Council-ah hian nikum RE aiin kuminah chuan 65% aiin a lo sang a, MADC-ah hian nikum RE aiin kumin ah hian cheng nuai 96.30/- in a hniam a ni. Chutiang chuan, CADC-ah phei chuan nuai 555/- laiin ... (**Speaker:** I duh tawk thei tawh mai lawm mi? Hun a tawp dawn tlat mai le.) Pu Speaker, ka han zial lawk ang e, khawngaih... (**Speaker :** A tawk e. Minute 4-in i pel tawh a nia.)

Budget-ah hian Autonomous District Council-te duhsak deuha pek niawm khan member thenkhat ten an sawi a. *Duhsakna* ni lovin, “*mandatory*-a an hlawh chu pek tur a ni” tih lai leh, chu pawh chu a la daih lo a ni tih kha hun chep tak karah ka han sawi a ni e. Ka lawm e.

SPEAKER : I veilama mi nen khan in hmang tam riau a. Pu KT Rokhaw khan minute thum in a pel a, nangin minute li in i pel a ni. Kan hun hi a laklawh a, a tawp ta a, a pangngaiyah chuan. Kan chhunzawm mai dawn em ni ang? Anih i chhunzawm ang aw.

Tin, House kan rawn duh chu, chawlh hleka thingpui in nge in duha hetia tihlang mai hi? Tih tlang mai maw? Awle, House thu thu le. A nih ti tlang ila. Tunah member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e.

Tunkum budget hi ruling party-in budget an hman theih hnunung ber tur a nih dawn vang nge thusawi tur pawhin a koha koh ngat ngat an ngai a, an phur lo hle mai tih a hriat a. Kan Finance Minister pawh khan a budget speech a rawn sawi pheh hmasa leh a pheh hnihnaah khan *sum* harsatna hliar a rawn sawi a, *Delhi Drip* khai ngai loa nun tum kha, *Delhi Drip* a haw chakloh lutuk avanga mangang aurawl kha a pheh khatna leh a pheh hnihna a ni a.

Kum 2008 Congress sorkar khan sum nasa takin a rawn siamtha a, hei, kum thum sorkarna an han chang leh a, sum harsatna kan han sawi leh tan a ni a. Phek thumnaah pheh hi chuan, Pu Speaker, “kan sorkar leiba tlingkhawm chu kum tharah hian cheng vaibelchhe 12,553.08 ni tura chhut a ni” an ti buaih mai a, a rapthlak khawp mai a. Hetiang chung a han kal tur hi chu sorkar tan pawh a hrehawm awm mang e ka ti a ni.

Tin, pheh hnihna, point 4-naah khan, *Mizoram Resource Mobilisation Committee* an din tur thu kha a rawn sawi a, lawmawm ka ti a, “hei hian kan sum hman chhuah tihhnam theih dan tur kawng a ngaihtuah bawh ang” a tih hi lawmawm ka ti a. Mahse, chutih rualin, hna hi an thawk ngam ang em aw, sum tul lova hmanna, SEDP Board te, sorkar hnathawk la tura Board an din ang chi, tul miah lote kha an ti ngam dawn a nih chuan Pu Speaker, he thil tha tak tur a ni a. Tin, an tingam dawn lo a nih chuan, he Board dinte hi sum tihek leh mai tur an ni dawn tih hi a rawn tichiang em em mai a ni.

Tin, Bamboo Link Road hi an rawn sawi leh ta a, a lawmawm ka ti khawp mai a. Bamboo Link Road hi Pu Speaker, MNF sorkar hmasak lai khan DoNER atangin

pawisa tam tak hmuh a ni a, amaherawhchu, an thawh chhiat lutuk avangin *first installment* sorkar-in a dawn bak kha dawn belh a awm ta lo a ni. DoNER atangin inquiry committee te an rawn din a, an rawn en a, pek tlak lohah an ngai a, vaibelchhe sawmsarih leh tih chuang kha Pu Speaker, kan chan a ni. Khatiang ang kha a ni leh palh ang tih kha a hlauhthawnawm hle a. Chuvang chuan, sorkar hmasaa an tihsual tawh te kha an tih loh nan fimkhur turin ka ngen duh bawk a.

Tin, kan kan Budget Speech hi uluk deuha ka han ena mak ka tih em em chu, engatinge sorkar hma leh sorkar tirh atanga phur em ema rua, (Brandisii leh Latiflorus) te, nasa takin he House-ah pawh kan sawi a, khatiang ang hmasawna tur budget-a sawirik a ni ta hauh lo mai hian he rua leh mau chungchangah hian kan beidawng ta em ni le tih theih a ni. Pu Speaker, thla hmasa mai khan an mau china hmun ka zuk en a, a beidawnthlak khawp mai a, sorkar hi a beidawng ve a, mau lama kalpui hi an tum ta lo em ni aw a tih theih a. A chhan chu, SEDP sem tur an thlang ta a, Zoram hmun hrang hrangah, chuta an thlan tur zingah chuan, Maua intodelh turin leh, “Rua leh Mau te kan chin chuan IAS nite pawh an bang duh ang” ti khawp a project tha sawi ni si kha, mau emaw, rua emaw thlan tir an ni ta miah lova, bekang te, hmunphiah te thlang turin an ti ta zawk a. Pu Speaker, bekang-a kan ram intodelh tir an han tum ringawt mai pawh hi a mangan thlakin ka hria a, a ram pumah bekang kan ching mup mup mai dawnin ka hria a.

Tin, Pu Speaker, hei, Lo vah a hun tawh lova, Lo kan hal tep tawh a, chumi hunah chuan vawiina an thlan tura tihte hi thlan fel a la ni si lova, hetiang bengkan te, hmunphiah te, vaimim te ching turte hian khawiah nge an chin ang tih te hi a ngaihtuah a ngai khawp mai.

Tin, phek 9, point 25-na, EAP chungchang, a sum lampang it hrim hrim chuan a lawmawm ka ti khawp mai. Pu Speaker, sorkar hmasa, Pu Lalsawta Finance Minister nih lai khan central scheme, a scheme hrim hrima kha Mizoram hian kan chhawr em, Mizoram tan a hlu em, tih a nih loh chuan 90:10 sharing system pawh hi Finance Department-in ti lo turin an rawt thin a, thil tul lo, sum lakluh hrim hrim ang kha Finance khan department dangte a veng thin a ni. Vawiina EAP kan lak tur hi Pu Speaker, 20% hi State-in *counterpart funding*-a a tum ve tur a ni a, chuta 85% la awm hi *loan* a ni thung a, chu chu central leh state sorkar-in 90:10 in an insem leh tur a ni a ti a, a rapthlak khawp mai. Heng EAP-a heti zat state sorkar sum harsatna avanga cetral sorkar scheme tha deuh deuh SMS pek tur harsa taka kan awm laia, ‘externally aided project’ a nih tak avanga 30% deuhthaw state-ina kan tum tur anga agreement kan han siam te hi Pu Speaker, a ngaihtuah chian loh thlakin ka hria a, he sorkar hi finance-a a fail zia tilangtu a niin ka hria a ni.

Tin, 13-naah hian ka lut leh ang a. SEDP hi *sorkar flagship proramme* a nih thu te pawh tukinah kan Chief Minister-in a sawi a, “cheng vaibelchhe 700 ruahman a ni a, hemi atanga vaibelchhe 350 hi family development lam hawi atana hman tur a ni” tih te a ni a. Mahse, Pu Speaker, kan Legislative Assembly kaltlanga zawhna kan zawhah chuan, SEDP hi kan *flagship programme* a nih si chuan a sum kan hmanna te hi ho angreng khawp mai a, ‘purchase of motor vehicle for new district’ tih te, ‘restaurant and toilet’ tih te, ‘wooden decoration of restaurant’ tih te, ‘tree-house and outdoor shed’ tih te, ‘renovation of hospital kitchen’ tih te, ‘expenditure on rent for new district’ tih te kha kan Flagship proramme SEDP-a kan pawisa hmanna, House kaltlanga min rawn chhanna a ni a, ‘upgradation and strengthening of Lunglei District Park’ tih te, han keu ila Pu Speaker, ram hmasawna tur tak tak hi a tlem khawp mai. Chutiang chu, sorkarin intodelhna tur anga kan hman, kan *flagship programme* pui ber a ni hi a lungchhiat thlak a. Kan ram hi SEDP hmang hian kan intodelh hmel loh khawpin a lang a ni.

Tin, nikum lamah khan kan sawi tawh a, Budget Demand kan han sawi a, “kan Minister-te salary leh wages chauh a ni, hetiang ringawt chuan kal ngaihna a awm lo” kan han ti a. Tun kumah chuan *minor works* leh *major works*-ah te a hmingin tlem tlem chu an han dah ve a, Pu Speaker, i dinglama member-te zingah, “kan Chief Minister-in hetiang a kawla, a tul anga a pekchhuah hi a tha a ni” rawn ti pawl kha an awm a. Mahse, Pu Speaker, naktukah Demand kan sawi tan leh dawn a, kan Minister-te Demand kha House-in a pass hnuah Appropriation Bill, a hnuah ‘Act’ lo ni leh tur hman phalna, ‘chabi’ i tih kha an pe dawn chauh a ni. Chungah chuan kan minister-te hian pawisa hman tur an neilo leh dawn a ni. Budget Session kan han zo ang a, budget atangin miretheite an hnathawhna tur pawisa House-in kan pass sak loh chuan hnathawh tur an nei dawn tlat lova, an ta tur kan budget-ah hian dah ve a ngai tlat a ni, mi retheite an hmangaih anih chuan.

Pu Speaker, hun tawp dawna ka han sawi leh duh chu, vawk thite kha kan Minister zahawm tak hian, “central sorkar-ah tanpuina kan dil mek” a tih hnuin kum a vei tam tawh. Mizoram hmun hrang hrangah vawk hri len avanga harsatna tawk tam tanpuinate chu kan budget atang hian engatinge kan tih mai loh? Miretheite hi kan hmangaih tak tak lo a ni. Engtikah nge central sorkar-a mi chu a lo kal dawn, lo kal lo se pek an tum lo tihna a ni. Chuvang chuan, Pu Speaker, kan sorkar hian mi harsa zawk, damloh avanga bill pe theilo te, hripui len avanga vawk thi, harsa tak takte tanpui a tumlo hi a lungchhiatthlak ka ti a ni.

Tin, *NABARD loan* chungchang, Education Deptt-ah khan tun Assembly-ah zawhna a lo awm a. (Pu Speaker, a tawp ber nan.) Pawi em em mai chu, engatinge kan department-te hian thil hrechiang lova loan kan lak le? Education Department-n *NABARD loan* a lakah hian engzat nge a pung, engzahin nge rulh leh tur tih an hriatloh

thu Assembly zawhnaah min rawn pe a ni. Hetiang lutuka kan department-te hi an kal chuan, he sorkar hi chu Pu Speaker, nakum inthlan lehah chuan ‘bye bye’ vena tur chance a awm ta a ni. Ka lawm e.

SPEAKER : Member zahawm tak Pu Ramthanmawia.

PU RAMTHANMAWIA : Pu Speaker, ka han inthiam khek deuh a, chawhnu lam ka han chang a, ka hmaa thusawite a ngaihnaawm hlawm khawp mai a. Kum 2022-2023 Budget General Discussion nei thei tura hun remchang kan han nei hi a lawmawm hle a.

Kan ngaihtlak tak ang khan, he budget hi, a pumpuia han thlir hian hmasawn tumna budget, Zoram tan, kan mipuite tan, mi rethei berte thleng phak budget niin ka hmu a, lawmawm ka ti a. A chhung thuah hian luh vak pawh ka tum lova, ka sawiduh chu, Pu Speaker, he Ministry alo din hlim khan mi pakhat hian ti hian min zawt a, “Pu Papui, in sorkar tur chu ka va huphurh ve, sorkar hnathawk hlawhte engtin nge in pek anga, engtin nge in khawsak ang le” min ti a, ‘Engati maw’ ka tih chuan, “zu in zuar ve tawh si lova, sum leh paiah in harsa dawn tih ka rawn hmu tlang veka lawm” a ti a. “E, anih tak chu, amaherawhchu, kan hotuten ti hian ngaihtuahna an hmang a, Zu zawrha hausak ai chuan kan u leh naute, kan thalaite nunna chhanhim hi rethei mah ila a tha zawk e,” ka ti a. A lawm khawp mai a, chutiang rilru in pu anih chuan ava lawmawm ve, in sorkar erawh chu in rethei dawn a ni tih hi ka hmu tlang sa a ni tih min hrilh a.

Kum 2019-ah kan han sorkar chhova, hun tha leh boruak tha anih kha chuan kan ziaawm chho tan viau a, hnate pawh kan han thawk tan ve a, kan hlim em em a ni. Bial tan te kan ti a, tan kan han la chho ve a. Kan sawi ang khan, khawvel a inrin hmian Covid avangin kum hnih chhung harsatna hlirin Mizoram hi ramdangte ang bawkin min tlakbuak ta a. Chungte avang chuan engtin nge kan dam khawchhuah ang, engtin nge kan hotute hian an mipuite hi ei leh bara chhuan chhamlo turin min hruaichhuah theih ang tih kan ngaihtuahnaah a awm reng a. Pathian-in he tun hun atana ram hruai tur hian a lo ruat a ni tih a chianna em em chu, hun harsa, hun khirh leh hun thim takah pawh awm mah ila, sum leh paiah harsa mah ila, vawiin thleng hian chhuan chhama thi emaw, mangang leh lungngai, ba khur lai pawh awm lovin vawiin hi min thlen a ni, Pathian-in he Sorkar hi min hruai vang a ni.

Ka sawifo tawh thin, kan inthlang dawn a, party tinin ‘kan sorkar dawn’ kan ti vek a, kohhran tin, mimal pawh kan tawngtai a, ‘sorkar tha, mipui sorkar min pe rawh’ kan ti a. Tichuan, result a lo chhuak a, he sorkar hi Pathian-in min pe tlat, kan tawngtai chhanna a ni tlat a ni. Rom 13:1-ah, “*Roreltute chu Pathian ruat anni*” tih kan hmu a ni, hei hi chu kan pha thei miah lo, a dik a ni. Harsa tak leh buai tak chungin he ram hi

kan hotuten mutmu pawh tuah lovin min kaihruai a, kan duhthusam chu a ni kher lovang, vawiina kan sawi budget pawh hi duhthusam chu a ni loving. Kan sawi tak ang khan harsatnain min tlak buak avangin vawiin hi kan thleng a, he budget bu pawh hi kan duhthusam ang chuan a tih theih lovang tih ka ring. Amaherawhchu, he budget hi chu, “hmasawn tum budget” a ni a, mipuite tan he budget hi a hlu a ni tih hi ka hmuhchhuah ve dan anih avangin kan sawilang tel bawk a.

Vawiinah contractor chungchang te kan han lam ri a, Pathian leh mipui zarah MLA-a ka tlin hma hian kan hotute duhsakna a zarah mi hming hawhin contract hnate pawh ka thawk ve a, a hnuah department-te duhsakna in 1st class contractor ka han ni chho ve a. Mi hna-te ka chhan sak a, ka leisak a, ka thawk ve zel bawk a, kum 13 vel chu contract hna hi ka thawk ve a ni, pavement thlengin. Chungah chuan department hian min lo chik khawp mai a, “hemi hi eng ang mi nge a nih” tih kan ACR hi an lo nei ru vek mai a ni. A hnuah pheichuan hna kha dil ngai lovin, “Papua saw zawrh rawh u, ani saw a rinawm, a rintlak a ni” te an lo ti hial a ni. Chuvangin, vawiina kan sawiduhna chhan chu, khang hunlaia tang tawh khan contract hna hi mi tam takin, Class-I contractor hi tunah mi 116 kan la dam a, an thawk a ni. Chuti laia vawiinah “Zoramchhana leh Kamrula” tih ringawt kan han sawi laia kha a dikhlel deuh em aw ka ti a. Sorkar hmasa-ah khan Zoramchhana leh Kamrula hian hna an thawk nasa lutuk, an hna pawh Pu Zoramthanga pek a ni miah lo, Kamrula pawh Pu Zoramthanga, kan Chief Minister hna pek a ni miah lo. Khawchhakah, Hmar-ah inthlan hma khan a lo thawk malh malh tawh a ni. Chuvang chuan, anmahni hian an zir a nih ka ring a, department hian an lo recommend a nih ka ring a, hna a hmingin a chhuak thin a ni.

Pu Speaker, ka ngen duh chu kan House Leader zahawm tak PWD Minister ni bawk hian tunhnai kum 5, kum 10 vela contractor hnathawkte hi tute nge an niha, department-ah hian anni chauh lo pawh hi an awm ka ring a, tu tute nge maw ni le tih te pawh kha min hrilh theih se ka duh khawp mai a, chu chu kan ngen duh a. A hminga Class-I contractor kan lo nih vena laiah experience tam tak ka nei ve a, rinawm a ngai em em a, rintlak nih pawh a ngai a, department rin nih pawh a ngai a ni. Chuvang chuan, ka hming pawh miin an hmang fo mai, hei hi *danlo* a lo nih pawhin, kan kalphung a ni ve tlat a ni tunlai-ah chuan. Mi hming kan hmang a, kan hming pawh an hmang, tiang khan kan lo kal thin a ni.

Pu Speaker, helaia kan han sawi Bamboo Link Road chungchangah khan ka han lut daih teh ang. Hei a hmingin kan hotuten Bamboo Link Road Board-ah min han dah ve a, an nghakhlel em em a, kan hotupain theitawp a chhuah a, crore 100 a rawn hnukchhuak thei hi kan lawm khawp mai a. ‘Pilot Project’ tih a nih angin hei hi tha taka hman a nih chuan, a leh pek pawh hi awm zel turah beisei a ni.

Bamboo Link Road hi a tangkai khawp a. Kum 2005-ah khan New Khamrang-ah khuan km 8 ka thawk a, hmanni inthlan dawn khan Serkhan-a kan hotute khan an lo la hre reng mai a. “Papui, Bamboo Link Road i laih khu chhunzawm teh u a, kan khawtlang hian kan hmang tangkai lutuk a, kan thlaithar phurhchhuahnan kan hmang a, kan feh a, kan hawng a, thil phurhchhuah nan kan thatpuiin kan hlawkpui lutuk a, lai chhunzawm ula kan va duh em ve aw” an lo ti a. “E, in lo la hria a ni maw” ka ti a, “hria e, in thawh lai pawh kan hria a lawm” an ti a. Chuvangin, Bamboo Link Road tangkaina hi, hetia va laiha mau phurhchhuahna mai kha a ni dawn lo. A thenah chuan Balu phurhchhuahna turte pawh ani ang, quarry laknan te pawh ani ang a, a then-ah Agriculture te, Horticulture te khang hmunah khan thlai chinnan te an hmang a, khami phurhchhuahna tur te khan an hmang dawn a ni. A nihna takah chuan *Saihlum pakhata Sava pathum vel perhthlak tumna* a ni, he Bamboo Link Road ina a tum chu.

Chu chu a nih a vangin he Bamboo Link Road bultanna tur a tana cheng vaibelchhe 100 lo chhuak hian, a aia nasa zawk a lo chhuah theihna tura hmahruaitu-ah a lo awm ta hi kan lawm em em a, hei hian nakinah chuan Zoram pumrawn tuam thei turah kan beisei a. Bamboo Link Road hmang hian kan ram kan develop ang a, mau mai ni lovin thil dang, thlai dangte pawh hei hian a huam thei vek dawn a, chu chu kan nghakhlal em em ani tih Pu Speaker, kan sawi pah bawk a ni e. Ka lawm e.

SPEAKER : Tunge sawi leh ang? member zahawm tak Pu Lalduhoma, kan hriat angin, a ni hi minute 15 kan pe ang.

PU LALDUHOMA : Pu Speaker, ka lawm e.

Hei, kan hriat angin rampum-in Covid 19 a vangin harsatna kan tawk a, kan State pawhin a tawk a, chutihruah chuan, a lehlam-ah chuan vanneihna tam tak minrawn thlen a. Chung zingah chuan kan sum enkawlina kawngah *relaxation* tam tak pekin kan awm a, *Wage & Means Advance* pawh crore 256 thleng puk theihna te min pe a. Tin, *overdraft* te pawh ni 14 a tangin ni 21 ah min pawhsei sak a, *special drawing facility* te pawh min pe bawk a, *fiscal deficit* te pawh min tihsan sak a, chungte avang chuan kan budget pawh hun harsa karah 26.68% laiin a lo pung ta a.

Kumina kan budget hi hetiang kara hetiang zata a pung thei hi a lawmawm hle a ni. Amaherawhchu, he a punna hian engnge a khawih, tute tan nge hei hi hman tangkai tur an niha, mipui nawlin kan thatpui dawn em tih te chu kan entur a ni ang a. Chumi a tan chuan *fiscal policies strategy statement*, para 12-na kha kan sorkar *fiscal policy* a inngahna a ni. Khatah khan target 7 a nei a, chu chu he kan budget kumina 26% laia lo pung ta hian a tinzawn em, chu lam ram chu a kawm em tih hi kan thlir tur a ni dawn a ni.

Chung zinga pawimawh tak mai chu, sum kan mamawh a, kan state sum kan lillam thin hi a ni a. “Auction of State Development Loan” hi vawi duai lo kan la a, Congress sorkar hmasa kum 2012 a tanga kum 2018-ah khan bank leh financial institution hrang hrang 24 atangin crore 1,519.75 henga loan rulh loh tuna kan sorkar hian arawn hnuchhiah a. Tichuan, tuna kan sorkar hian April, 2019 atanga tun inkar kum thum a tlin hmain crores 2,428.42 a lo lillam leh hman a. Tichuan, tunah hian auction a tanga pawisa kan puk kan la rulh zawhloh chu a vaiin crore 3,948.17 a ni a, henge hi kum 10 a tanga 13 chhunga rulh turte an ni. Tunah hian kan sorkar hian lei hi bat belh miah lo se, puk belh miah lo sela, kum 2036, tuna tanga kum 14-ah heng laibat hi kan rul zo chauh dawn a ni.

Chuvangin, vawiina kan thil tihthat emaw, kan thil tihchhiat emaw hian thangthar lo la awm zel tur leh he House-a lo la ding zel turte-ah hian thil tam tak, a chhelam leh a thalam a hnutchhiah thei a ni tih hi kan hriat a thain ka hria. Tin, “Scheme for Financial Assistant to State for Capital Expenditure” ah khan crore 100 kan puk dawn tih kha kan hria a, hei pheih hi chu kum 50 hnu a rulh tur a ni a, kum 2072-ah vawiina kan sorkar loan lak hi kan rul zo dawn a ni. He khawvelah hian keini chu kan awm ka ring tawh lo, chumi hun thleng chuan vawiina mite tan hian phurrit kan hnutchhiah thei a ni tih erawh chu kan ngaihtuah a tha hlein ka hria a ni.

Tin, kan House *standing liability* hi tunah hian crore 12,553 a ni a, kan GSDP a tanga tehin 31.81% a ni a, a sang hle a ni. Tuna kan budget pass tura hi a rullhnan hmang ta vek ila, kumin kan budget-ah hian kan chan chu a tlem khawp ang. Tichuan, “Medium Trans-fiscal Policies Statement”, a bu kha kan dawng theuh a. Han en leh ta ila, kum 2020 – 2021 ah khan kumina kan leibat zat tur hi kan sorkar hian a lo chhutchhuak a, kan *outstanding liabilities* tur hi, chu chu crore 9,397 a ni. Tichuan, hei, kum kan hmang liam tep ta a, kan leibat zat chu kan lo hre ta a, tunah hian crore 10,491.20 a ni. Tun financial year kan hman mek kum tirah khan tun kum tawpa kan leibat zat tur hi an chhut a, an chhut sualna hi crore 1,093.83 a ni. Kum tir atanga kan ramin lei kan bat tur hi crore 4 crore 5 emaw, crore 20, crore 30 te chuan lo chhutsual sela a awm ka ti, a crore sang tela mahni leibat tur pawh chhut fuh lo sorkar hnuaiah hian vawiinah kan awm mek a ni. Chuvangin, kan fiscal policy hian awmzia a nei em, heng a bu kan ziahte hian mipui leh keimahni ngei hi min bum em tih hi kan ngaihtuah a ngai khawp hle a ni.

Tichuan, kuminah hian kum thar atana kan leibat tur an han chhut lawk leh ta a, crore 11,330 a ni. Mahse hei, kumin budget a lokal a, kumin a an bat zat tura an chhut chu crore 12,553 a ni ta a. Tichuan, nikuma kumina kan leibat tur an chhut thelhna hi crore 1,222 a ni. Mahni leibat tur zat a crore sang tela chhut fuh theilo ten min enkawl a nih chhung chuan beisei tur hi a vang khawp mai. Chuvangin, kan budget hi ngun

takin i ngaihtuah teh ang u. “*Ways & Means Advance*” kan tihah hian, micro-economic framework statement kha a bu kan nei theuh a, 2021-22 (kumin) chhung hian WMA vawi 101 kan sorkar hian a puk a, vawihnih an overdraft a ni; “kan overdraft lo” te an ti mai mai a, he House-ah hian. Anmahni lehkha bu min pek ngeiah hian a inziak kuau a ni; chu chu a ni a.

Tichuan, tun kum kal mek atan hian *Ways & Means Advance* atana lak/puk an lo tum chu crore 100 a ni a. Hei, kum a lo tawp ta a, engzat nge an puk le? Crore 100 puk tum khan crore 3,788 crore an puk a ni, *Ways & Means Advance* atang ringawtin. A turu hle mai. (... *Interruption* ...)

PU ROBERT ROMAWIA ROYTE, MINISTER: Pu Speaker, *Point of Order*, please. Khalai kha tawi te ka han sawi ve lawk teh ang, *Ways & Means Advance* chungchang kha.

Ways & Means Advance kha, “265 crore vawikhatah a puk theih a, vawi tam tam an puk a, tunah crore 3,000 leh tih a ni” tih ang deuh khan kan Group Leader zahawm tak Pu Lalduhoma, Serchhip bialtu khan a sawi a. *Ways & Means Advance* chungchang chu 265 crore emaw, a amount chu eng pawh nise, vawi tam puk se, an rul leh zel tihna zawk a ni. Chuvang chuan, mipui leh he House hian thudik kan hriat a ngaiin ka hria . Chuvang chuan, *Ways & Means Advance* khatia tlingkhawm teuh, ba teuh anga mipuiin an hriat kha a dik lova. *Ways & means Advance* hi ni 90 chhung bat theih a ni a, rulh leh zel a ni a. Chuvang chuan, *Ways & means Advance* hi helaiah tam tak ba anga sawi kha a chi lova. Chuvangin,... (...*interruption*) Pu Speaker, *Ways & Means Advance* puk kha, an puk hnu lawka an rulh zel avangin ba tlingkhawm teuh anga sawi kha a diklo kan ti a nih chu.

SPEAKER : Ngawi rawh u aw, miin *Point of Order* a hman chuan kan lo ngaithla thin kha a ni a. Tikhan Pu Robert Romawia khan a sawi zo tawh em ni?... Aw le. Aw le, Pu Duh, chhunzawm leh rawh le.

PU LALDUHOMA : Pu Speaker, ka hun kha minute 5 zet chu min rawn hmansak niin ka hria a.

Kha, kan Sports Minister zahawm takin a rawn sawifiah a, a lawmawm ka ti a. Vawikhatah crore 256 zel kha puk theih chin a ni a. Chutianga an puk chuan kumin chhung hian crore 100 puk turin an indah tlat si a. En ula, chu crore 100 puk tura *Ways & Means* atanga in lo target a kha crore 3,788-a a exceed avangin Supplementary-ah khan an rawn dil ta a, hreh chung chungin kan lo passed ta a nih kha. Tichuan, kuminah hian *Ways & Means Advance* atangin engzat nge an puk leh dawn tih kha an chhut leh

ta a, ka sawi ang khan vawi 101 kumin chhung hian an puk tawh a, vawi hnih an overdraft tawh bawk a..... (*Interrupted by Robert Romawia Royte, Minister: Pu Speaker, puk kha chu puk a ni a, a rulh leh zel lai kha.*) Aw, i rul leh zel a, mahse i puk a, i rulh leh zel tur kha a zat bituk a awm, pawng paw puk theih a ni lo. Tunah hemi covid avang hian a puk theih chin tlemin min tihsan sak chauh zawk a ni, duh duha khatia tih tur lam a nilo, apung hi a sang em em a, bank danga loan kan va puk ang mai mai hi a a nilo, apung hi a sang em em a ni. Chu pawh ni 14 chhunga rulh tur tih kha, ni 21 chhunga in rulh an phalsak zawk che u a ni. Chu chu thil awmzia a ni a.

SPEAKER : Helam hi lo address ula, ‘in’ kha inti lo ula.

PU LALDUHOMA : Min rawn tih vang ania, Pu Speaker. kuminah hian *ways and means* atangin engzat nge kan puk ang tih hi an ngaihtuah leh ta a, tichuan hetah hian budget ah an rawn present ta a. Kan House Leader zahawm takin a sawi ngei kha, a ziak kha lo chhiar rawh u, ‘Kumin anga Supplementary Demand tam lutuk a awm tawhloh nan leh pumpelth anih theih nan *Ways and Means Advance* kan puk tum hi kan titam a”, a ti a. Nikuma crore 100 an dah kha, crore 1,000 a rawn dah ta a ni. An rawn tipung ta ngei mai a, amaherawhchu he crore 1000 pawh hi lo dah ta reng sela, nikum ang zata an puk leh anih kha chuan crore 2,000 crore chuang, puk phal aia tam an puk leh ang a, tih ngaihna hre lovin Supplementary Demand-ah an rawn hnuklut leh dawn a ni. Chu chu nakum budget-ah kan dam ang a kan en ang chu. Chutah chuan khawngaih takin discuss in ngam ve tawh ka beisei, engzat nge in rawn put luh leh kan hriatpui miah loha in duh duh zat in puk leh hi engzat nge, enga tan nge an hman tih te kan la sawi leh ang chu. (...*interruption*....)

PU L. THANGMAWIA : Pu Speaker, Advisory Committee kan thu khawm a i hovin, ZPM ai an rawn tel a, Supplementary Demand hi sawiho tur an rawn ti lo reng reng, hei hi chu politics khelhna mai mai a ni, House ah hian. Tin, kum 50 kan practice tawh a, an duh chuan kan ngam, sawiho hi, amaherawhchu BAC thut leh hunah rawn pu lut rawh se, an party ai awhin.)

PU LALDUHOMA : Aw, ka hun minute 3-in a liam leh ta. Pu Speaker, thusawina hun ka ngah dawn hle mai a, a lawmawm; lawmthu ka hrilh e.

Tichuan, en zel ta ila, kan tax policy hi a bu min pe a, kan *own tax revenue* kan hria a, *non-tax revenue* kan hre bawk a, a punna zat kan hmu a, hemi atan hian Resource Mobilization Committee din a ni. He Committee hi kum thum a ni tawh, vawi engzat nge an thuta, eng recommendation nge an pek kan sorkar hi ka hre chak khawp mai. Recommendation tha tak tak an pe a, sorkar hian a ngai pawimawh lo nge, tunah hian kum 2019-20 a *state own tax revenue* kan hmuh tum aia tlem tun budget-ah hian an

rawn phawrh a ni. Committee din hi engnge a sawtna? Chu chu a ni. (E, Pu Speaker, a ni lovang kha chu, ka hun min puksak hnem si a, min hrethiam rawh.) GSDP hi 2019 - 2020 ah khan kan growth rate chu 19.66 % a ni daih tawh. Kumina kan growth rate hi en teh u, 16 % a ni. Khatiang sorkar kha engtin nge kan sawimawi theih le, kan GSDP a growth rate thang tual tual tura kan ngaih laiin a hniam ruai ruai a, kumin ah phei chuan 16 ah kan tla a, kum thum kal ta khan 19 kan ni daih tawh a, tuna kan sawrkarna hnuaiah hian kan economy hi a chhe mek a ni tih hi a chiang ngawih ngawih ta a. Tin, capital account, *disbursement of loans and advances* kan en leh chuan 2019-ah crore 81 kan dah a, tunah crore 0.60, nuai 60 chiah kan dah tihna a ni. Kan sawrkar hnathawkte hian engmah puk tur kan sorkar atangin an nei tawh lo, heng hi kan sorkar in investment kan neih vena te pawh a ni a, chuangchuan hengah te hian kan sum dinhmun a chhiat zia hi a chiang ta a.

Social Services en leh ta ila, sectoral allocation kan finance minister-in a rawn dah kha han en ta ula, social services-ah hian 2021-22 ah crore 4,121/- a ni a, kuminah crore 3,952/-; engatinge a kiam zawng hlira kan ram hi kan kaihruai ka ti a ni. Social services ah kan sum dah nikum aia a hniam chuan he sorkar hi a che chhe leh zual dawn tih chiang reng a ni a, chutiang zelin kan *capital investment for infrastructure* hi en ta ila, infrastructure bill, a vaiin ka sawi lo ang a, roads and bridges chiah kan sawi ang e. *Roads and bridges* ah hian 2021-22 ah crore 20 chauh dah a ni. Crore 20 chauh dah a ni chung hian tute emaw resticted tender-a an hna hmuh zat chu Zoram khawvel hian a hria. Tunah chu chu crore 640-ah tihpun a ni ta a ni, a zahthlak ka ti. Ram tan pawh ni lo, tute emaw duhsaka sum siamna, nikuma crore 20 mah kha ‘em ema’ kan tih tawh lai a, kumin ah crore 640, hei hian kan budget a tipung mai mai a ni. Tute emaw duhsakna avangin hetiang hian kan kal nghek nghek a. Nikum aiin a let 32-in contract pek tur an ngah dawn ta a. Mipui chan tur a ni lo, tute emaw vulh lenna, mi tlemte dinchhuahna tur chauh a ni ta a ni.

Tichuan, “General Economic Services” kha i en leh teh ang. Nikumah crore 4.74 kan dah a, kuminah a *nil*; General Economic Services-ah cheng khatmah dah lo sorkar-in min kaihruai dawn a ni kuminah hian, Pu Speaker. A zia lo hle a ni.

A tawp ber a ka sawi duh chu, darkar thum han sawi ka chak kher mai. ‘Quarantee Fund’ hi thlir leh ta ila. Kan Quarantee Fund hi a tlahniam zel a, budget buah khan en ila, ‘Other Institutions’ tih kha a dawng hnem ber te an ni a, kha *Other Institutions* te kha tute nge tih hi kan Finance Minister-in a wind up-naah min rawn hrilh thei se ka duh hle a, kan sawrkar quarantor-a a tanna a ni. Keini chuan kan sorkar hunah chuan *hand-holding policy* hmangin kan thlai chingtute mi hlawhtling tura ngaihte chu quarantor-ah kan tan sak ang kan ti a, he sorkar hian tute nge quarantor-ah a tan sak ve,

eng eng te nge, tu tute nge an nih? Mizo hming pu meuh lote pawh an tam mai thei a ni. ‘Other Institutions’ tih ringawta zep deuha budget-a rawn dah hi hriat kan duh a ni.

Chuvang chuan, kan Fiscal Policy-in a target pasarih hi he Budget hian a thelh vek a, awmzia a nei lo vek a, he kum chhung a kan ram kan enkawlina turah hian a bu ah mawi takin *fiscal policy* an rawn siam a, a taka kan budget chuan a thelh vek ta si a. Chu chu a nih avangin a vanduai thlak ka ti khawp mai a. Amaherawhchu, sawina hun kan ngah lova, thuawih thei kan ni a keini chu. Ka lawm e.

SPEAKER : Member ten minute 10 an neih laiin Pu Duhoma chuan minute 20 a nei ta anih kha. Member zahawm tak tak ten “The Annual Budget for the Year 2022 - 2023” kan sawihona chu kan sawi zo ta a. Tunah Chief Minister zahawm tak Pu Zoramthanga, Finance Minister ni bawh in rawn windup se, kan sawm e.

PU ZORAMTHANGA, CHIEF MINISTER: Pu Speaker, ka lawm e.

Hei, Demands for Grants 2022-2023 an rawn present hnuah kan han study a, tichuan, *General Discussion* kan nei a. *General Discussion* a ni a, nakinah demand-wise in kan la kal ang a, detail leh zualin department-te kan la sawi diah diah turah ngai ila. Chutah chuan Chiang leh zuala inhrilhfiahna te leh thildang pawh a department-wise a kan kal hunah kilkhawr tak, kan hriat duh kan sawihote pawh lo inbuatsaih lawkin a department hotuten a tul ang lo hrilhin an la kal turah ngai ila.

Finance-ah hi chuan a general, (a pumpui) department zawng zawng tih anih avangin vawiinah kan sawi nghal a. Keiin lo dawng a, han zawhna hman a awm bik tawh lova. Nidangah department-wise a kan discussion leh Question & Answer-a a hre zawk ten an submit period ang kha anih loh avangin a tam tak kha chu ka sawi thei lova.

Tin, ka department kan discuss a, kan subject-te kan sawiho hunah thil tam tak detail kha chu in la zawt leh ang a kan inchhang mumal thei zawk ang chu.

Vawiina ka sawi duh pakhatat chuan, kan Budget kalpui dan hi a hun a zir leh tha ber nia hriat danin sorkar tinte hian kalpui a ni a. Tunhma zawng zawngin Planning Commission, Central atanga sum *plan* leh *non-plan* pawisate thenhranin a awm a. Kan han sorkar ve kum kum 10 chhung leh tin, a hma lamte pawh a ni a, plan pawisa leh non-plan-ah budget-a kan han neiha han kal kha a hautak khawp a. A amount-ah chuan tam thur, amaherawhchu development-a kan duh anga hman dawn a hman theih siloh *earmarked sector* chi hrang hrang nen kan kal a, kan buai em em a. Chu chu tuna NDA sorkar a lo kal hian hei hi, “a tha lo e, khatiang system kha chu a dik lo. Chuvangin,

tunah chuan NITI AAYOG-te kan dah a, in pawisa hmuh kha plan leh non-plan a then hrang tawh lovin mamawh in tih ang leh a tul in tih angin state-in hmang tawh rawh u le” a tlangpui thuin an rawn ti ta a, a hahdam thlak em em a ni. Chu chu central a ‘sorkar pahnih’ ti ila, kal dan chi hniha lo inthen hran tawhna pawh kha a ni a.

Tichuan, helaia kan han zawhna, “engatinge kan performance budget-te, kan detail work program-te kha” Member zahawm tak Pu Vanlalhlana’n a tih kha, a dik chiah mai a. Tun hma zawng zawng kha chuan *plan* leh *non-plan*-a then hranin, plan pawisa chin bika kan ta tur kan hman turah khan *work program* an rawn siam a, min rawn pe a, chutiang chuan kan kal thin a. Amaherawhchu, Planning Commission thiah a ni a, a chi dang, central atangin an lo kala mahni tha tih ang anga state-in kan hman theih turin an rawn ti a. Chuvangin, khami hnuah kha chuan kan performance budget leh detail work program-te kha tihin a awm ta lova, a chi dangin kan budget system leh work program-te kha kan kal ta a ni tih kha ka sawi duh pakhat a.

Tichuan, keini pawh budget khatianga a lo awm takah khan tunhma chuan loh theih lovin “he department hian hei hi an work-ah an dah a ngai, he department hian hei hi an work atan semdarh a ngai” tih angin. Tichuan, kan sem a, “kan department-in kan works-ah heti zat kan nei, heti zat kan tithei” tih kha tlem tlem khan kan insem diah diah a, a zawh pawh kha a zo hma reng a. Keimahni state budget atanga kan duh anga han hman tak tak theihloh khan, Planning Commission-in plan fund kan hman dan min control-na hnuaiiah kan kal nasa lutuk a, kha kha Pu Modi-a sorkar hian tha ti lovin “in duh angin nangmahni state budget leh in hman kha chu kalpui tawh rawh u” a ti a, *freedom* min pe a, a nawm pawh a nuam ta reng a ni.

Heta kan budget, a bik takin keimahah phei chuan hetia Chief Minister leh Finance Minister ka han nih tak hnuah chuan a system pawh sorkar hmasaa Chief Minister leh Finance Minister ka nih lai ang kha ni lovin, a chi dangin central pawh an rawn kal ang khan keini pawh kan kal ta a ni. Tlem tlema insem darh den den *system* khan development pui tak tak a kal thei lova. Chuvangin, tunah chuan center-in an tih ang dungthul deuh hlekin kan kal ta a. Kumin a kan neih chu hi crore 1,000 a ni, crore 10,000 a ni, crore 7,000 a ni tih kan han hre ta a, khata tanga loh theih loha kan hman tur, “hlawh atan chuti zah, pension tan chuti zah” kan ti thei a dawn a. Nakinah pawh kan la discuss ang a, Finance-in, “enga ti em em nge Chief Minister department anih vang em ni heti em em a pawisa a ngah” an ti a, han en ila a chanve hawk mai kha pension a ni ringawt mai a ni. Pension fund turte kha an han hisap veka, ‘office-in, department-in engzat nge kuminah in hlawh tura in mamawh, pension-ah engzat nge in mamawh, tin, establishment leh office expenditure-ah loh theihloha kal turah hian engzat nge in mamawh rawn chhut vek rawh u’ kan ti a. Sum hamn tur an tlakchham lohna turin kha kha chu kan hisap tir vek a, an rawn dah khawm ta a. Hetah hian kan

essential expenditure ve atan crore 2,000 a ni, crore 5000 a ni, sang chuti zat a ni tih kha kan han hre ta a, ka hova budget kan han ngaihtuah chuan.

System tharin kan kal ta ka tih kha. A nih leh a dawtah hian ‘eng nge loh theihloh (essential) si, office lam hlawh tihloh kan reserve ngei ngei tur awm han identify leh teh u’ kan ti a. Finance lamin nikum atanga kal tawhin an han chhut a, thil dang zawng zawng nen. A nih leh a banga kha *untied fund*, phuar lova a tul anga kan hman theih a kha engzat nge awm kan tia, kan hre ta a. Chuti a nih chuan a hlawmah tam thei ang ber kan dah ang a, kan vaia kan intawm turin, mamawh huna kan hman tlan turin kan ti ta a. Entirnan Chief Minister ka nih hmasaka plan pawisa kha tlem tlemin kan sem den den a, a project kan siam a, crore tel, *state matching share*-ah chuti zat chu in pek a ngai an han ti a, department project siamtu te hnenah, “state matching share tur in nei em, khawng in plan pawisa kan pek che u kha” kan han ti a, “kawng laih nan emaw, khawilai department hnathawh nan kan lo hmang zo vek tawh a, kan nei lo” an ti a. Khangah khan khawia tangin nge kan pek ang, chu chu kan sawi thin pawisa “*kawihspir*” kan ti a, 90% a zuk hnuchhuah theih laia kha, 10% tura pawh kha a department ho hian an nei hlei thei ta lova, kan buai em em mai a, hetiang system a kan kal avang hian Pu Modi sorkar pawh hian chi dangin a rawn kalpui ta a ni.

Chuvangin, keini pawhin khatia tlem tlema sema an lo inhman zawh vek kha, dik tak chuan ka tawng tu huatthu suhah, department-a hman theih tur kan pek hi chuan rei a daih duh lo em em mai a, *state maching share*-a an thawh a ngaih meuh chuan an lo hmang zo vek tawh thin a, chuvangin, “hemi tur atan hian i dah khawm ang u” kan ti a, khatah khan a reserve atan finance-ah te, planning-ah te kan dah khawm ta a, “department-in centre-ah crore sang, sing tel project siamna tur a awm a, zuk siam ula kan matching share tur a mamawh apiang lokal rawh u” kan ti a. Kumina kan SEDP-ah pawh khan rough taka kan han tih chu crore 200 state maching share-ah kan reserve tawp a, tu ta mah a ni lo, kan vaia kan intawm a ni. Crore 200 khan 90:10 system-te phe chu ni sela crore sang tel hnuchhuah theihna a ni ta a ni. Department-ah tlem tlemin insem ila chu reilo teah a ral vek ang a. Hei hi an tih dikloh ni lovin, hman tura kan pek chuan an lo hmang mai a ni. A tam zawk hnuchhuahna tur, a peipunna tur, a chi tura kha kan lo kangpuak zo ta vek thin a, chuvangin kha system-a khan he kan sorkar-a finance ministry hian tha kan ti lova. Central-in planning commission a rawn ti bova chi danga a rawn kal ang chiah khan tunah kan kal ta a ni.

Department works-a han tih dawn chuan, entirnan, a pawimawh zual anih chuan pek tawp tawp mai, sport department pawh budget hmasaah a nei tlem em em, “a tlem lutuk” an ti a, “lokal rawh u” kan ti a, project an siam a, a tul ang zelin department ta bik pawh a ni lo, ta lo bik pawh a ni lo, kan intawm atang khan *state matching share-*

ah a tul chuan kan pe zung zung mai a ni. A hlawka ni tih kan hriat avangin kha kha a ni a tuna kan budget kal dan system hi a ni.

Tin, hlawh kha chu office tin department head khan kumina an mamawh tur kha an rawn hisap vek a, kan inpaih hniam sak ngai lo reng reng a, a tlangpuiin an hmang zo lo deuh vek a ni. Department thenkhat chu recruitment thar eng emaw a lo awm chuan an hmang zova, tunah *austerity measure* kan tih avanga hnaruak pawh kan hnawhkhah hleih theihloh avang khan hlawh tura kan tih kha chu kan hmang zo vak lova, adjustment a lo ngai ta thin a, “heta mi hi heta hian kan hmang zawk ang e, phalna finance-in min pe ta che u” an ti a, finance-in phalna an pek hnuah chuan chu an hmang a, a *head of account*-a kha a insawn te, a hmanna tura kha tlema a lo insiksawi avang khan chu chu kan Supplementary demand-ah siam rem a ngai e an ti a, kan budget chhungah siam remna kha supplementary demand-ah kan rawn present ta thin a ni. Chu chu hlawm khatna a ni.

Supplementary demand tawi te ka han sawi leh lawk ang a. Nichina kan sawi “ways and means advance”-a kha reflect (tarlan) ve a ngai a, Mizoram state chauh a ni lova, India ram state zawng zawng inang vek kan ni a. State lianin an lak theih chin an la ang a, state te economy chhe deuhin kan la tlem ang a. Tunah keiniin 256 bawr vel kha kan la ang a, a changin an rawn tisang ve a. Kha kha, ‘an zuk puk’ ti zawng chuan a sawi theih a. Amaherawhchu RBI (Reserve Bank of India) ah khan kan pawisa zawng zawng Mizoram Sorkar-ah an rawn chhunglut vek a, khata mi kha kan zuk draw chhuak ta a. Amaherawhchu a zawh thlenga draw kha awih a ni lova, a tih chin bak lak theih a ni lova, “in la dawn a nih chuan *wage and means advance* anga in lak a ngai” an ti a. Wage and means advance tum a tam em em a, tam tak hian, state harsa, a bik takin North-East-te leh economy chhia chuan *wage and means advance* hi kan zuk hmang puk a, heta tangin central Sorkar-in sheet of Taxes atang te, devolution atang tein an rawn chhunglut lehngal a, amaherawhchu record vek a ni. Chuvangin kan zuk puk chu kan ti thei thova. Amaherawhchu RMS-ah kan chhunglut a, *wage and means advance*-in kan zuk puk a, nikhat kan puk te a awm a, ni hnih kan puk te leh a rei deuh te pawh a awm a. Entirnan, kan ngah deuh tum chuan puk ngai lo mai nilovin additional-in crore a za tel te a pumin kan neih tum a awm a, hlawh kan han pekte a tlahniam deuh a, khatia inleh burh vekin India ram State zawng zawng kha kan kal dan vek a ni a. Zoram hi a tha bik emaw, a tha lo bik emaw kan ni lova, India ram state zawng zawng kan kal dan a ni a. Amaherawhchu, khang zawng zawng kha kan zuk puk tum leh kan rulh tum record-a awm vek a nih avangin leiba a tam lutuk min tih a nih chuan, Mizoram te chu nep tak kan ni.

Chief Minister ka nih hmasak khan heta Mizoram-in a kan bat zawng zawng kha a tirah chuan crore 2,000 vel kan ba a, a va han tam ve tia Opposition-ina kan beihnaah

kha chuan, anmahni tan pawh inbeihna atan a remchang bawk a, ka thiam thova. Tunah chuan Mizoram hian crore 2,000 kan ba ta a, in tinin insem ila, “Mizoram hian chuti zat kan ba” an ti a, mipui tan kha chuan “karei, karei,” tih tur a ni. Atawp lamah chuan crore 3,000 a thleng ta a ni, ka term tawp lamah pwh. Amaherawhchu khatih lai khan kan han en a, Maharashtra leiba chu crore sang a nilo, crore sing pawh a nilo, crore nuai an lo ba a ni. State lian apiang kha an lo ba tam a, financial trasaction-a kha a a len avangin. Chuvangin ...(*interruption*)

PU LALDUHOMA : Percentage to GSDP hian mi sawi ang hian sawi ve sela kan duh hle mai, a amount ni lovin. Chumi a nih loh chuan hei hi mipui bumna a ni a, hmanah pawh ka sawi zing tawh, engatinge kan sim theih loh le.

PU ZORAMTHANGA, CHIEF MINISTER: Pu Speaker, GSDP percentage-a sawi hi mipui tan hriatthiam a har em mai a, “a vaiin cheng heti zat” tih hian kan hrethiam ber.

DR. VANLALTHLANA : Pu Speaker, Sorkar leiba hi a amount-in sawi a ni ngai lova, hmanniah pawh kan Chief Minister zahawm takin a sawi tawh a. Sorkar hmasak khan India ram pumpuiah leiba GSDP atanga teh in kan ngah ber a, keini chu 100% kan nih lai khan Maharashtra chu 16% vel a ni, an GSDP atanga teh a an leiba a ni.

PU ZORAMTHANGA, CHIEF MINISTER: Pu Speaker, tunhma khan mipuiin an hriatthiam zawng khan an sawi duh lova. GSDP a percentage-a sawi chu keini ho pawhin kan hrethiam vak loving, mipui pheih chuan hrethiam lo tak an ni. Chutihlaia tunah pawh a ni ang a, kha a total amount-ah a crore chuti zat kan ba a, rapthlak kan ti bawk si a. Engvangin nge Maharashtra-in an bat, Manipur-in an bat, khangte kha heta atang hian en ve tur chu mipuiin an hriatthiam zawng tur chu a ni. Chuvangin chu chu ka rawn sawi ve a nih chu.

Chuvangin, tun tum chu Internet khawvelah kan la awm a, heta atangin India ram State zawng zawng bat, GSDP percentage pawh a ni ang, a hmuh theih vek a, a total pawh. Kan State tiat vela te, a lian deuh te pawh a ni ang, kan bat zawng zawng kha a hmuh theih vek, mipui hmaa *play* a ngai lo. Chu chu a awm dan a ni. Engpawh ni sela, ka zuk sawi duha chu, Pu Speaker, he kan Budget system hi tha kan tih dan ang bera pa berin “kan chungkhuain cheng sangkhat kan nei a, sangkhat kan nei a, family tan engtin nge kan hman ang, engtin nge hlawk ber ang” tiin family Budget kha siam kan ni. Chutiang chiah chuan Congress sorkar hunlai pawhin Planning Commission System-in an kalpui a, NDA an rawn sorkar a, tha an ti lova, an thlak a, tuna kan system-in an kal a. Tichuan, kei pawh ka sorkar hmasak kum 2000 chhova kan budget kal dan

kha a buaithlak lutuk a, tun ka sorkar hnu hi chuan a chi dangin ka kalpui ta reng a ni. Tin, hemi tur hian central pawhin an rawn duang chho ve reng a ni. Chuvangin, tunah chuan hei aia tha hi ka hmu a, tuna kan tih tura chu central-a project siama, a crore sang, sing tel hnuhchhuah tur awm, kan hnuhchhuahin matching share kan lo pek tur kan vaia kan intawm tura kha kan dahkhawm a, khata tang khan kan peipung a. Kan theihtawpin kan tang tlang a, department-ah sem vak lovin an mamawh chin *essential expenditure* tura kha chu pe vekin, a thenah erawh chuan tih nghal ngei ngei ngai han dah turte erawh chu kan dah bawk. Chu chu kan budget system tuna kan kalpui dan hi a ni e.

Tin, kha *ways and means advance* bakah khan, nichina kan memberte pawhin an sawi, kan Supplementary Demand titamtu crore za tel, sang tel project, building project kan zu kalpui a, agriculture, horticulture, eng project emaw kan kalpuia min lo phalsak tak budget-a kan sawi tel miah loh crore sawm tel, a za bi, nakina a han tlinkhawm phei chuan sang bi a lokal ta a, kha kha House-a pass leh zet loh chuan hman theih a ni lova. “Khai le pute u, member zahawm takte u, budget kan pass a” kan tih hnu khan, “Hei le, kan va ramchhuak a sazuk kan rawn hawn ta a; kha kha kan ziah tela, min authorize a ngai e” tiin. A nihna takah chuan Supplementary Demand hi *formalization*, a tam ber hi chu a ni. A hranpaa hmana puk belh kha a awm tak tak lo. Chuvangin, a tam ber hi chu project-a kan zuk hnuh haw kha formalize a ngaih avangin a number pawh hi a tam a ni. a number titamtu dang, nichina kan hotute sawi dik em em, *ways & means advance* erawh kha chu record vek anih avangin, state dang zawng zawng pawhin an lo ti a, kha khan a titam ve thova, keini hi dangdai kan ni miah lo tih kha ka sawi duh a ni.

Tin, Pu Speaker, kan demand leh zawhna neuh neuh point te te kha ka han sawi zawk ang a. Pu Papuaia khan, contractor ho hian ‘hei hian a la tam bik, chu chu in pe tam bik’ tih hi a tam lutuk a, chuvang chuan kum 10 chhung velah emaw tun hnaia mi contractor liante hi chu an thawh zat te department-ah min lo pe mai ula tia a rawn sawi kha, nia, thil har a nih ka ring lova, ka lo zawt ang a. Kha kha chu a copy an nei sa vek ang a; rei tak kum 20, kum 30 chu tih sen pawh a nilo ang a, kum 10 chin vel emaw tal hi chu khang contractor lian zawng zawng pawh a tih theih lo ang a, a lian deuh 20 rual vel tal emaw kha chu ka rawn la ang a, kan hotute ka rawn pe vek ang che u. House-a sem vak pawh a ngai lova, a mal malin kan inpe ang a, Pu Papuaia rawn dilna kha.

Tin, Aizawl By-pass kha member pakhat khan a hresual deuhin ka hria a, ‘engati nge western side ni si, hmar lam hlir in tih’ tih kha, hmar lamah kan ti miah lova, tunah hian an survey mek a, an bei tlut tlut a, Sihhmui lam atanga Muallungthu side-a chhuak tur khan an en mup mup a. Khawthlang a ni bawk a, chhim lam a kawbawk a, kha kha Aizawl khawthlang lam deuh anih avangin, ‘western’ tih mai kha a ni a, tunah kan kalpui mek e tih kha ka sawi duh a.

Tin, healthcare sum kha; ni e, a dik a, a hrehawm pawh ka ti a, tul ka ti si a. Mizoram-ah healthcare hi, ka tawng tu'n nuihzat suh se la, Mizoram context-ah hi chuan 'ka baby' ve hi a ni a, nasa takin Finance Minister hnenah "kan dawn tur cheng 50 crore tal min puk tir la, kan dah pung ang a, kan thawh bawk ang a, Mizoram Health Care System hi kan ti dawn nia" ka ti a. Finance Minister Yashwant Sinha- a nih lai khan ka nawr nasa lutuk a. "I tum hi chu a tha, mahse ka pek che chuan midangin an thik ang a, tawpin tai a awm lovang" a ti a. A tawpah Asian Development Bank atangin puk ngawt mai ang kan ti a, kan bei ta a. Japan mi, Country Director Aizawl-ah kan sawm chho a, tichuan kan puk a, 100 crore tel kan hmu ta a. Kan tifel hman tawk tawk a, kan hmang hman lova, a pawisa erawh chu kan dah fel thap a ni. Ti khan, healthcare kha a bul kan tan chho chiah a ni.

(Interruption ..)

PU LALDUHOMA : "Pawisa kan dah fel" kan House Leader khan a ti a, khalai kha ka zawtfiah duh a.

Kum 2021 budget speech-ah khan 20 crore an dah thu kha kan ngaithla a, kan kut pawh kan beng a, Demand-ah khan a rawn nil leh si a. Helai hmuna Finance Minister thusawi leh department-in Demand-a an rawn dah kha lei leh van angin a inang ta lo a ni. A *nil* thak a, khami kum khan, tichuan, nikumah khan a *nil* leh a ni.

PU ZORAMTHANGA, CHIEF MINISTER: Pu Speaker, ka la sawi zo lova. Ka Chief Minister hmasak hun a ni ka la sawi ni.

PU LALDUHIMA : Hmana mi kha chu sawi pawh a ngai tawh lova. Nikum hmasa khan 'kan dah ang' in ti a, kut kan beng a, in dah si lova, current financial year-ah in dah leh bawk si lova. Supplementary Demand-in hmanni khan 10 crore in rawn dil a, churang chuan, a pek tur budget-a an dah miau loh chuan engtin nge damlo ten pawisa an dawn theih ang? Damlo an hmangaih a nih chuan pawisa budget-ah dah rawh se.

PU ZORAMTHANGA, CHIEF MINISTER: Pu Speaker, kan Opposition Group Leader kha a che rang lutuk a, ka la sawi zo hman lo a tin ni.

Tun sorkar-ah ka la lut hman lo; 2007-2008-ah kan dah thlap a, kan hmang hman lo tih chin kha ka la sawi a ni. Tunah 2018 tawp, 2019 tirah kan han sorkar leh a, healthcare chungchangah committee kan han thukhawm ta a, 'enge a an?' ka han ti a, 'ka pu, (a zat chiah ka hre ta lova) 150 crore leh engzat emaw a la awm e' an ti a. 'E, a va lawmawm ve, khawi a mi nge?' ka ti a, 'in kalsan ang chiah chiah khan a la awm, a ngai ngaiin' an ti a. (**Speaker** : 170 crore vel a ni ang). Ni e, 170 crore vel a ni ang, a chiah chu ka hre ta lova, a pung te hi a awm ve thin a. 'Kum 10 opposition-ah kan awm

a, khami chhung khan a pun belh lo em ni, an dah belh lo em ni?’ ka ti a, ‘cheng khat mah dah belhtu an awm lo’ an ti a, *talent*, khata mi ang khan deuh khan, “ka pu, i neih ngai kha i dawn leh a ngai a ni” min ti a ni deuh ber a. A ngaihna ka hre lova, 2019-2020 budget-ah khan 50 crore kan dah belh ta a ni. Tichuan, 200 crore a lo chuang ta a, normal chu ni se 2021-2022-ah khan 50 crore te chu han dah belha pung chho zel tura ka tih kha a ni a. Amaherawchu, Covid-in min han ti run a le, tihngaihna a awm ta ngang lova, ‘in dah lo’ in tih kha a dik chiah, kan dah thei ta ngang lo a ni. Thinur chang chuan, “engahnge kum 10 kan absent chhung khan tlem a zawng tal, kum tin 10 crore tal an lo dah loh” te ka han tih chang te chu a awm ve baw k thin a ni.

A ngai chiah kha kan han rochung leh a, chutatang chuan kan han ti ta fat fat a, he SEDP atang pawh hian healthcare-ah kan han ti a, heta tang hian an ba kha a hranpaa dah lovin, a tul leh mamawh angin kan pe ta a. Amaherawhchu kan sum harsat avangin kan pe tam taw k lova, tunah pawh kan la ba teuh mai a, hrehawm kan ti. Mahse tunah hian kan pawisa healthcare-a kan neih hi chu 220 crore a tling em ka hre lova, chung vel chu a la ni a, a pung kha kan hmang a, kan pawisa SEDP atang khan, achangin, crore thum i pe ang, a changin crore li ti khan kan theih tawpin kan chawm a a ni. Pu Duhoma sawi kha a dik chiah, budget-ah kan dah dan hi, SEDP funpuia kan dah atang khan kan theih ang angin kan pe a, a hranpa, a hming ziakin kan dah thei ta bik lo a ni. Tunah hian *Extra knowledge project* atangin kan dil leh mek a, crore 1000 tawp kan dil a, kan hmu ang nge hmu lo ang tih ka hre bik lova, kan hmuh palh hlauh chuan zoram mipui tena chhenfak tham kha kha a pung awm dahna tur hmunah kan dah ang a, tichuan mipuiin kan thawh belh baw k ang a. Health Care System hi mipuite hahdam taka an awm theihna turin beihpui, hmana kan tih lo tawp vang vang kan chhunzawm leh kha tihlen leh tumin kan bei leh mek a, Pathian tanpuinain kan hlawhtlin ngei pawh kan beisei a ni.

A dawta ka han sawi leh duh chu, “Special assistance for to the State for capital expenditure (SASCE) kan tih kha kum 50 hnua rulh tur a ni a, kha kha Mizoram-in kan zuk tih bik pawh a ni lova, India sorkar-in, India ram zawng zawng hian a mamawh tih hriain kuminah khan crore nuai khat he SASCE-ah hian a dah a ni. Crore nuai khat dah ta chu eng emaw zat chu kan chang ve ang chu kan ti a, theihtawpin kha ta tanga kan hnathawh turte pawh kan lo identify lawk a ni.

Tichuan, hmanni khan Finance Minister Pi Nirmala Sitaram, ka zuk biak hmasak pawh ni lovin minrawn be hmasa ve tlat a, “hei, in chanvo ve tur crore 400 special assistance atan hian in nei dawn tih karawn hrilh che” arawn ti a, za tal chu kan dawng mahna tia budget-a kan dah kha Nirmala Sitarami’n, “400 karawn pe a che u” tih minrawn hrilh a, a lawmawm kan ti khawp mai. Member te pawh ka la hrilh lova, hria pawh

an awm ka la ring bik lo. Chu chu kan neih belh a, khata tang khan kumin development a kal chho thei ang a, a lawmawm ka ti khawp mai.

Tin, kan MLA fund-ah te pawh a ngai tein crore 60 kan han dah a, SEDP, a funpuiah crore 700. SEDP hi socio-economic develop theihna atana kan flagship program technical thil pawh a awm, educational pawh a awm, Agriculture, Horticulture thil pawh a awm. Kha kha a funpui a nih avangin kuminah hian 700 crore kan han dah a, mahse, *family oriented*-ah 350 crore kan han dah chhin a, a bakah kha *matching share* tur leh thil dang tula hman tur nen, kan kawng maintenance te pawh a lo tul bawk si a. Kal kawngte hi a chhiat lutuk chuan sorkar neitute tan a hreawm a, enkawl hram hram kan tum a. Chuta tan nen zau thei ang berin hma kan han la a, kan han tikhawm ve a ni.

Pu Speaker, ka sawi rei lutuk ang tih ka hlau a, nakinah demand-wise kan la ti leh dawn bawk a, chumi hun atan chuan dah ila. A tawpna atana ka han sawi duh chu, nichina kan hriat ang khan a percentage leh a harsa zawng anga han sawi, “he sorkar hian an ti lo a ni, a diklo a ni, mipui tan a zialo a ni” han tih kha, a tak tak emaw a nih leh nih loh hre tak taklo mipui kha an tam si a, khangho zawng zawng hrihfhahna tur khan thiam a ngai tawh si a, mipui kan timangang thin a. Nichina ka sawi tawh ang khan, “a vai chuan cheng chuti zat chu a ni” tih kha kan hriatthiam a nih vangin, khati zawng khan ka han sawifiah ve thung a nih kha.

Eng pawh ni se la kan harsa tlang tih chu a chiang a, khawvel a ni a, India a ni a, state zawng zawng a ni a, dam khawchhuah tumin kan bei a. Hemi karah hian beiseina sang tak nen kan bei a, Covid pawh a lo ziaawm zel a. Mizoram pawh hmasawmna lama ke kan pen chuan Pathian tanpuinain hlawhtlinna ropui tak Mizo hnamin neiin, kan economy leh kan development pawh sang chho zelin kan hlawhtling ang tih ka ring a. Chuvangin, kan kal tumna lamah kan chiang a, amaherawhchu a eng amah hmaa, sawi ve leha, “in va ti si lo ve, Switzeland of the East ram siam kan tum a ni lawm ni” tiin leh, “kan kawt hetiang lai hi a va la berh si ve, a va la Switzerland si lo ve” an tih ang deuh kha a ni a. Kawng chhawng siam kan tum e kan han ti a, kan project zawng zawngah khan min tichhetu leh min hnukhniamtu chu kan hria, *Covid* a ni. Hemi kara ‘elevated road’ han tih te kha (tunah chuan kan kan han nawr tan leh tawh zawk a), a ngaihna a awm lo reng reng. Dam khaw chhuah kan tum a, chaw nghei lova awm kan tum a, damdawi neih kan tum a; chutah a chhe thei ang zawng zawng hian min tlak emaw tih turin, ramri buai ringawt pawh kha thil pui a tling a, chaw min nghei tirtu hnai a ni. Chutah kan vawk thi ringawt pawh sing tel rual a ni a, Burma a buai a, refugee sang tel nen tihian kan han buai a, Covid nen kan han kal a, khawchhak lamah lir vawi sawm ruk vel a lo nghing bawk nen. A chhe tur zawng zawng hi a kalkhawm emaw tih tur hian “hun chhia atan he sorkar hi a ding a ni” miin min tih pawhin a awm khawp a ni. Amaherawhchu tun ang hun chhiaah kan dam khaw chhuak chhoha hetiang anga kan

ti thei hi a lawmawm a. Member zahawm takte nen theihtawpin tan kan la ang a, he ram hi harsatna chitin reng karah hian kan hnuk chhuak chho ang tih ring chungin he kan *Demand for Grants* kan han phelha, kan han sawiho laih laiha, *Budget General Discussion* kan neih hi a lawmawm kan ti a. A theih ang tawk tawk kan inhrilhfiyah zel ang a.

Budget kher kher hi chu a har em em mai a. Thenkhatin min lo ti a, “Ka pu, Supplementary Demand in han sawi meuh kha chu, hreawma ka ngaih tak tak pawh khan an hre lo reng reng a, a nilo lamah an thlekpuizel a” tih expert deuh ten comment minrawn pe ve thin a. An thiamawm e, Supplementary Demand kalphung pawh sawi mah ila, sawi tam pawh leh tam tak hi chuan kan buaipui a, khati vel kha a ni a. Amaherawhchu kan zir chho ve zel ang a, kan hre ve zel ang a. Keini pawh kan MLA tih te ka han ngaihtuah chuan kan hre ve tawh em em a. Khatiang khan kan zir chho ve zel ang a.

Chuvangin, boruak muanawm tak karah Budget General Discussion tha tak kan han nei te pawh hi lawmawm ka ti a. Kan Opposition Group Leader Pu Duhoma’n a rawn rawt ang, “Supplementary Demand hi full discussion neih tur a ni” tih ang chi te pawh kha a hranpain kan object em em pawh a ni lova. Committee kan nei a, aiawh tinin tha kan ti em, kum sawm li, sawm nga dawn lai kan lo tih ngai loh thil thar a ni a, hei hi tha kan tih te chuan, “i han sawikhawm teh ang u” tih hmasak han ni se la. Heta rawt thuta tih nghal thut kha chu, ka tawng a huat thu suhah, Pu Thanghuta haw tur ang deuha, “ka haw teh ang” tih deuh thut kha a ni lova, thil kalphung deuh hlek hi a awm a. Chuvangin, kha lai kha chu a rel pawh kan la rel khawm ang chu maw le.

PU LALDUHOMA : Hotupa ber a ni a, kan lo copy ve thin a. Bawngpui insi ang thutin, “warm-up awm lovin” a tih ang deuh kha kan lo copy ve a ni.

PU ZORAMTHANGA, CHIEF MINISTER: Pu Speaker, boruak tha tak hnuaia discussion kan nei a, ka lawm hle mai. Chu chu ka sawi theih ni rawh se. Ka lawm e.

SPEAKER : Mizoram Healthcare hi kan Chief Minister zahawm tak ‘baby’ a ni a, an piantir a, an chawm hmanloh keiin ka enkawl a, ka ‘children’ an ni.

Wawiin atana kan business chu kan zo leh ta a, kan chawl leh rih tawh ang a, Naktuk March 2, 2022 (Nilaini) chawhma dar 10:30-ah kan thukhawm leh dawn a nia.

Sitting is adjourned (5:28 PM)